

LUKIM OL RIPOT
LONG WANTOK
NIUSPEPA TUDE

Loya
laikim
Wakon i
kalabus
long
sakim kot



- pes 2

Ol
laipstail
stori

- pes 18-20



Moa piksa
long ol
bagarap
long
Amerika

- pes 16-17

No Allan tek
amamas long ol
Japan wekkala

- pes 4

Pes 30
Winim
prais,
painim
bal resis

Ol Afghhan redi long woa wantaim Amerika



• Ol manmeri long Afghanistan i pret na laik ronawe brukim Pakistan boda.

AMERIKA i tokaut pinis long pait egensim ol birua o teroris grup husat i save kamapim birua long kilim ol gutpela manmeri nating na pretim kantri na ol lida.

Long dispela wik, kantri Afghanistan i sambai long woa egensim Amerika sapos Amerika i laik kamapim pait long holim wapele biknem birua man Osama bin Laden na ol lain bilong em. Amerika i gat birua yet long bin Laden long 1998 birua ol i ting bin Laden wantaim teroris grup bilong em i bin bomim tupela Amerika Embesi long Is Afrika. Amerika i joinim dispela birua wantaim bikpela birua na bagarap we i kamap long Nu Yok na Wasington long las wik Tunde we moa long 5,000 manmeri i dai na planti tausen moa i kisim bagarap taim tupela balus i ron i go insait long bikpela tawa bilong Wol Tred Senta na narapela long Pentagon. Tupela tawa wantaim i paia na

kapsait i kam daun na planti tausen manmeri tru i dai na kisim bagarap. Ol pasindia bilong tupela balus tu i dai wantaim.

Ol ripot i soim pinis olsem ol birua man o teroris grup i ronim ol dispela pasindia balus bilong Amerika we ol pasindia i stap long en na ron i go insait stret long tupela bikpela tawa ya na kilim olgeta manmeri long balus na tu long dispela tupela tawa.

Presiden bilong Amerika George Bush i makim US\$ 40 bilien (dola) pinis bilong ol ami na ol fos bilong Amerika i yusim long dispela bikpela wok bilong pait egensim ol teroris grup we i stap long Midel Is. Afghanistan i stap namel long tupela bikpela kantri em Pakistan na India.

Tasol ol lida bilong Afghanistan i tok sapos Amerika i karim pait bilong ol i go long kantri Afghanistan, ol Muslim long



• George Bush.

Afghanistan i mas pait bek. (Muslim em olsem sios. Yumi em Kristen sios) Na ol i kolim dispela olsem holi woa.

Nius ripot i kam long Bakhtar News Agency i tokaut olsem namba tu lida bilong kantri Mullah Mohammed Hasan Khun i tok sapos Amerika i kam pait long kantri bilong ol, bai holi woa i kamap. "God i stap long sait bilong yumi na sapos ol pipel bilong wol i laik laitim paia long Afghanistan, God bai was long yumi na helpim yumi, nius i raitim em i tok olsem.

Long dispela wik, ol lida bilong Afghanistan i wok long salim tok-save long olgeta pipel bilong ol olsem ol i mas sanap strong wantaim na redi long woa egensim Amerika, nius ripot i tok.

Ol lida bilong Afghanistan i tok Amerika i sutim tok nating tru long Osama bin Laden long dispela birua long Amerika long las wik. Ol i tok dispela em giaman toktok tasol long kirapim woa egensim Afghanistan.

Foren Minista Wakil Ahmed Muttawakil i tok em i no amamas long pasin ol teroris o birua lain i mekim long bagarap laip bilong ol gutpela manmeri long Amerika. Tasol em i no ting Osama bin Laden bai mekim dispela samting bikos em i nogat strong long sapot na ol samting bilong yusim long mekim kain bikpela birua na bagarap olsem.

Ol i tok Amerika i no inap long painim ol birua lain stret na i wok long sutim pinga long bin Laden tasol.

Pakistan i tokaut long em i no



• Osama bin Laden.

laikim dispela kain birua pasin ol teroris i mekim long ol gutpela manmeri long Amerika long Septemba 11, las wik. Na em i tokaut long sapotim Amerika long painim na holim ol lida bilong dispela kain teroris grup. Tasol planti tausen manmeri bilong Pakistan husat em ol Muslim i no amamas long Amerika bai pait wantaim ol Muslim brata susa bilong ol long Afghanistan. Ol Pakistan manmeri i soim straik bilong ol egensim gavman bilong ol long sapotim Amerika na ol i tok Afghanistan bai kamap matmat bilong ol Amerika stret.

Kantri Frens i pret long wanem sait em bai sanap long en bikos planti milien manmeri bilong Frens em ol Muslim manmeri. Olsem na Frens i askim Amerika long stretim gut nek bilong em long husat tru em Amerika i laik woa wantaim.



• Bikpela tawa i paia long Amerika las wik.

PLIS RIPOT

Wewak: Plis sutim 3-pela stil man long Wara Sepik. Ol stil man ya i ronawe long Madang na i wok long pretim ol wara lain na plis i sutim tripela i dai.

Kerema: Malalau plis i holim tupela yangpela man i stap long kalabus. Plis i bilip olsem dispela tupela yangpela i stap insait long dai bilong Pater Fabian Thom long Pot Mosbi.

Pot Mosbi: Wanpela bisnisman bilong Saina i dai long han bilong ol stilman long pot Mosbi. Em i save ronim wanpela kai ba long Pot Mosbi. Stil man sutim em i dai long kuk haus. Tupela yia i go pinis, tupela marit bilong Saina tu i bin dai long wankain pasin taim stil man sutim tupela long 3 Mile.

Plis kisim ripot bilong 91 raskal pasin. Plis holim pasim 56 manmeri long kainkain hevi insait long komyuniti.

Plis kisim planti ka tu long ol rot blok na sampela PMV bas na Teksi lusim laisens bilong ol long karim pasindia long siti.

Kundiawa: Wanepal nes long Kundiawa i kilim man bilong em. Meri i dring bia na spak i kam long haus na kilim man bilong em. Meri ya i slip nau long kalabus.

Mt Hagen: Ol sutim wanpela man husat traim ronawe lusim Baisu Haus Kalabus na em i dai. Narapela poroman bilong em tu ol i sutim tasol em i no dai na ol i kisim em i go bek gen long kalabus.

Lae: 16-pela kalabus man bilong Buimo i ronawe lusim kalabus tasol gutpela wok bilong ol wada i holim pasim 13 olgeta. Tasol tripela i ronawe na i stap nabaut ausait. Ol manmeri i mas lukaut na toksave sapos ol i luksave long sampela bilong ol dispela man.

Man noken kamapim birua long meri pikinini

PEKU PILIMBO i raitim

OLGETA man i mas go pas na noken paitim na pretim meri pikinini, paitim o mekim pasin nogut long ol.

Hai Komisina bilong Inqlan Simon Scadden i mekim dispela toktok taim em givim K10,000 i go long Family Violence Action Committee long Gateway Hotel las wik.

Em i tok taim em i kam namba wantaim, me lukim planti stori bilong hevi ol mama na pikinini i save painim kamap planti taim long niuspepa.

Mista Scadden i tok em i no amamas na i wok bung wantaim wanem grup i tingting long stapim ol hevi we i lukim man i mekim pasin nogut o paitim meri.

Em i tok dispela K10,000 helpim i kamap bihain long wanpela miting long 1999 we i kisim wanpela saveman i kam na save man i tok long

bungim kainkain grup bilong pipel long traim stretim na stapim hevi.

Tasol planti taim das i save karamapim ol gutpela ripot na nogat wanpela samting i save kamap. Dispela pasin i noken kamap long wok bilong ol long traim stapim hevi bilong ol mama na pikinini i painim.

Britain i amamas long helpim PNG na traim stretim hevi bilong man i bagarapim na pretim meri long i stap insait wantaim na developim kantri.

Taim ol meri pikinini kisim bagarap, ol haus sik, kot, wel fea opis, haus kalabus, haus sik i save pulap wantaim pipel husat gat hevi. Dispela i save westim nating mani bilong gavman na wankain taim ol pipel husat kisim bagarap i ken helpim long kamapim sampela wok.

Ol kain pasin bilong daunim meri i mas raus. Givim kainkain trening long ol man bai luksave long meri olsem wankain.



• Ol Kairuku grup skul pikinini long Gordon DMK i amamasim Independens De las wik.

Loya laikim Wakon i kalabus long sakim tok

WINIS MAP i raitim

LOYA husat makim olupela Asisten Komisina bilong Plis Garry Baki i tok aste olsem Plis Komisina John Wakon i mas go kalabus bikos em i sakim oda bilong Nesenel Kot.

Long Oktoba 20, 2000 Nesenel Kot i tokaut olsem John Wakon i mas putim Garry Baki bek long posisen bilong em olsem Asisten Plis Komisina. Nesnel Eksekutiv Kaunsel i bin rausim Mista Baki long Julai 30, 1999.

Tasol Mista Wakon, husat i Plis Komisina long dispela taim i no bihainim oda bilong kot na Mista Baki i sutim tok

long Mista Wakon na i laik kotim em. Long Jun 27, 2001, Jastis Kubulan Los i painim aut olsem Mista Wakon i bin asua na sakim oda bilong kot.

Colin Mikail bilong Moses Murray loya i tok man husat brukim oda bilong kot i no wanpela gutpela pasin na i mas go kalabus.

Bihain ol lida bilong kainkain gavman dipatmen bai bikhet na mekim wankain pasin na kot i mas givim wanpela bikpela mekim save.

Mista Mikail i tok Mista Wakon i soim olsem em i no wari long kot na lo na i no putim Mista Baki bek long wok bilong em olsem kot oda i tok.

Mista Wakon i no bihainim oda na famili bilong Mista Baki i bin kisim hat taim long dispela olsem na Mista Wakon i mas bekim asua bilong em wantaim sampela

hatpela mekimsave.

Tasol loya bilong Mista Wakon Jack Nalawaku i tok Mista Wakon i no moa stap olsem komisina bilong plis na i no moa stap aninit long kisim sas olsem komisina.

Tasol asua em i mekim pinis na em i mas peim sampela kot fain olsem mak bilong K50 i go antap long K1,000.

Em i tokim kot olsem wok bilong Mista Wakon i mekim em narakain man liklik tasol em man nating olsem ol narapela.

Kot inap harim wanem penelti Mista Wakon inap kisim aste tasol Mista Nalawaku i tok nogat long disisen bikos Mista Wakon i laikim Suprem Kot long harim.

Apil bilong Mista Wakon bai kamap gen long Oktoba 29, 2001.

WANTOK

All departments, Phone: 325 2500 - Fax: 325 2579 P. O. Box 1982, Boroko, NCD, Papua New Guinea

Publishing Weekly, Thursday, for Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Company Ltd.

General Manager and Group Editor in Chief: Anna Solomon. Advertising Manager: Editor of Wantok: Yakam Kelo. Papers distributed by air throughout PNG. Available by air mail subscription within Papua New Guinea and overseas. Email address: word@global.net.pg

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.



TORO

TORO GO RAUN LONG PRES-KLAB NA LUKIM OL BOIS IPILAI SNUKA!!!

TORO TINGEM MOA YET NA EM MEKIM OL KAIKAIN TOKTOK!!!
BARA! DIS GEM IS TEIKIN TOO LONG... SINKIM TASOL!
SA-RAP!

NAU EIT BOL TASOL I STAP NA TORO SINGAUT!!!
SINKIM!! GIVIM HAD WAN!!
INAP YU SARAP? YU PILAI O MI PILAI?!

MAN YAH I BELHAT NA SUTIM BAL STRONG TRU.. BALI KALAP NA SMESIM PES BILONG TORO..
HAHA! HA! YU KISIM? NAU!

Noken kisim pis lama moa, NFA i tok

PEKU PILIMBO i raitim

PIPEL i noken moa kisim is lama bihain stat long Oktoba bikos dispela em taim bilong ol long putim kiau.

Opis bilong Nesenel Fiseris Atoriti (NFA) i putim toksave aut pinis olsem ol opereta i noken kisim pis lama (Beche-de-mer) stat long Oktoba 16 i go inap long Novemba 1. Namel long dispela taim, ol bai lukluk long husat bai wok bisnis yet na NFA i ken rausim laisens bilong kampani.

Fiseris Menemen wantaim NFA Philip Polon i tokaut olsem husat manmeri i no harim ok na wok long kamapim bisnis inap lusim bisnis

laisens bilong em.

NFA i askim pinis ol kampani mekim pis lama bisnis long toksave long ol bipo Oktoba amas ol i kisim na noken kisim moa bihain long dispela.

Planti liklik pis lama i kamap long ples bilong ol man bilong salim long narpale kantri. Ol i laikim ol pipel i givim taim long ol pis lama bai ol i ken karim moa pikinini na tu gro bikpela.

Olgeta ples arere long long nambis i mas harim na bihainim dispela toktok. Ol ples olsem Milen Be i gat bikpela hap eria bilong rif i stap na pis lama i save pulap tasol nau ol i wok long kisim liklik tasol long salim.

Ol i malolo liklik na larim ol bikpela putim kiau na kamapim nupela paxas-

taim long operesen bilong kisim pis lama i ken go het gen.

Mista Polon i tok pis lama i save kisim mani inap mak bilong US\$14 milien wanwan yia. Saina, Singapore na Taiwan i save baim planti pis lama.

I gat moa long kampani long kantri husat salim pis lama long ovasis maket an narapela ples long graun.

NFA i askim tok nominesen i kam long kainkain lida husat i gat laik long stap long Nesenel Fiseris Bod na edvaisim meneseing dairekta.

Ol man husat i save long sait bilong pis na i tingting long givim sampela na helpim i go long NFA. Ol toksave i kamap pinis long niuspepa na ok moa long wanem samting bai kamap.

Papagraun wet yet long PJV harim hevi bilong ol

WANPELA bikpela papagraun long Pogera main i tokim maining kampani Pogera Join Vensa (PJV) olsem bai ol i kisim hevi bilong ol wantaim kampani i go long kot bikos PJV i no bekim hevi bilong ol hariap.

Dispela grup em Tuanda klen na mausman bilong ol Kamberan Ambi i gat 10-pela de tasol i stap bipo long taim ol dispela papagraun i givim PJV long bekim askim bilong ol hariap.

Ol i bin givim PJV 30 de long bekim toktok long wari bilong ol ol i bin toksave long kampani.

Mista Ambi i bin raitim wanpela pas i go long PJV long stat bilong dispela mun na em i bin tokaut klia olsem ol papagraun i laik bai sampela samting i stap long kontrak bilong ol i mas senis na ol i laik bai PJV i ken lukluk long dispela na senisim kontrak bilong ol tasol kampani i no bin mekim dispela.

"Sapos nogat bekim i kam long dispela askim mipela i plen long kisim dispela samting i go long han bilong lo na ol narapela we long mekim PJV i mas toktok stret long dispela samting," Mista Ambi i tok long pas em i raitim i go long kampani.

Em i tok ol papagraun i no laik kisim dispela samting i go long kot na ol i laik tru olsem kampani i mas kam daun long level bilong ol na harim hevi bilong ol.

Mista Ambi i tok ol papagraun i redi tasol long harim toktok bilong ol papagraun na ol i mas harim toktok bilong ol tu na maski long mekim samting i go bikpela.

Wanpela samting ol papagraun i laik olsem i mas senis long kontrak em mani ol papagraun i save kisim ol i kclim roielti mani em K100.

Ol i laik bai dispela em kampani i mas surukim i go antap long K500 bikos kantri i kisim bikpela hevi long mani na i hat tru long ol i helpim ol yet wantaim K100 tasol.

Ol i tok tu olsem PJV i no save larim ol papagraun long mekim sampela liklik bisnis long maining ples olsem na ol i laik bai kampani i mas givim sans long ol tu. PJV i no laik toktok long dispela samting tasol ol i laik bai dispela toktok em ol i stretim long maining ples.

Dispela kain ol hevi em Komyuniti Afeas divisen bilong PJV i save harim na rejistaim pastaim long kampani i toktok long em.

Surikim na wok bung wantaim

PEKU PILIMBO i raitim

FAMILI na seksual Vaiolens Eksen Komiti (FSVAC) i mas sanapim wanpela opis long ls Niu Briten na mas wok bung wantaim ol liklik opis i stap pinis long ol lokel level gavman kaunsel eria.

Patrick Waragat, Siaman bilong Child Abuse Komiti (CAC) long ENBP i askim long wanpela woksop bung las wik long Pot Mosbi.

Kainkain grup bilong pipel long olgeta hap bilong kantri

i bin bung long Gateway Hotel wanpela de na givim tingting bilong ol.

Olgeta toktok i kamap long birua ol meri na pikinini i save kisim long sait bilong pasin nogut na pait.

Grup i gat wari olsem planti meri i no save mekim gutpela wok bikos ol i pret tumas logn laip bilong ol.

Planti pikinini i no gro kamap gut bikos papa o mama i bagarapim ol taim ol i liklik yet.

Dispela woksop i lukluk long wanem birua ol mama

na pikinini i save kisim na wanem gutpela rot long stretim ol dispela hevi.

Mista Waragat i tok toksave meteriel i mas kamap long redio na pepa wantaim long helpim ol.

Em i topk opis bilong CAC i sanapim pinis wanwan opis bilong ol long olgeta LLG insait long ls Niu Briten na i askim FSVAC long sanapim wanpela opis.

"Mipela i kamapim network i stap pinis na em i gutpela long yupela putim wanpela opis long hap," Mista

Waragat i askim.

Em i tok ol i surikim opis long olgeta hap bilong provins long taim CAC i stat long 1995.

Ol nius pepa na redio i mas givim gutpela toksave long olgeta manmeri na kainkain grup i mas kamapim klia tingting long hevi.

Mista Waragat i laikim ol haus sik long wok bung wantaim ol na givim aut ol toksave bikos taim birua i kamap, ol i namba wan lain long lukim.

Saspek long pikinini dai stap long plis stesen

HILDA WAYNE i raitim

PLIS i holimpas pinis faivpela man husat em plis i bilip olsem ol i bin bagarapim na kilim i dai faivpela yangpela pikinini long Kompam long Enga provins las mun.

Dispela ol man i stap nau long han bilong plis long Wabag plis stesen na plis i wok long askim ol long painimaut sapos ol i bin mekim dispela rong long kilim liklik pikinini.

Hailans Rijinel Plis Komanda Suprintenden Tony Wagambie i tok olsem ol faivpela man i stap wantaim plis na bihain long plis i toktok wantaim ol bai ol i putim sas long ol na bai ol i go long kot long rong ol i mekim.

Mista Wagambie i tokim Wantok olsem dispela ol man i stap long han bilong plis bikos komyuniti i bin wok bung wantaim plis long holimpas ol

man na givim i go long han bilong lo long stretim hevi we i kamap.

"Ol lain Enga i no save wari long wanpela samting. Taim ol i laik katim man em ol i save mekim tasol na bihain ol i save redi long kisim taim long rong ol i save mekim," Mista Wagambie i tok. Em i tok long Enga trabel i save kamap long taim bilong em na taim trabel i kam em olgeta samting i save bagarap tasol bihain ol i ken stapim hariap tu.

Dai bilong dispela faivpela pikinini krismas bilong ol faiv i go ten yia em sampela birua i bin holimpasim ol long wanpela pilai graun long Kompam na katim ol na kilim ol i dai.

Ol man husat i bin kilim ol em ol krismas bilong ol 40 i go antap.

Planti toktok kros i wok long kamap long taim kantri i harim olsem dispela ol pikinini i dai olsem animol na planti pipel i tok lo i mas mekim save long

husat man i bin mekim dispela rong.

Long narapela stori em i tok plis i holimpas 16-pela manmeri long Wapenamanda distrik long Enga yet.

Mista Wagambie i tok long sampela mun i go pinis sampela lain long dispela distrik i bin laik bagarapim plis na opis bilong plis. I bin gat toktok long ol plis bai kisim taim long han bilong ol pipel.

Dispela kain pasin bilong toktok nating nating long ol plis na tok kros long ol i brukim lo na plis i holim dispela 16-pela lain i stap bai ol i askim ol na putim sas long ol klostu taim.

Enga em wanpela provins we planti moa hevi i wok long kamap we mipela hariap olsem ol man i bagarapim plis-man, ol pikinini i dai long han bilong ol bikpela man na tu PNGBC benk long Pogera tu i pas pinis bikos raskol pasin i mekim hat long ol manmeri i wok long benk na givim sevis long ol.



Lufa masrum kamap bikpela • Masrum prosek long Lufa bai kamap bikpela. Dispela em memba bilong Lufa, Mathias Karani i tokaut pinis bihain tasol ol save-man bilong China i go lukim dispela prosek. Joel Alex, wanpela manki sindaun arere i stap long boks masrum long Jackson's eapot. Foto: JOE KANEKANE



Pawa bilong makim ol Gutpela Lida o Lida Nogut i stap long vot bilong yumi

ILEKSEN bos Mista Reuben Kaiulo i stat wok gen olsem Iektorol Komisina aste na tok Nesenel na Lokol Gavman Ilekseen neks yia i mas fri na fea olgeta.

"Dispela em i impoten tru," Mista Kaiulo i tok long Pot Mosbi hetkwota bilong Iektorol Komisina. "Sapos i nogat fri na fea ilekseen, kain kain hevi i ken kamap."

Mista Kaiulo i mekim dispela toktok taim em i bung wantaim Deputi Iektorol Komisina Mister Andrew Trawen long kisim bek wok bilong em olsem Iektorol Komisina.

Mista Trawen i bin wok olsem Ekting Iektorol Komisina stat long Ogus 10,

taim Mista Kaiulo i lusim Papua Niugini na i go long Fiji wantaim ol ilekseen bos bilong ol narapela kantri long glasim gut nesenel ilekseen bilong Fiji.

Ilekseen bilong Fiji i bin pinis long dispela mun Septemba tasol na Mista Kaiulo i kam bek long Papua Niugini.

Ol grup bilong glasim ilekseen i bin kam long Komonwelt, Yuropien Yunien na Yunaitet Neisens. Mista Kaiulo i go wantaim ol Komonwelt Grup. Ser John Kaputin, husat em i Memba bilong Rabaul long Nesenel Paliamen, i bin go wantaim Yuropian Yunien Grup.

Dispela ilekseen bilong Fiji i bin kamap long makim gen fri na demokretik Gavman bilong Fiji.

Las yia ol asples Fiji i bin kros na rausim olpela Gavman em ol India bilong Fiji i bin bosim na ol bikman bilong wol i tok strong tru olsem dispela ilekseen bilong Fiji i mas fri na fea.


Ol lida bilong wol i no laikim wanpela grup long paulim toktok o yusim trabel long winim o bagarapim ilekseen.

Sapos ilekseen bilong Fiji i no bin fri na fea, ol lida bilong wol olsem Amerika, Inglen, Jepen, Ostralia na Niu Silen i no nap helpim Fiji taim ol i gat hevi long mani bilong developim kantri bilong ol.


Olsem na Mista Kaiulo i tok gen aste. Ilekseen bilong Papua Niugini neks yia i mas fri na fea. Nogat bai Papua Niugini tu i ken painim hevi long wol.

"Dispela em i no liklik samting," Mista Kaiulo i tok. "Yumi olgeta mas tingting long kantri bilong yumi na wokim gut ilekseen bihainim olgeta Lo bilong ilekseen. Ol kendidet na ol sapota bilong ol i noken mekim trabel o bagarapim ilekseen. Yumi Papua Niugini i gat gutpela nem long olgeta ilekseen bilong yumi na dispela rekot i mas stap yet neks yia.

• PNG Iektorol Komisina i sponsorim dispela Ilekseen Tok Save.



NIUGINI AILAN NIUS



Nu Ailan tok amamas long ol Japan woklain

TONY SAPAN i raitim

GAVMAN bilong Japan i kisim bikpela tok amamas i kam long ol pipel bilong Nu Ailan provins long bikpela wok ol volentia o helpim lain bilong Japan i bin mekim long provins long 1992 i kam. Ol dispela helpim lain bilong Japan i kam aninit long wanpela progrem ol i kolim Japanis Gavman Intanesenel Kopresen Ejensi (JICA).

Wanpela bikpela tok amamas i bin kamap

liklik taim i go pinis taim ol pipel bilong Nu Ailan i tok gutbai long wanpela Japan helpim man hust ibin kamap wok long sait bilong spot. Man ya em Yoshihiro Inoue na em i bin kam stap tupela krismas na 8-pela mun na wok long sait bilong spot insait long ol praimer na hai skul insait long Kavieng distrik.

Ekting Prinsipol Edvaisa bilong Sosel Developmen Babra Baira husat em Yoshihiro Inoue i bin wok aninit long em i

tokaut long dispela gutbai pati olsem planti lain long Nu Ailan i lainim planti samting long dispela man taim em i bin kamap na stap na wok long Nu Ailan provins.

Misis Maira i tok long 1992 i kam, planti Japan volentia i bin kamap na ol i mekim wok bilong ol wantaim strong na mekim wok gut tru maski ol i bung planti hevi long wok bilong ol.

Planti bilong ol i mekim wok bilong ol gut tru na tu ol i save yusim gut wanem

mani i kam long han bilong ol long mekim wok wantaim na rekot bilong ol i save stap klia tru we dispela em wanpela bikpela samting mipela olgeta i mas lainim long ol, em i tok.

Misis Maira i tokim ol manmeri husat i kamap long gutbai pati bilong Inoue olsem maski man ya i save bungim hevi long sait bilong trenspot long mekim wok bilong em, em i save go het yet na planti taim em i save ron long motobaik JICA i givim em na ron i go olsem long Buluminski Haiwe planti taim long mekim wok bilong em.

Misis Maira i tok amamas i go long JICA na Yoshi long bispela wok ol i mekim long helpim wok bilong spot

long develop insait long Nu Ailan provins.

Olsem na wanem samting em wantaim ol arapela wanwok bilong em i bin kamap na skulim ol pipel bilong Nu Ailan long en stat long 1992 i kam, dispela bai helpim tru wok bilong spot long kirap gut long provins long planti yia i kam bihain.

Ekting Provinsal Edministreta Simon Passingan wantaim Provinsal siaman bilong Sosel Sevis we spot tu i stap insait, Mista Francs Wasau i bin kamap tu long stap insait long dispela gutbai pati.

Insait long dispela gutbai pati, ol lain i givim presen na pilai ol musik na singim ol gutbai singsing long tok gutbai long Yoshi.

Watawi bai salensim Ogio long Not Bogenvil sit

MEMBA bilong Selau insait long Bogenvil Pipels Kongres (BPC) Joseph Watawi i kisim luksave pinis long sanap long nesenele ileksen aninit long tiket bilong Pipels Leba Pati we Peter Yama i go pas long en.

Mista Watawi i kisim sapot bilong presiden bilong BPC Joseph Kabui long em i mas sanap long 2002 nesenele ileksen na resis egensim memba bilong Not Bogenvil Michael Ogio.

Mista Ogio em memba bilong Not Bogenvil na em Deputi Praim Minista insait long Sir Mekere Morauta gavman. Pati bilong ol em, Pipels

Demokretik Muvmen (PDM).

Ripot i kam olsem Mista Kabui i sapotim Mista Watawi long sanap long 2002 ileksen bikos ol i laikim pasin bilong toktok wantaim gut i mas stap gut olgeta taim long olgeta level bilong gavman long antap i go daun.

Lida bilong PLP Peter Yama i tokaut olsem pati bai sanapim Mista Watawi long Not Bogenvil na tu sanapim ol kendidet long Saut na Sentrel Bogenvil long 2002 nesenele ileksen.

Tasol pati bai i no inap sanapim kendidet long rijinol sit we John Momis i holim i stap.



• Tripela wokman bilong Tolili friza i soim ol fis ol i kisim long go putim long bokis-ais.

Rakunai i tingim 100 yia bilong wok misin

ONIAS MANO i raitim

RAKUNAI Katolik paris long Gasel lokol level gavman i no longtaim i amamasim 100 yia long Sen Peter Torot haus lotu long Is Nu Briten provins.

Moa long 1000 Katolik manmeri long Gasel Peninsula na Nugini Ailan i bin kamap long dispela jubili long makim namba wan taim Katolik pris i bin kamap long Rakunai ples.

Ol arapela lotu na ol sios lain bilong ol tu i bin kamap selebret wantaim ol. Kamap bilong Yunaitet, Luteran, Engliken na Seven De Edvantis i soim olsem ol kristen i bung wantaim long Is Nu Briten provins.

Long 1884, namba wan Katolik pris i bin kamap long Rabaul long Malagunan long hap we Sen Joseph Paris i sanap tude.

Wanpela krismas bihain Katolik pris i stat long mekim wok bilong autim gutnius bilong God i go we wok i go

bikpela moa long planti hap we i lukim ol lida bilong wanwan ples olsem long Kokopo, Duk ov Yok Ailan na ol arapela ples klostu i kamap long harim tok bilong God.

Katolik pris i bin autim gutnius i go raun tasol long nambis na i no inap go antap long bus olsem long Gasel eria bikos Dokta Hou, wanpela Jemen edministreta long Kokopo long dispela taim i putim tambu long ol.

I no sios i bin karim Katolik i go long Rakunai tasol ol pipel yet i bin karim Katolik sios i go long hap bihainim pasin tumbuna bilong ol yet.

Planti ol lida bilong ples i save go long Malaguna long harim pris i autim tok na singsing we i pulim laik bilong ol tru.

Singsing ol i bin singim em Gloria o hona, we ol i singim long tokples Latin. Long 1901 ol i go bek long ples bilong ol long

Rakunai na tokim ol pipel long dispela nupela lotu. Olsem na bihainim kastom bilong ol, 6-pela lida bilong ples wantaim ol lida bilong Tokakau na Topalma i bungim sel mani na go long Tavutavur long peim rispek na baim sios na kisim i go bek long ples bilong ol.

Ol pris i lukim dispela olsem wanpela gutpela rot bihainim pasin kastom long mekim sios i groa. Pater Phrom em dispela pris husat i bin go wantaim ol pipel na statim sios long Rakunai.

Yumi i wok long go het gut bikos long Kristen bilip bilong yumi we i bungim yumi wantaim long developim provins bilong yumi, Gavana Leo Dion i tok.

Em i tok amamas long ol pipel bilong Rakunai long tokaut long dispela stori we i lukim kristen i kamap long Is Nu Briten provins.





SEPIK NIUS



Maski so op ya • Francis Wimbi Masalai (raithan), Elias Parolye (namei) na wanpela arapela wanwok bilong tupela i stap antap long wanpela spit bot long arere long solwara long Mushu Ailan insait long Is Sepik provins. Hap tripela ya i stap long en i gat wanpela ges haus ol i kolim Auong Be Malolo Los. Sapos yu wanpela lokol turis na yu go raun long Wewak, go long Mushu Ailan na traim wanpela nait long Auong Be Malolo Los: Foto: Fuzo Paul.

Sepik plis sutim man i dai

PLIS long Is Sepik province i bin sutim i dai wanpela man husat i ronawe long Beon Haus kalabus ausait long Madang i no long taim i go pinis.

Is Sepik Provinsel Plis Komanda Leo Kabilo i dispela raskal man husat nem bilong em Judas Robin, wanpela miks Madang na Sepik i dai long han bilong ol plisman bihain long em i pretim ol manmeri raun long Wara Sepik.

Dispela em namba tri man dai bihain long ol plisman tu i sutim i dai wanpela man Sepik na narapela Wes Papua i no long taim i go pinis.

Dispela ol man i bin ronawe lusim Beon haus kalabus na kisim sampela gan bilong plis wantaim na ronawe.

Ol raskal i ronawe i kam bes long wara Sepik na pretim olgeta viles na manmeri husat stap klostu long wara.

Plis i mekim wanpela spesel wok painim aut i kam bilong holim pasim ol dispela man tasol i hat na ol i sutim ol i dai.

Tupela narapela hsuat plisman kilim bipo em long Tom Markus na Freedy Armadie husat bilong Wes Papua.

Tupela kalabus brukaut i kamap long Indipendens wiken. Wanpela long Baisu insait long Westen Hailans na narapela long Buimo insait long Morobe provins.

Tupela man i ronawe long Baisu haus kalabus tasol wanpeal ol sutim em na arapela kisim bagarap na ol i kisim em i go bek long sel.

Long Lae, ol wada holim pasim 13-pela man tasol 3-pela tasol i ronawe. Ol i bilip olsem ol bai holim pasim ol dispela tripela man klostu.

Wok bung long rausim famili hevi

PEKU PILIMBO i raitim

OLGETA sosel wokas grup i bin kamap wantaim long wanpela wok-sop las wik long toktok long birua pasin we save kamap long ol meri pikinini.

Famili Violence Action Komiti (FVAC) i bungim olgeta manmeri long toksave olsem birua logn amili i save stapim planti maam pikinini long stap amamas.

Ol i tok dispela i save pretim ol na ol i no mekim gutpela wok

bilong helpim na developim dispela kantri.

FVAC i tingting long wok strong long stapim hevi pait, mekim pasin nogut na kamapim tingting nogut long wanpela memba bilong famili.

Ol i tok planti taim ol man i save strong na mekim nogut long ol meri na pikinini na planti bilong ol iu no save stap gut.

Bikepla tingting bilong ol em long wok bung wantaim gavman dipatmen na narapela ogenaisesen husat laik stapim hevi i kamap. Ol bai wok strong

long givim helpim long ol lain husat painim birua na wankain taim tok strng wantaim gavman long kamapim lo bilong helpim.

Painim helpim long traim kamapim ol plen i stap pinis na bungim olgeta toksave long wanem kain hevi i stap pinis, rausim ol dispela kain tok na putim long pabnluk bai ol manmeri i no ken mekim moa.

FVAC i tingting olsem sapos ol i stapim bilong paitim meri pikinini, mekim pasin nogut long ol na kamapim pret tingting i save stapim planti manmeri long wok hat na traim developim kantri.

Santu Ignatius skul bai kisim gret 11 na 12

SANTU Ignatius Sekonderi Skul namba wan skul long Sandaun provins we bai givim gret 11 na 12 stadi long ol sumatin.

Papamama, sumatin, tisa na ol pipel bilong Aitape i bung na amamas aste long kisim ksul we ol i stretim gut tru long en.

AusAID i bin stap bihain long stretim dispela skul taim em i sapotim Edukesen Rifom Program bilong PNG gavman wantaim ol samting em stretim long planti ol narapela hais skul long kantri tu.

Dispela tingting i laik kamapim moa gret 11 na 12 insait long kantri na tu givim sans long planti sumatin i ken kisim skul.

Deputi Hai Komisaris bilong Australia Nicholas Coppel i tok edukesen em wanpela namba wan hap Australia i wok long givim helpim bikos edukesen bai developim dispela kantri.

Australia i givim skul ya K9 milien long baim ol samting olsem tebol, sia, desk, opis, klas-

rum na planti arapela.

"Dispela i min olsem ol sumatin bilong wanem hap long Sandaun i ken nau pinisim gret 11 na 12 bilong ol insait long Sandaun yet," Mista Coppel i tok.

Seketeri bilong Dipatmen bilong Edukesen Peter Baki i tok amamas long helpim Australia i wok long givim long Edukesen na dispela sapot inap helpim PNG long sanap klostu wantaim

na kam wantaim papamama na pren bilong ol long dispela bung.

Lida bilong ol sumatin John Yaka i tok amamas long AusAID i givim helpim olgeta taim.

"Dispela ol samting bai helpim mipela na husat narapela sumatin i kam bihain long mipela," em i tok.

Planti pipel bilong Australia i laik ol pipel i yusim wanem samting ol i givim long helpim na

"Dispela i min olsem ol sumatin bilong wanem hap long Sandaun i ken nau pinisim gret 11 na 12 bilong ol insait long Sandaun yet." - Mista Coppel

Australia.

Santu Ignatius Skul bai stretim hevi bilong gret 11 na 12 sumatin insait long Sandaun provins yet.

Planti sumatin bilas tumbuna

developim dispela gutpela kantri bilong yumi.

Dispela helpim bai helpim ol yangpela long kirapim na developim kantri bilong ol yet.



Dipatmen bilong Sosel Welfea na Developmen

Tok Sori

Dipatmen bilong Sosel Welfea na Developmen i autim bikpela tok sori long dai bilong Profesa Otto Nekitel, wanpela sinia saveman husat i save spesolais long olgeta tokples bilong PNG na Saut Pasifik na husat givim bikpela na long taim sevis i go long Yunivesiti bilong Papua Niugini. Dai bilong em i wanpela bikpela lus tru long Yunivesiti bilong Papua Niugini, dispela kantri, olgeta wanwok bilong em na bikpela tru olgeta famili memba bilong em.

Profesa Otto i hat wok na mekim planti hatwok tru long traim na lukautim olgeta kainkain pasin kastom bilong yumi long ol wok painim aut em i mekim. Ol wok painimaut na wanem samting em i raitim long buk long kainkain tokples bilong Papua Niugini bai stap wantaim mipela longpela taim tru.

Long makim maus bilong Minista Honorabel William Ebenosi na wok manmeri bilong em long Dipatmen bilong Sosel Welfea na Developmen, mi salim bikpela tok sori bilong mipela i go long meri bilong em Gertrude na ol pikinini Judith, Danny, Alan, Carol na Joshua na ol wan-tok.

Mipela olgeta i stap wantaim yupela long dispela taim bilong sori na prea strong long God, Bikpela Papa bai blesim na givim bel isi long ol famili bilong em.

Joseph Sukwianomb
Seketeri



SAUTEN



RIJON



Koiari pipel kisim helpim

PIPEL bilong Koiari i ken amamas olsem ol bai groim gutpela gaden kaikai bihain long ol i kisim helpim i kam long Australia Voluntia Intenesenel (AVI).

Koiari Holdings i sainim tok orait pinis las wik wantaim AVI na AVI bai salim wanpela bikpela saveman bilong agrikalsa husat bai kam stap wantaim ol KOiari pipel.

Man ya em long Sandy Lawson bai wok olsem wanpela komyuniti developmen woka insait long tupela yia olgeta. Em bai kamap long kantri neks mun.

AVI i bin helpim PNG long moa long 40 yia olgeta tasol dispela em namba wan taim bilong ol long wok wantaim ol Koiari.

Mista Lawson i gat save long stap wantaim ol komyuniti winim 30 yia na insait long 20 yia em i wok

olsem wanpela agrikalsa, forestri na komyuniti developmen opisal.

Wankain taim AVI i tok orait long kamapim wanpela progrem bilong helpim ol yang-

pela bilong Koiari.

Ol bai helpim ol yangpela long traim kamapim wok we inap helpim ol yet.

Koiari developmen Atoriti i askim na kisim ol dispela helpim i kam

insait long komyuniti.

Ol narapela komyuniti insait long kantri husat i gat tingting long kisim helpim bilong ol save man i ken rait tasol na askim long helpim.

Salvesen ami skul kamap bikpela

PAPAMAMA na ol pren i kamap long lukim Boroko Salvesen Ami skul taim ol opim las wik AusAID aninit long

PNG Insentiv Fan bilong em i bin givim helpim kamapim ol senis olsem 10-pela nupela klasrum, wanpela toilet, opis na

opis bilong edmin-istreta.

Mani inap long K1.3 milien i kam long AusAID bai ol dispela wok i ken kamap.

Skul nau i orait logn kisim elementri i go inap long gret 6 na lukluk nau kisim gret 7 na 8 long ol yia i kam.

Ol opisal bilong AusAID i stap long dispela bung na givim tok olsem AusAID i laikim ol pipel i stapo isnait long developmen bilong kantri na i ken kisim helpim long AusAID tu.

Skul ya i bin stat long 1960 na stat long 1999, moa long 300 sumatin i stap logn dispeal skul.

Ol sumatin bilong skul yet i putim kamapim ol pilai long amamas ol manmeri husat go lukim.



Jack and Jill sumatin soim kain kain bilas bilong kantri

• Ol kalsa na kastom i narapela kain tasol ol i bilong PNG... em i toktok bilong ol dispela sumatin bilong Jack and Jill pri-skul taim ol i amamasim Independens.

Plis bai kamapim kempen long PMV

PEKU PILIMBO i raitim

PLIS bai kamapim wanpela kempen long toksave long tupela sait bilong ronim PMV bisnis long Pot Mosbi siti.

Planti bas bisnis i no ron gut na planti wok manmeri husat i laik go wok i painim hat na save kamap let long wok.

Plis i sutim tok olsem asua i stap long papa bilong ol ka

olsem PMV bas we i nogat gutpela pepa bilong ron long pablik rot.

Ekting Sif Superintenden bilong Nesenel Kapitel Distrik na Sentrel plis provins Emmanuel Hela i tok plis i wok long kamapim rot blok long sekim ol stil ka na tu ka we inap kamapim birua long pablik rot.

Planti manmeri husat slip olsem long Morauta na Gerehu i kisim taim bikos taim plis blokim rot, ol bas we i nogat o draiva nogat

pepa i no save ron. Dispela i mekim na planti manmeri husat save yusim bas olgeta moning i save kisim taim.

"Mipela plis bai kamapim edukesen kempen na ol draiva i ken save na askim mipela wanem samting ol i paul long en," em i tok.

Em i tok plis i stap bilong helpim ol manmeri na ol i no ken lukim ol plisman olsem sampela lain bilong stapim ka nating.

Supirintenden Hela i tok em i save taim nogut na planti

man i nogat mani long stretim pepa bilong ka na tu fiksim ka tasol dispela i no givim rait long ol i draiv raun long ol pablik rot. Kainkain birua inap kamap na bagarapim ol manmeri nating.

Em i tok planti plisman husat sanap blokim rot i save paulim ol draiva na kisim spot fain na yusim nabaut. Em i askim ol manmeri husat i lukim dispela kain pasin long ripot long em yet.

Em i tok olgeta plisman i save kisim toksave long ol i mas mekim gutpela wok na no ken paulim ol manmeri.

Tasol planti PMV bas draiva i sutim tok olsem ol plisman i save kisim na holim nating PMV draiving laisens bilong ol.

Ol i tok planti taim ol plisman i save laikim ol draiva givim smok buai mani pastaim.

Tasol bos bilong ol plis, Mista Hela i tok ol bas draiva i mas kisim nem na ripotim

dispela kain pasin long ol bik bos bilong plis.

Ol draiva i save taim wanpela plisman i kisim laisens i go long haus olsem em i mas laikim sampela liklik mani nabaut.

"Planti kon men plisman i stap long rot. Ripotim ol long plis stesen na mi yet bai stretim toktok wantaim ol," Mista Hela i tok.

Ol manmeri i taitim wok-about long planti hap bilong siti taim, bas i pret long plis kisim ol.

Groseri Spesol

BOROKO FOODWORLD AT GORDONS

Butsa Shop Spesol!

Roots Rice 10 kg	K15.22
Steele Steel Wool 5's	K1.49
Cold Power 200gr	K1.57
Sunsilk Shampoo 100ml	K1.66
Cosifits Nappies	K11.70
Diana Tuna in Oil 380gr	K2.42
Globe Corned Beef 200g	K1.77
Sunshine Milk 2x200 + free pencil case	K3.75
Fresh Toothpaste 70g	K0.96t
Dazzle Bleach 125ml	K2.93
Modess Adhesive 10's	K2.99
Maggi Noodles 85gr	K0.55t

Ol Spesol bilong dispela Wik!

Zenag Soup Pieces 700gr	K2.89
Zenag Kai Kai 900gr	K5.90
Zenag 2 pack 2kg	K12.98
Beef Sausages per kg	K6.95
Pork Sausages per kg	K6.95
Saveloys per kg	K5.49

EXTENDED TRADING HOURS
Monday to Wednesday - 8.00am to 7.30pm
Thursday / Friday - 8.00am to 7.30pm
Saturday / Sunday - 8.00am to 7.30pm

Hamamas na baim kaikai long Boroko Foodworld Gordons!

Planti moa kaikai prais i go daun long en!
Ph: 325 7566, 325 7310 Fax: 325 7096



HAILANS NUIS



Wingti noken mekim planti toktok

WANPELA bipo kaunsil presiden na lidaman bilong ples 'ong Loa Nebilia long Westen Hailans provins i tok strong long bipo praim minista na lida bilong Pipel's Demokretik Muvmen (PDM) Paias Wingti i mas tokaut klia long wanem sit em i laik sanap long neks yia ileksen.

Dispela man em Wagui Wak na em laik save bikos em i tok Mista Wingti i bin lusim politik na stap isi tasol na ol pipel i no save long wanem kain tingting em i gat long neks yia.

I gat bilip olsem Mista Wingti i laik resis long

Rijinel Sit-em Gavana Pater Robert Lak i stap nau.

Mista Wak i mekim dispela toktok bihain long nupela rijinel kandidate David Opa i toktok long Mista Wingti i mas lusim dispela risis bilong neks yia ileksen na larim ol yangpela man i tra'im sanap.

"Dispela kain we bilong go raun nabaut na kolim nem bilong wanwan lain na stapim ol pipel long votim man em i no pasin bilong Mista Wingti," Mista Wak i tok.

"Papua Niugini em i wanpela demokretik kantri na ol pipel i gat

rait long mekim disisen bilong ol yet long wanem kain lida ol yet i laik makim na ol lida i noken givim tingting na toktok long paulim tingting bilong ol," em i tok.

Mista Wak i tok ol pipel i gat rait bilong ol yet na ol i ken soim rait bilong ol taim ol i vot long neks yia na maski long ol man i mekim

planti toktok nabaut.

Em i tok ol pipel long Westen Hailans i no longlong lain na ol i save gut long we bilong politik.

Ol pipel i save long wanem as nogat ol sevis i go long ol distrik na ol i save stap na dispela kain pasin bilong mekim kainkain toktok i no gupela.

Em i tok yet olsem ol kandidate husat i laik sanap long neks yia mas noken toktok long rong bilong narapela o mekim kain toktok we ol i ting olsem ol i ken mekim senis bikos ol pipel i save pinis long wanem kain lain ol i laik votim.

Narapela lidaman tu Mista David Opa i bin

mekim kain toktok tu long Mista Wingti i noken mekim planti toktok long paulim ol pipel bikos ol i no laikim Mista Wingti na em yet i save long dispela.

Ol pipel i no bin laikim em olsem na em i no bin win long 1997 ileksen.

Mista Opa i bin tok

Gavana Pater Robert Lak wantaim Mista Wingti i save egensim tupela yet long sampela kain disisen we i save kamap long provins olsem na provins i wok long kisim taim nogut tru.

Nau long dispela ileksen neks yia ol pipel yet i ken mekim disisen bilong ol yet.

Luteren yut long PNG bung long Asaroka

WANPELA bikpela lotu bung bai kamap long Asaroka Hai Skul long Septemba 23 i go 28.

Dispela bung em bilong ol yut bilong Luteren Sios bilong Papua Niugini (ELC-PNG) na Het Bisop Dokta Wesley Kigasung bai opim dispela bung long Sande, Septemba de 23 em long dispela wiken.

Long Mande neks wik bai progrem i stat wantaim Baibel stadi antap long bikpela het toktok bilong yut konfrans: God i gat tok long laip, taim na wok bilong mi.

Bai ol yut i bruk i go insait long ol liklik grup long mekim bung toktok long kisim tingting bilong narapela long wanem kain samting ol i laik mekim.

Ol bai toktok long ol problem na hevi we i save kamap long kantri tu. Bai ol toktok long ol dispela samting bikos ol yut i lida bilong bihain na dispela kain toktok bai helpim tingting bilong ol long tra'im kamap wantaim ol kristeh we em God i laik bai mipela i ken stretim ol hevi i kamap long kantri.

Ol bikman husat bai kam long dispela bung em Minista bilong Sosol Welfea Dvelopmen, Gavana bilong Isten Hailans Peti Lafanama, Gavana bilong Morobe Luther Wenge, Provinsal Plis Komanda na wanpela mausman bilong AIDS aweanes komiti tu bai kam long toktok long ol yut husat i kam long bung.

Ol dispela bikman bai toktok long wanem kain samting we ol yut i ken save long strongim komyuniti bilong ol na bai ol yut i ken mekim wanem kain wok long helpim kantri long kamapim gupela sindaun stat long famili, komyuniti, distrik, provins na bihain ol i ken helpim kantri tru.

Tupela yangpela yut tu bilong Amerika tu bai kam na givim toktok long wanem kain ol wok ol yut long ples bilong tupela i save mekim long helpim ol yet.

Tupela bai lukluk tasol long wanem samting bai kamap long Asaroka na bai tupela i givim toktok long kain wok i save kamap long Amerika.

Narapela bikman husat bai kam tu em Dokta Philip Haunstein bilong ELC long Jemani. Dokta Philip i save mekim planti wok wantaim ol yut long Jemani.

Long Trinde Septemba 26 bai Dokta Musawe Sinebare husat i Pro-Vais Sansela bilong Goroka Yunivesiti bai givim sampela toktok bilong em i go long ol yut tu.

Ol lain bilong Niugini Ailans, Papua, Momase na Hailans bai kam long dispela bikpela bung.

ELC yut kodineta Saen Mileng i tok ol i gat bilip olsem moa long 1,000 yut bai kam long dispela bung.

Em i tok ol i toksave long ol distrik i salim mak long 40 yut wantaim was papamama bilong ol tasol i luk olsem namba i wok long go antap yet.

Fi bilong wanwan lain husat i laik kam long dispela bung em K12.

Dispela bikpela bung bai kamap long taim bilong skul holidi na Asaroka skul i givim olgeta ples long ol lain bilong konfrans i ken yusim.

Mista Mileng i tok ol skul studen husat i stap long holidi tu i ken kam long dispela bikpela bung na kisim helpim na gupela toktok bai ol spika i givim.



EUROPEAN UNION OVERSEAS POST GRADUATE SCHOLARSHIPS 2002

The European Union (EU), through the Human Resource Development Programme, finances scholarships for Papua New Guineans for postgraduate study in any of the fifteen member states of the European Union or in an African, Caribbean or Pacific (ACP) state that is a signatory to the Lome IV Convention (such as Fiji, Botswana, Mauritius or Jamaica).

Some 20 such scholarships (preferably 10 each from the public and private sector; preferably for 10 males and 10 females) will be awarded for courses commencing during 2002. Applicants should normally be under 40 and the scholarship programme is for postgraduate studies lasting up to a maximum of two years.

Scholarship applications are now invited. Women are especially invited to apply; companies and departments are called upon to put forward as many female and male candidates.

Interested persons or their employers should obtain the Expression of Interest and One-Page Statement Forms from:

**Mrs. Vienna Alewa, HRDP II-PIU
Department of Education
5th Floor, FinCorp Haus, Waigani**

Telephone: 301 3574

Facsimile: 301 3468

e-mail: vienna_alewa@education.gov.pg

to whom the completed forms should be returned by 31 January 2002.



MADANG NIUS



Ol yut nogat wok kamapim raskol pasin

WILLIAM NATERA i raitim

PLANTI ol raskol pasin i wok long kamap long Madang bikos planti ol lain bilong narapela provins i wok long kamap stap long Madang na tu ol yut i nogat wok na raskol pasin i go bikipela.

Dispela em tingting bilong planti ol lain husat i save stap long Madang long wok na ol lain asples tu i givim wankain toktok.

Jubilee Dulau em i wanpela sosol woka long Madang Provinsal Gavman na em i tok dispela kain raskol pasin em i no save lukim bipo.

Em i tok em na famili bilong em i stap long Madang stat long 1983. Dispela taim raskol pasin i no bikipela na tu wanwan raskol pasin i save kamap tasol em i save kamap long nait tasol.

Misis Dulau i tok nau long dispela taim stilim ka olgeta taim na tu ol i wok long brukim ol haus

i go insait na stilim ol samting bilong ol lain.

Em i tok pastaim tru dispela kain stil pasin i save kamap long nait taim tasol nau ol raskol i brukim haus long san na stil.

Misis Dulau i gat bilip olsem ol bisnis i wok long go bikipela na planti lain ausait long provins tu i kam pulap nating long Madang olsem na raskol pasin i go bikipela tru.

Nesenel Kot Stet Prosekuta long Madang, Michael Ruari i tok raskol pasin i wok long go antap bikos ol yut long provins i nogat wok.

Em i tok ol yangpela lain i nogat we long painim wok na dispela i mekim ol i nogat mani na taim ol i nogat mani ol i mekim dispela kain raskol pasin long ol i ken stap laip.

Mista Ruari i tok sampela raskol pasin i save kamap nating nating na ol i no save plenim.

Em i givim tok piksa olsem sampela taim

wanpela man i ken dring bia na spak nogut tru na statim pait na dispela kain pait em wanpela man i ken kilim narapela.

Na taim wanpela man i kilim narapela man em i mas go long kot bikos em i save olsem em i mekim rong pinis.

Mista Ruari i tok yet olsem namba bilong ol lain i stap long go long kot i stap long mak long 30 na 40 na dispela i bikipela namba tru na i no olsem bipo.

Wok bilong Komyuniti Plising Komiti em Inspekta James Kupi i wok long go pas i mekim bikipela aweanes kempein long traim

stapim raskol pasin long go bikipela long dispela provins we planti i save tok i gutpela tru.

Mista Kupi i bin mekim wanpela ripot na i presenim i go long taim ol memba bilong komiti i bin bung na em i tok raskol pasin i go antap 9 pesen.

Em i tok yet olsem kantri i gat planti mani mekim hevi bilong painim wok na kisim mani i hat tru long ol yut bilong provins na kantri.

Dispela komyuniti polising i bin stat long mun Me na kisim planti sapot tru i kam long komyuniti long Madang.

Famili kisim helpim long tupela ejensi

TUPELA dona ejensi tasol i givim helpim long ol lain long Aketa viles long Bogia husat paia i bin kukim haus bilong ol.

Ol lain husat i kisim taim tru long dispela hevi i lusim 18-pela haus olgeta na wanpela tred stoa.

Paia i stat taim tupela liklik boi i laik mekim paia long wanpela liklik gaden em tupela i bin plen long mekim. Paia i stat hariap tru na wok long join i go long olgeta haus na ol haus i paia bikos i hat tumas long kilim paia i dai.

Madang Imejensi na



• Bernard Mollok i kisim sampela samting bilong helpim ol pipel bilong em husat i bin kisim bagarap long paia tasol ol i nidim moa helpim long statim gutpela sindaun gen.

Disasta klak Vinatius Usul i tok Madang Disasta na Imejensi i givim 15 tamiok, 10 busmen so na 9 busnafi long ol husat i kisim taim long haus bilong ol i paia.

Mista Usul i tok Madang Red Kros i givim sikpela set sospen, 9-pela miks bek klos nabaut na faivpela set blenket.

Em i tok opis bilong em i no save long amas samting i go long ol pipel tasol helpim i go yet long ol trangu lain. Disasta opis long Mosbi tu i bin givim sampela samting

tu tasol ol i salim i go stret long Bogia Open memba Bernard Mollok.

Ol trangu lain i yusim 18-pela sel haus tasol long lukautim ol yet long dispela taim na ol i nidim moa helpim. Dispela ol sel haus i no bilong ol long silip olgeta na ol i nidim moa helpim long mekim nupela haus bilong ol.


Mista Usul i tok provinsal disasta opis i bin askim helpim long ol sios na bisnis haus tasol nogat helpim i kam long ol.

Ol i bin salim askim long helpim i go long ol tasol nogat wanpela i toktok long givim helpim na ol i wet yet i stap.

Taim nogut i save kamap long Madang planti helpim i save kamap long ol bisnis na sios tasol dispela ol trangu bai wet yet long helpim.

Singaut long kisim helpim i stap yet na disasta opis i wet long ol lain i kam na toksave long wanem kain samting ol i laik givim o mekim long helpim.

Nau yet bai ol i wet na silip i stap long sel haus bilong ol inap kain taim we ol i ken go bek na mekim ol nupela haus na statim laip bilong ol



• Wokman bilong HPL i solim hap bilong wok maining long Kurumbakari bai kamap long em.

Madang nogat mani long holim so nabaut

MADANG festival em ol i save holim long wanwan yia em ol i stapim gen long dispela yia.

Ektng edministresen

opisa bilong Madang Kalsarel Beuro (MCB), Alice Malauling i tok Madang provinsal gavman (MPG) i nogat mani na provinsal gav-

JAIVE SMARE i raitim

man tasol i save givim mani long sapotim dispela festival.

Mis Malauling i tok MPG i bin sot long mani long sampela yia i go pinis na i wok long painim hat tru long fandim dispela festival long dispela yia.gen.

Long dispela as tasol ol festival i bin stap long 1998 na ol i wok long kamapim mask festival tasol long 1999 na yia 2000.

Mis Malauling i tok tu olsem i gat toktok olsem PNG Ats na Kalsarel Festival bai kamap long Novemba 17 tasol opis bilong em i no kisim konfemesen yet long dispela.

Divain Wod

Yunivesiti (DWU) i bin holim Kalsarel De bilong em long Septemba de 8 na planti lain tru i bin kam na bung na amamas bikos nogat narapela kain taim olsem i bai kamap long Madang.

Madang em ples bilong kain kalsarel bung tasol taim ol i stapim i luk olsem Divain Wod i bai mekim bikipela so long makim olgeta so na festival we i stap.

Siaman bilong DWU so komiti Joe Kewere i tok dispela tingting bilong mekim de bilong DWU kamap bikipela so i winim so we i save kamap long DWU yet.

Em i tok sapos ol i plen long mekim so long DWU kamap bikipela bai ol i nidim

moa mani long mekim.

Mista Kewere i tok tu olsem ol mas mekim plen long bringim ol singsing grup bilong ol narapela provins tu i mas kam long so na dispela bai nidim planti moa mani.

Em i tok yet olsem MCB i mas go pas long promotim kain samting olsem DWU kalsarel so we i save kamap long provins long kisim moa sapot i kam long ol bisnis haus na pipel long provins.

Em i tok olsem bai moa gutpela sapos Nesenel Kalsarel Komisen i ken putir dispela bikipela d bilong DWU olser wanpela bikipela d long kalenda bilor em.

Papua Niugini Asosiesen Inkopresen Act Toksave bilong tingting long aplai long bungim na kamapim wanpela Asosiesen

Mi, Philip Pepela bilong Angore Risos Onas Asosiesen, P O Box 7670 Boroko na P O Box 16 Tari wantaim telepon namba 540 8080, husat ol komiti tok orait olsem mi Philip Pepela givim tok save olsem mi laik aplai long bungim dispela asosiesen aninit long Asosiesen Inkopresen Act.

Aninit em ol toktok we i givim mipela save na rait long bungim grup olsem lo i tok aninit long seksen 2 bilong Act:

a) Asosiesen i laik kamap wantaim ol dispela tingting:

a.1 Long luksave olsem olgeta memba i kisim helpim long asosiesen.

a.2 Long luksave na kamapim ol viles we stap klostu long oil na ges eria bai ken kisim helpim long kainkain developmen we i kamap.

a.3 Long luksave na kamapim ol sevis olsem edukesen, helt na arapela sosel sevis ol givim i mas kamap long olgeta pipel bilong komyuniti.

a.4 Luksave na kamapim gutpela sindaun namel long ol papagraun, ol lida long komyuniti, Provinsal Gavman, Nesenel Gavman na ol kampani husat developim projek.

a.5 Long luksave na stretim olgeta bel kol pasin na kros namel long tupela sail wantaim sapos wanpela birua o hevi i kamap.

a.6 Luksave na promotim gutpela sindaun na luksave long wanem samting ol i laik insait long komyuniti.

a.7 Long luksave na toktok bung wantaim long kisim helpim bilong developmen i kam long komyuniti.

b) Asosiesen bai yusim ol profit (sapos sampela i kamap) o sapos kisim narapela mani i kam insait bai traim karim aut wanem tingting mipela putim antap.

c) Asosiesen bai i no inap peim wanpela win mani i go long wanpela memba bilong grup. Dispela em i tambu tru.

Dispela toksave pepa i kisim tok orait pinis long Rejistra bilong Kampani.

Date30 May 2001

Skolasip Aplikesen

i stap redi nau bilong ol manmeri wantaim:

- Sampela bagarap long bodi.
- Husat wok nau wantaim o manmeri husat helpim Disable Sosaiti.

Moa toksave na aplikesen fom i stap redi long lokal Service Providers o Friends of the Disabled.

Telefon/ Fex: 325 0414

Lae Nius



Wimens grup bilong Morobe amamas long woksop

OL MAMA grup long Morobe provins las wik i go pinis i bin pin-isim wanpela woksop bilong lukautim na menesim mani bilong mama grup na ol arapela wok bisnis bilong ol mama tu.

Woksop bin kamap long Bundun Lutheran konfrens senta long Mumeng, rot i go long Bulolo Wau.

Presiden meri i go pas long Morobe provins, Misis Anike Gart i bin tokim wantok olsem dispela em pestaim kain woksop bin kamap we CDS (Komyunti Developmen Skim) long Momase rijen opis long Madang i bin salim ol opisa long

kam kamapim dispela woksop.

Tu CDS opis i bin givim sapot long helpim dispela woksop wantaim K4,800 long ranim woksop i go ina long pinis bilong em.

Dispela em namba wan taim bilong kain woksop long kamap olsem na ol hetmeri o wimens lida tasol i kamap.

Misis Gart i tok tu olsem bihain long arapela woksop kamap bai mi inap salim tok long ol olgeta wimens grup insait long ol 9-pela distrik long ol mama i ken kam na stap insait long dispela wankain woksop gen.

• Mista Saonu wantaim Mista Wenge na ol Wemasam lidas na Seko LLG opisas sanap long fran bilong nupela paris opis long Takngawe ples. Baksait em haus lotu. Mr Saonu i bin givim mani long bildim dispela haus lotu long 1995.

Saonu tok amamas long pipel i helpim ol yet

HATWOK na pen i save kamapim gutnius long ol manmeri. Dispela em toktok bilong memba bilong Kabwum. Ginson Saonu long Tankngawe ples taim ol i opim paris opis bilong ol long stat bilong dispela mun Septemba.

Takngawe paris i karamapim Nimba, Takngawe, Zagan na Kumbip ples insait long Seko Lokol Level Gavman Kaunsil eria na i stap long boda bilong Tewae Siassi na Kabwum distrik.

Mista Saonu i tokim ol pipel olsem gutnius na amamas i save i stap insait long pen na hatwok bilong ol man na meri.

Dispela paris opening de em wanpela gutnius na amamas de em yupela pipel yet i hatwok, pilim pen na mekim na mipela olgeta i kam long witnesim. Na dispela em gutpela piksa bilong ol pipel yet i helpim ol yet na i no wetim memba o gavman long wokim.

Olsem na yupela ol manmeri yet em gut-

nius. Mipela ol lida i kam bilong witnesim na serim dispela gutnius.

Mista Saonu i tokim ol pipel tu olsem wanem helpim kaunsil o memba o gavman o distrik i givim em ol pipel i mas luksave olsem dispela em helpim i kam long gavman. Olgeta gavman lida long wanwan level bilong wok, mipela olgeta i serim wanpela manmeri tasol em yupela ol pipel. Sapos wanpela i no givim na narapela i givim em olsem olgeta i givim.

Ol Hiden Veli papagraun kisim skul long Kurumbukari papagraun

BEN TAUMAI i raitim

SIAMAN bilong Nakuwi Lenona Asosiesen long Wau Hidden Veli gol main, Rex Mari na eksekutiv menesa bilong Morobe Gold Limited Peter Bernard i tok olsem ol i lainim planti samting pinis long Madang long dispela edukesen raun ol i mekim i go long Madang.

Dispela edukesen raun ya inap kisim ol i go long Kumbukari main sait tasol bikos long rot i bagarap ol i go tasol long Basamuk na long sem taim tu ol kisim sampela ol toktok skul long wanem samting olgeta smolholda i mekim pinis.

Wokabout bilong ol ya em ol i mekim long las wik.

Mari na Bernard i mekim dispela toktok long wanpela pati ol holim long Jais Aben Resort. Mari husat bin holim wok olsem siaman bilong asosiesen long 18 krismas olgeta i tok em bilip olgeta lain bilong em tu i amamas long wanem samting ol i lukim na lainim na ol i tok ol bai yusim sampela save na tingting ol kisim pinis long wok bilong ol.

Em gutpela tru long wanem mipela lainim planti samting tru na mipela laikim olsem dispela kain wok poroman i mas go het yet long wanem dispela tupela main ya Kurumbukari na Hidden Valley bai holim tru dispela kantri na provins na rijn long bihain taim long Ok Tedi i pas.

Mari tok klostu taim bai em risain long sanap long 2002 Nesenel lleksen na em laik surukim invaitesen bilong em long ol eksekutiv bilong aples kampani na Madang Provincial Gavman na tu Highlands Pacific long mas mekim wanpela raun bilong ol i go long Wau long lukim main long hap.

Bernard tu i amamas long lukim gutpela wok kamap long ol Lenona Asosiesen, provinsal gavman na Highlands Pacific olsem na em tok ol bai taim mekim wankain long hap.

Eking Provincial Edministresen Galum Kassas em i tu bilip olsem ol lainim planti samting na em askim ol long stretim ol hevi long taim bilong toktok wantaim ol sampela gutpela rot na i noken kros nabaut.

Kolta i bruk bruk long Lae na Umsis rot

YAKAM KELO i raitim

BIKPEL A rot bilong nesanel gavman namel long Lae na Umsis i bagarap nogut tru na i no gutpela moa long ol kampani ka, ol pmv na ol pasindia i ron long en.

Dispela rot i go olsem long Wau Bulolo rot we ol graun i bruk bruk nabaut na ol bikpela hul i pulap long rot.

Wantok i bin ron long dispela rot long 1999 na long las mun, 2001 em i ron gen na luksave olsem dispela rot i nogat mentenens o wok i kamap long stretim klostu tripela krismas olgeta nau.

Ol pasindia i save ron gut long Wau Bulolo i kam long Lae na taim PMV i kamap stret long Woks kem long Umsis, ol i save statim komplem. Sampela bai singaut, rot bilong gavman o bus rot? Sampela i save tok, taim bilong lleksen i kam, noken votim wanpela man bikos ol bai giaman tasol na i no inap stretim rot bilong yumi.

Arapela i tok, sapos wanpela sikman i ron long dispela rot, em bai dai nating tasol. Arapela i tok, yumi i save kalap kalap olgeta taim na ol bun na mit bilong yumi i bruk nabaut pinis na yumi bai kisim

ol bikpela sik bihain. Dispela em ol kain kain toktok ol manmeri i save mekim antap long pmv taim ol i kamap long dispela hap rot nogut.

Dispela hap rot i olsem 5 o 6 kilomita lusim 9 Mail long Lae na bihainim Wau Bulolo rot i go aut. Dispela hap rot tasol i save holim taim bilong ol ka we 1 aua olgeta i save lus long ron long dispela hap kalap kalap rot. Sapos hap rot ya i gutpela, ol ka inap ron gut tru long 20 minit samting.

Planti ples lain i save go kamap long ples bilong ol long nait taim ol i pinis long Lae maket na go bek. Long moning tu, planti i save kamap long 9 o 10 kilok long Lae maket na ol i no save gat inap taim long salim gut ol kaikai bilong ol long maket. Dispela em i wanpela sori samting tru long ol turangu manmeri bilong ples bikos maket em wanpela bikpela samting we ol i save kisim strong long em olgeta de long painim mani bilong famili.

Wantok i bin ron long dispela hap rot long las mun we em i save slip long ples na go long wok long Lae na sampela taim pinis wok na go long ples long apinun na i luksave tru long dispela rot.

Wanpela sios lida bilong Mumeng, Mark Sasa i tok dis-

pela em wanpela bikpela wari bilong ol pipel bilong ples bikos dispela em bikpela rot bilong ol ples lain i go long Lae siti long baim kago bilong stua, baim ol samting long stua, salim ol kaikai long maket, go lukim gavman o sios long ol sampela wok na hevi bilong ples, na planti arapela wok samting ol ples lain i laikim we i stap long Lae siti.

Mista Sasa i tok gavman i mas sori long ol pipel bilong Wau Bulolo na stretim dispela rot bikos dispela rot tasol i bin stap na kamapim planti samting bilong Papua Niugini long bipo.

Mista Sasa i tok Wau Bulolo i bin namba wan hap bilong Papua Niugini long pulim mani i kam long kantri wantaim ol gol na timba bilong em. Olsem na gavman i mas tingim dispela na stretim rot bilong Wau Bulolo na mekim i stap gutpela. Dispela em long tok amamas long wanem gutpela samting Wau Bulolo i bin mekim bipo long helpim kantri olgeta.

Gavana bilong Morobe Luther Wenge i bin hatim Minista bilong Woks na Trensport Alfred Pogo long dispela rot long palamen bung long mun Julai. Tasol Minista Pogo i tok sapos i gat mani bai em i lukluk insait long dis-

pela rot. Tasol dispela rot i no bagarap nau tasol long dispela yia 2001. Rot ya i bin bagarap long 1999 i kam inap nau na ol Woks Minista long pastaim i no bin skelim mani bilong stretim dispela hap rot na rot i bagarap olgeta i kam inap nau.

Dispela stori bilong Lae Umsis rot i wankain tu long ol bagarap long rot antap long Hailans. Planti tok pait i save kamap long haus palamen long gavman i mas stretim rot long hailans haiwe. Long las wik tasol ol bisnis na kampani long Goroka, Hagen na Lae i komplem nogut tru long hailans haiwe rot i bagarapim ol bikpela ka na bisnis bilong ol.

Wankain tu, ol kampani ka, ol papa bilong pmv na ol pasindia i save komplem nogut tru long dispela Lae Umsis rot we i bagarap inap tripela krismas nau.

Long las wik tasol Minista bilong Woks na Trensport Alfred Pogo i tokaut gen olsem gavman i nogat inap mani yet long stretim ol dispela hevi bilong rot insait long kantri. Olsem na ol dispela rot long Wau Bulolo, Hailans haiwe na long Sentrel provins bai stap sampela taim gen inap neks yia pastaim na wetim nupela baset bilong Woks na Trensport.



**MOROBE PROVINCE
AGRICULTURAL SOCIETY INC.**

i laik toksave long ol singsing grup bilong ples husat i tingting long stap insait long 2001 **Morobe So** Singsing olsem ol i mas rejista nau.

Ol registresen fom yu ken kisim long:
The Professional Real Estate Opis
5th St, Lae.

Olgeta registresen bai pas long
Oktoba 7th.

Fax: 472 5141 - Tel: 472 2887

Morobe So Singsing Tumbuna,
28 Oktoba

Morobe So
26th, 27th na 28th Oktoba




PAUA NEW GUINEA

Katolik rali kamap gut

PAULUS TALI i raitim

MOA long 250 katolik kristen i bin kam bung long Mumeng stesen long wanpela bikpela Katolik Kraismatik Rali long stat bilong mun Septemba.

Kodineta bilong dispela rali Mista Martin Wulying i tok planti ol yut we i save nogat wok long stap nating long ples i bin harim toktok olsem dispela bung bai kamap na ol i bin kam long kisim helpim na stapim pasin nogut bilong ol.

Tupela spika long rali em karismatik lida Ken Charles wantaim Patrick Railu i bin givim ol gutpela toktok we helpim long strongim bilip bilong ol kristen na tu ol lain husat i pasim bel bilong ol na ol i les long lotu tu i wok long kisim planti helpim na senis long dispela taim.

Ol lain bung i harim olsem long dispela taim we kantri i wok long bagarap na planti samting i kamap long wol i gutpela long ol kristen i mas sanap strong na noken

lusim lotu.

Taim hevi i kamap em wanpela rot tasol bilong kisim bel isi em long lotu na kisim gutpela sindaun.

Lotu pasin tasol inap long senisim laip bilong ol pipel bilong kantri long tingting gut na mekim kain pasin we Jisas Kraismatik tasol i laikim yumi mas mekim.

Plantu yut we i no save long pasin bilong lotu i kisim gutpela helpim na ol i harim tasol i stap na kisim tingting long senisim laip bilong ol.

Mista Wulying i tok sapos planti moa lain i senisim laip bilong ol na lotu orait em i plen long kamapim bikpela bung tru long neks yia we i winim ol dispela yia.

Pater George Duff i bin pasim lotu wantaim misa na i tok ol kristen i ken lusim bung wantaim bel isi tasol ol i mas stap strong yet long bilip bilong ol long Kraismatik Jisas.

Plantu yangpela i bin kam long bung pestaim i kisim planti helpim tru na ol i tok ol bai go aut long helpim ol narapela yut tu.

Katolik yut bilong Wabag daiosis holim rali

KATOLIK yut bilong daiosis long Wabag i bin holim wanpela gutpela rali long Holi Spirit Pastorel Senta long de 20 i go 24 long las mun. Moa long 120 yut i bin kam wantaim ol was papa na mama bilong ol.

Ol yut i soim stret bikpela laik na amamas bilong ol long wokabout wantaim Jisas long dispela yia bilong Kraismatik Yut.

Yut Kodineta bilong daiosis Laurence Kimale i bin tok amamas tru olsem rali i bin kamap gutpela tru.

Bikpela samting we i kamap long reli em gospel singsing kompetisen we i lukim planti lain i mekim musik, singsing na givim biknem i go long God Papa.

Mista Kimale i tok ol i bin givim toksave long Redio. Enga i kam na rekodim ol singsing na program na bihain brokastim long ol yut husat i no bin kam long dispela bikpela bung.

Ol yut long dispela bung i bin kisim toktok tu long kainkain senis we i wok long kamap long kalsa, ol sosol na politik na tu ol aweanes long HIV/AIDS we i wok long bagarapim planti ol yut long kantri.

Na tu ol i no harim toktok tasol. Ol yut tu i bin gat sans long toktok long wanem kain samting we i save kamap long komyuniti bilong ol na tu wanem kain laip ol i stap bipo na nau ol i kamap olsem ol gutpela yut husat i putim lotu nambawan pasin long laip bilong ol.

Plantu yut i bin tokaut strong long tok bilong Pop Jon Pol II na ol i amamas long toktok Pop i mekim. Pop i bin tok olsem ol yut i presen bilong Holi Spirit long sios.

Dispela toktok i wok long mekim tingting bilong ol i strong long bihain kristen laip taim ol i stap yangpela yet.

Ol toktok ol i harim long bung i soim ol olsem Jisas Kraismatik i sin-

gautim ol long bihainim em na ol i gat bikpela salens long mekim gutpela wok insait long ples, famili na komyuniti bilong ol.

Bisop Arnold Arowae i autim tok long Baibel na i tokim ol yut olsem Kraismatik i gat wok long ol wanwan na i givim ol kain kain wok long mekim. Em i tok tu olsem ol yut i mas yusim gutpela presen bilong ol long mekim gutpela pasin na wok insait long ples, famili na komyuniti bilong ol.

Bisop Arnold i givim strongpela tu olsem bilip na laip bilong Kraismatik i no ken pinis tasol long yia bilong Kraismatik na Yut. Nogat. Em i tok dispela bilip na laip i mas go het yet.

Em i tokim ol yut olsem Jisas i singautim ol yut na ol i mas wokabout wantaim Jisas na givim witnes long em, maski taim bilong hevi, wari na traim.

Ol yut i kisim bikpela helpim tru long spirit bilong ol na ol i strongim bilip bilong ol

long stap strong long Jisas Kraismatik na bihainim em wanwan de.

Yabim distrik holim yut konfrens

ANANIT long het tok 'God i gat tok long laip, taim na wok bilong mi,' Luteran sios long Papua Niugini i wok long makim ol yut bilong sios long kam klostu long lotu na holim strong bilip bilong ol.

Asaroka long Goroka bai holim wanpela bikpela yut konfrens we bai i lukim olgeta yut long kantri bai kam bung long de 23 i go 28 long dispela mun (stori stap long pes 7) na bihain long dispela bai Yabim distrik long Finschafen long Lae bai holim yut bung

bilong em yet long de 1 bilong mun Oktoba i go de 7.

Ol yut long kain ples olsem Menyamyama, Aseki, Kaiapit na ol yut bilong Lae siti bai kam long ol.

Ol bikpela spika husat bai kam long givim toktok long ol yut em Nesenel Yut Kodineta Saen Mileng, Nawae MP Kennedy Wenge na Morobe gavana Luther Wenge.

Konfrens bai pinis long Sande de 7 bilong mun Oktoba na

singsing bai kamap.

Wanwan seket bai gat sans long bosim ol program long nait na olgeta lain bai wokbung long mekim lotu i kamap gut.

Yabim distrik yut kodineta Alung Bain i tok ol i plenim wanpela bikpela singsing long dispela taim.

Em i tok tu olsem ol yut i mas toktok wantaim ol seket lida bilong ol na givim ol fi nabaut long stretim rot bilong ol pastaim long ol i kam long bung.



• Gavana bilong Morobe Luther Wenge (namba tu long riathan) na narapela mamba Kennedy Wenge (lephan) bai toktok wantaim ol yangpela long yut konfrens.

ELC Papua bai holim konfrens

EVEJELIKEL Luteran Sios (ELC) bai holim wanpela bikpela konfrens bilong em long mun Oktoba de 4 i go 7 bai kamap long Gerehu, Mosbi.

Kirap Bek kongregesen long Gerehu i stap redi tasol long holim dispela bikpela bung.

Ol lain bai kam olsem long Kiunga, Tabubil, Kerema, Balimo, Alotau, Kep Rodney na ol lain insait long Mosbi siti tu bai bung wantaim olgeta dispela lain long lotu.

Kirap Bek kongregesen i tok amamas tasol long olgeta lain na ol i wet i stap long taim we olgeta lain bai kam long dispela bung.

Ol i tok olsem ol i amamas long bungim ol narapela kristen bilong rijen na lukim ol nupela pes na toktok wantaim long ol gutpela samting we Jisas Kraismatik i mekim long laip bilong ol.

Dispela em i namba 21 bung bilong ELC long Papua rijen na ol oganaisa i ting olsem mak long 2,000 lain manmeri bai kam long bung.

Siaman bilong Kirap Bek kongregesen Mista Nalau Nathan i tok wanpela gutpela singsing grup long Bulolo long Lae seket i kam stap pinis long Mosbi na i redi tasol long mekim ol singsing long taim bilong lotu.

Mista Nathan i tok ol lain husat i bai kam long ol

sios ausait long Mosbi bai lusim ples bilong ol long apinun long Trinde de 3 bilong mun Oktoba na moning long Fonde de 4.

Em i tok bai ol i stap redi tasol long welkamim ol nupela lain long lotu wantaim gutpela singsing na amamas.

Kirap Bek kongregesen i salim 26 aniveseri griting bilong ol i go long olgeta Luteran kongregesen insait long Papua Distrik na ol i tok ol i stap redi tasol long lukim ol taim ol i kam long lotu.

Dispela kain bung em taim we ol kristen i ken bung na kisim helpim long narapela na luksave long wanem kain gutpela pasin ol i mas mekim long sanap strong long kristen laip bilong ol.

Kain lotu olsem i save givim gutpela tingting long ol olupela kristen na ol i save go bek long ples bilong ol wantaim nupela tingting long stap strong yet long Jisas Kraismatik long taim bilong hevi.

Em i taim we ol kristen i ken bung na tokaut long wanem kain we ol i save bihainim long sanap strong na ol i ken kisim taim long tokaut long ol narapela kristen tu.

Ol i tok Bikpela Papa God i bai stap wantaim ol na bai ol i lukim ol long Oktoba taim ol i kam long Gerehu long lotu.

Ol lida i mas pretim God: Sir Silas

GAVANA Jenerel bilong Papua Niugini, Sir Silas Atopare i singaut long olgeta lida bilong kantri long ol i mas pretim God.

Sapos ol lida i gat dispela kain pret long God bai ol i mekim ol gutpela disisen we kantri bai kisim tru helpim.

Wantaim pret bilong Papa God bai ol lida i no inap mekim ol paul na nogut disisen bilong kantri.

PNG em i kristen kantri na i gutpela long ol lida i mas sanap long ol kristen bilip na ranim kantri bilong mipela.

Long 26 yia Independens selebren toktok bilong em i go long kantri, Sir Silas i tok ol lida i mas larim God Papa i stap insait long kantri long ol politiks na edministresen level bilong kantri.

"God i mas gat wanpela ples long ol eria bilong politiks na ol eria bilong gawman we planti disisen i save kamap," Sir Silas i tok.

Em i tok ol sios i wok long mekim planti gutpela wok long kantri na dispela wok bilong ol i mas go het na helpim kantri.

Sir Silas i tok ol pablik, yut grup, pablik

na praiwet sekta, sios, non gawman oganaisesen, grup bilong ol meri na olgeta sitisen na pipel insait long kantri i mas wokbung long mekim kantri i kamap gutpela.

Ol i mas traim long helpim gawman taim ol i wokbung long larim ol sevis i mas go long olgeta hap long kantri.

Em i tok mama lo bilong kantri i save helpim ol pipel long sanap strong long wanem samting ol i bilip long en na tu mama lo tasol i save helpim mipela long sanap strong long kristen bilip bilong mipela.



Song Bilong Bikpela De

Amamas na singaut long God, helpim bilong yumi. Singim song bilong litimapim nem bilong God bilong Jekop. Mi harim nek bilong wanpela man na mi no save em i nek bilong husat. Em i tok olsem, "Mi rausim pinis olgeta hevipele samting i stap long sol bilong yupela. Na mi larim yupela i putim ol basket bilong wok i go daun long graun. Taim yupela i gat bikpela hevi na yupela i singaut long mi, mi bin helpim yupela na yupela i stap gut. Mi stap long ples hait bilong mi namel long klaut i pairap na mi harim prea bilong yupela. Bipo yupela i stap long ol hul wara bilong Meriba na mi traim yupela. Ol manmeri bilong mi, mi laik givim strongpela tok long yupela.

Buk Song 81: 1, 6 - 8a.

Meri kilim man bilong em yet

WANPELA haus sik woka bilong Kundiawa haus sik long Simbu provins i bin kilim man bilong em i dai long independens de stret, plis i tok.

Ripot i kam long Kundiawa haus sik i tok meri ya em, Mary Kerenga. Em i gat ol bikpela pikinini pinis na em i bin spak na kamap long haus long 7 kilok apinun. Em i bin kros pastaim wantaim man bilong em pastaim na em i go dring spak na bihain kam bek long haus long apinun na sutim man bilong em wantaim naip. Man i dai em Peseke Kerenga na em i wanpela bikman bilong haus sik long Simbu provins. Em i bos bilong provinsal helt sevis.

Ripot long haus sik i tok meri ya i save wok wantaim akauns seksen bilong haus sik na em i bin dring spak wantaim wanpela sista na tupela i bin kamap wantaim taim meri ya i mekim dispela birua.

Ripot i tok tupela meri wantaim i stap nau long Kundiawa sel. Meri ya i gat ol bikpela pikinini we tupela i stap long sinia hai skul na wanpela i stap long hai skul.

Plis ripot i bin tok em i bin askim meri bilong em long wanem as na em i go

aut dring na kam bek long nait we em inap kam bek hariap long haus na go het long dringim bia bilong em.

Meri bilong em i go long haus kuk na kam bek wantaim naip we em i yusim, Suprintenden Simon Kauba, bos bilong Simbu plis i bin tok.

Mista Kauba i tok man ya wantaim meri bilong em i bin kros pastaim long de taim na meri i go aut wantaim sampela lain bilong em na ol i go dring raun.

Em i tok meri ya i kamap bek long haus long taim olsem hap pas 7 long nait wantaim narapela meri wanwok bilong em na kros i kamap. Narapela meri ya i spak tu.

Suprintenden Kauba i tok taim meri i kam wantaim naip, man bilong em i traim long ron i go ausait long haus tasol meri i go stret long em na sutim em wantaim naip long bros bilong em.

Ol wanwok i harim dispela nius na i no bilip bikos ol i ting dispela kain pasin em ol man tasol i save mekim we ol i save dring spak na kam paitim meri bilong ol. Ol i no bilip olsem meri bai spak na kam kilim wanpela memba bilong famili bilong em.



Taim bilong soim kastom • Ol Kerema i paitim saksak long taim bilong 16 Septemba selebresen.

Gavman no mekim klia praiwetaisesen polisi

PLANTI manmeri i no klia gut yet sapos praiwetaisesen polisi bilong gavman bai wok o nogat.

Asbisop bilong Pot Mosbi Brian Barnes i tok long Independens toksave bilong em long ol pipel olsem gavman westim bikpela mani long peim ol kainkain saveman tasol nogat wanpela gutpela wok i kamap.

Em i tok planti pipel i no klia long praiwetaisesen polisi bilong gavman, wanem tingting gavman gat na wanem samting bai kamap. Pipel i no kisim sampela toksave na hariap tasol gavman i laik salim ol samting.

"Gavman yusim liklik mani em i gat long peim bikpela mani long wokman na kisim ol bikpela opis long mekim wok praiwetaisesen," Bisop Barnes i tok.

Sampela memba na ol lain husat laik kamap memba i sutim bel na kamapim protes bilong

ol sumatin.

Hevi bilong sumatin i bringim bagarap long siti na foapela yangpela laip i lus nating, haus i paia na kainkain stil pasin i kamap.

Bisop Barnes i tok bihain long 26 yia Independens, raskal pasin kamap bikpela bikos nogat wok i kamap bilong ol yangpela.

Em i tok nogat nupela wok painim aut i go insait long mineral na olpela main i wok long pas na gavman mas painim sampela rot nau long painim mani bilong bihain.

Em i tok wanpela bikpela samting we kamap em long saining bilong Bogenvil Pis Agrimen las mun.

Planti pipel i paul yet long tok bilong gavman laik rausim poka masin na bihain hariap tasol kamapim nupela lo. Wanem samting bai kamap long ol lida husat paulim mani na stap bipo long

Ombudsmen, em i askim.

Bisop Barnes i kros olsem taim bilong kamapim lo long palamen, ol memba i no kamap bikos lo bai tanim bek long ol.

Em i tok dispela pasin i soim olsem olgeta lida i mas asua na i les long lo i sut bek

long ol gen.

Kainkain hevi na gutpela samting i kamap tasol kantri i wok long gro na laik kisim tingting bihain long 26 yia.

Em i tok olgeta pipel i ms prea nau long ol gutpela lida husat bai kamap bilong karim kantri i go fowat long wok developmen.

Ol pipel i no kila long praiwetaisesen

MEMBA bilong Markam Andrew Baing i tok olsem sapos gavman i go long ieksen neks yia wantaim praiwetaisesen tok ol bai lus nating.

Dispela i bilong wanem ol pipel i no wanbel long praiwetaisesen polisi bilong gavman.

Em i tok long Sandline Crisis i bin nogat wanpela man i dai tasol foapela man i dai pinis long dispela praiwetaisesen samting.

Mista Baing i tok: "Gavman i no harim tok.

"Ol pipel i no laikim na gavman i no kisim tingting bilong ol pipel tu," em i tok.

Planti memba husat sapotim

praiwetaisesen polisi i stap long wanpela giaman paradais na i no luksave long wanem hevi ol pipel inap kisim.

Em i tok ol i mas wet pastaim na salim liklik liklik go na i no hariap tasol na salim olgeta.

Em i tok: "Putim ol gutela menesa na ol ronim gut na mekim win mani bilong kantri."

Planti wantok sistem long ples wilong wok i save lukim ol man nogat save na sampela taim ol stil man i go ronim pablik bisnis na i no save mekim win mani.

Gutpela menesmen inap lukim sampela bekim long sait bilong kirapim wok, kamapim developmen.

Sot long mani na trabel i kamap

OL hevi we i kamap long ol Katolik sios lida long Madang sampela taim i go pinis, em plis i ting i kamap bikos long hevi bilong mani o nogat mani, Madang Plis Stesin Komanda Philip Solala i tok.

Mista Solala i tok long sampela mun i go pinis ol Katolik pris, bruder na sister i wok long bungim ol trabel long han bilong ol trabel lain.

Mista Solala i tok ol lain husat i save mekim ol dispela kain trabel em ol lain i save stap long ol setelmen na i nogat wok na painim hat long mani.

Em i tok planti yangpela manki tu em plis i holim ol we ol i save smokim mariwana o spak brus na mekim ol kainkain trabel na stil pasin long komyniti.

Ol yangpela manki bilong smokim spak brus i mas painim mani

bilong baim moa spak brus na sapos i nogat mani tru bai ol i tingting long stil long kisim mani bilong baim moa mariwana, em i tok.

Long dispela taim tu, plen bilong sanapim nupela plis bareks long nupela hap graun we gavman i bin rausim ol manmeri long Fikus setelmen long las yia i wok long kamap bihainim plen.

Bos bilong Madang plis i tok ol masin na ol samting bilong yusim long mekim wok wantaim i kam pinis long sip long Australia na i kam. Dispela bikpela projek em Australia gavman i helpim aninit long helpim program bilong em ol i kolim AusAUD na bai i kos olsem K2.5 milien olgeta.

Olpela plis bareks long Kusbau i pas pinis bikos helt atoriti i stapim ol plis na askim ol long lusim dispela hap bareks bikos em i no gutpela moa long ol manmeri i stap long en. Planti plisman i kirap lusim Madang na go bek long provins bilong ol long wok na sampela i stap bek wantaim ol wantok long Madang na wok i stap.

TYRE TYRE TYRE TYRE

HANKOOK TYRES (1000 X 20)

OL STOK ISTAP		
LOCATION	TYRES	QTY
MADANG	MHL3	3
KIMBE	MHL3	8
KAVIENG	ST258	2
MADANG	ST388	2

HANKOOK TYRES (11R22.5)

LOCATION	TYRES	QTY
LAE - NDC	F26	2
MADANG	F26	1
POM	F26	9
LIHR	F26	4
LAE - NDC	T25	13
KIMBE	T25	2
POM	T25	2

HANKOOK - T5 (825X20 - 900X20)

OL STOK ISTAP		
LOCATION	TYRES	QTY
MT HAGEN	825X20 12T5	10
WEWAK	825X20 12T5	10
POM	825X20 12T5	7
KAVIENG	900X20 15T5	4
MADANG	900X20 15T5	1
ALOTAU	900X20 15T5	8

MICHELIN TYRES (1100R20 - 1200R24)

LOCATION	TYRES	QTY
LAE - NDC	XBY	3
PORGERA	XZN	1
LAE - NDC	XXZ	12
VANIMO	XXZ	1
LAE - NDC	XXL	3
POM	XXL	30
LAE - NDC	XXY	5

HANKOOK - K402 (175/70R13 - 185/70R13 215/60R14 - 215/70R14)

LOCATION	TYRES	QTY
WEWAK	175/70R13	3
LIHR	175/70R13	2
WEWAK	185/70R13	4
GOROKA	215/60R14	8
POM	215/60R14	25
LAE - NDC	215/70R14	7
POM	215/70R14	34

HANKOOK - Z36 (225/55R16 - 245/55R16 - 31X10.50R15)

LOCATION	TYRES	QTY
LAE - NDC	225/55R16	2
MT HAGEN	225/55R16	16
PORGERA	225/55R16	3
POM	225/55R16	47
POM	208X.50R15	45
MT HAGEN	31X10.50R15	3
WEWAK	31X10.50R15	5
PORGERA	31X10.50R15	3

BIKPELA KLIARENS SELS

Mipela i rausim ol stok long kliam rot bilong Bridgestone Tyres. I gat Hankook na Michelin Tyres i stap -yu yet kam lukim na kisim...bilong ol trak, bas, iut, ka na planti moa. Kam hariap taim ol stok i stap yet.



Ela Motors TYRES



Bikpela Gavman takis kilim timba industri

PEKU PILIMBO i raitim

DAUNIM takis na larim timba industri long kantri i ken helpim long bringim mani long komyuniti na kantri wantaim.

Mausman bilong papagraun long Wes Niu Briten, Galf, Westen na ls na Wes Sepik i bin bung las wik na tok gavman mas rausim moratorium we pasim nupela kampani long katim diwai.

Ol i mekim dispela toktok bihian long sanpela man bilong Wol Beng i sutim tok long ol olsem edminstresen bilong timba industri i no mekim wok gut.

Ol papagraun i askim gavman long kamapim isi takis na larim ol pipel long rurel eria i ken kisim sevis.

"Ripot yumi kisim wanwan de i tok yumi mas lukautim envairomen, diwai na animel tasol nogat ripot bilong manmeri

dai, nogat skul, wok lus na planti arapela sevis i no kamap long ol pipel," ol i tok.

Ol timba kampani i save givim ol sevis i les long mekim bisnis na i pasim wok pinis bikos ol i lukasave olsem nogat wanpela win mani bai kamap lo hatwok bilong ol.

Forest Industri ken sapotim em yet wantaim mani tasol gavman i laik kilim indastrei wantaim bikpela takis.

Diwai ol salim long

ovasis i save bringim mani inap long K300 i go long K500 milien long gavman baset wanwan yia.

Timba industri i ken kamapim tu 6000 wok bilong ol papagraun na bringim narapela sevis i kam insiat tu.

PNG Koporet Sevis Limited Eksekutiv Dairekta Evan lewago i askim Gavman long tok klia wanem hap ol i putim K80 milien bilong planim nupela diwai long kantri.

Dispela mani i kam

long Fores Industri bilong planim nupela diwai long ples ol katim pinis tasol luk olsem nogat wanpela samting i kamap.

em i laik save wanem samting i kamap wantaim dispela mani.

Ol man husat stap long dispela bung em long Henry Gorea, Evan lewago, Michael Pasparea, Stanis Bai, Tony Lupari, Camilius Konai na ol papagraun bilong wanwan eria we timba projek i stap long en.

Planti NGO grup olsem PNG Eco Forestri Forum, Forest Watch na planti arapela i save tok lukaut long ol pipel katim diwai bilong ol na pinis.

Ol i save tok taim ol pipel katim olgeta diwai pinis, ol pipel i ken kisim taim nai no inap mekim wanpela samting bihain taim.

Ol NGO i laikim pipel i katim diwai bilong yusim stret, larim hap bilong bihain ol tumbuna i ken yusim.


I no long taim i go pinis wanpela tok pait bilong kamap namel

long Nesenel Foes Atorititi na Fores Industri Asosiesen long wansait na Eco-Foresti Forum long narapela sait.

Ol i sutim tok i go i kam long edvetismen ol kisim long niuspepa olsem wanem samting narapela i tok i no tru.

Praim Minista Sir Mekere Morauta i tok em bai lukluk gen daunim takis.

Wol Beng i bin tok long putim moratorium tasol nau em i tok orait long kantri i ken lukluk gen long stretim dispela hevi.



OFFICE OF THE SPEAKER



Tok Sori

Spika bilong Nesenel Palamen, Hon Bernard Narokobi i toktok i kam long Canberra tude olsem olgeta kantri long wol i mas joinim Yunaitet Stet ov Amerika na pait egensim dispela kain pasin nogut bilong ol teroris birua.


Mi egensim tru dispela kain eksen we ol man i no save mekim na i bilong ol enimol stret. Long liklik pasin bilong yumi, Papua Niugini i mas sanap strong long pait egensim kain pasin bilong ol teroris birua. Yumi mas redim yumi yet nau long joinim Amerika na ol arapela gutpela kantri insait long wol.

Bikpela sori na wari bilong mi i go long ol dispela planti gutpela manmeri husat i lusim laip bilong ol insait long dispela krangi birua olgeta we ol teroris i kamapim long ol.

Bikpela wari na tok sori bilong mi i go long famili bilong ol dispela lain i bin dai.

God i ken blesim ol.

BERNARD M. NAROKOBI, LLB, MP
Spika bilong Nesenel Palamen.



• Masin i wok long brukim graun bilong stretim rot namel long Ramu na Madang.
Foto: YAMES KEI

Rot projek long Madang-Ramu haiwe go het gut

BIKPELA wok developmen long stretim na putim kolta namel long Madang na Ramu Haiwe i go het gut tru. Dispela haiwe wok developmen em i mekim bikpela senis tru long ol ples insait long dispela rot.

Planti ol seksen bilong maunten em ol greda na ol masin i katim na mekim rot i stret na luk gutpela tru.

Konstraksen kampani Downer (PNG) i wok ong dispela projek em Yuropien Yunien (EU) i givim helpim mani long mekim wok.

Ol konstraksen kampani tu i katim sait bilong maunten na yusim ol strongpela ston long putim long rot.

Wanpela menesa bilong Downer Konstraksen i tok ol pablik trenspot nau yet wok long yusim rot na arere long Gogol-Naru riva bikos rot long antap we i go daun olsem long Tapo hanwara em greda na ol masin i wok yet long en.

Dispela em long hap seksin bilong rot tasol long sait bilong Tapo. Tasol olgeta narapela seksen i orait.

Nem ol i bin tok long

putim long dispela haiwe em Jephott haiwe.

Dispela nem ol i givim long makim namba wan waitman mamba bilong Usino-Bundi bipo em Bruce Jephecott.

Dispela waitman em wanpela strongpela man tru husat i bin go pas long planti gutpela wok developmen insait long PNG na tu long Usino-Bundi eria.

Mista Jephcott i dai, tasol bikpela fam o kau banis bilong em i stap yet klostu long Dumpu eria.

Bipo ol lain husat i save yusim dispela Madang haiwe rot save kisim longpela taim stret taim ol i ran lusim Lae na go olsem long Madang. Tasol nau dispela taim i sot bikos Downer i putim kolta pinis na rot i gutpela na yu ken pasim ai tasol na draiv.

Wanpela seksen bilong rot long haiwe namel long Tapo hanwara i go olsem long dabol maunten em ol Downer i wok long karim bikpela maunten we bipo i save givim planti hatpela taim long ol bikpela trak husat i save yusim dispela rot.

Passam Nesenel Hai skul i pas

PASSAM Nesenel Haikul i pas bihain long ol i bin painimaut olsem wanpela i laik kukim wanpela bilding long skul.

Ol woklain long het opis bilong edukesen i tok olsem i tru olsem ol i bin pasim skul tasol ol i no tokaut kila wanem taim bai skul i op gen.

Ripot i kam long skul i tok olsem hevi i stat taim wanpela studen bilong Is Sepik em skul i bin rausim em long skul taim em i bin mekim rong las ya.

Dispela studen i go na askim skul long larim em sindaun na mekim wanpela bikpela tes.

Skul i bin tok nogat long em i sindaun long dispela tes na taim em i kisim dispela kain bekim em i belhat nogut tru na traim long kukim wanpela haus bilong ol studen i save silip. Ol lain husat i stap klostu i hariap tru stapim paia na dispela

bilding i orait.

I gat toktok olsem dispela kros i kamap bipo yet namel long ol Is Sepik na Hailans studen long skul.

Passam Nesenel Hai skul i save gat planti nogut ripot na ol i bin traim long senisim dispela kain nogut nem bilong skul na mekim kamap gutpela tasol dispela samting we i kamap i mekim hat tru long skul.

Planti studen ananit long nupela hetman bilong skul Terry Riles i bin mekim planti kain aweanes long ol pipel long viles arere long skul.

I gat tripela mun tasol i stap bipo long skul i pinis long dispela yia tasol nau ol i stapim skul hariap tru.

Siameri bilong skul bod Laura Martin i tok skul i bin painim hat tru long kisim ol saplain nabaut na Mista Riles i bin mekim planti wok long kisim ol saplai i kam

long skul.

Mis Martin i tok Mista Riles i mekim planti gutpela wok long mekim skul i kamap gut tasol nau em skul i bagarap gen.

Em i tok hevi i stap namel long ol Sepik studen na ol studen bilong narapela provins.

Long dispela as

tasol ol i traim long kisim planti Sepik studen na liklik bilong narapela ol provins bai nogat hevi i kamap.

Mista Riles i no laik givim toktok bilong em long dispela hevi na em i tok larim bikman bilong edukesen Mista Peter Baki i ken toktok long dispela hevi we i bin kamap.

Sir Michael helpim bipo skul bilong em

LIDA bilong Nesenel Alaiens Pati, Sir Michael Somare i givim K10,000 mani i go long Utu Hai skul long Kavieng long skul i ken stretim gut laibri bilong em.

Utu Hai skul em pes skul tru Sir Michael i bin statim wok bilong em olsem wanpela tisa long 1950s na em i save gat ol gutpela tingting long dispela skul.

Dispela donesen em pikinini bilong Sir Michael, Arthur Somare i bin presenim i go long ol sku atoriti.

Sir Michael i mekim

dispela donesen taim em i bin go long Kavieng long opim wanpela opis bilong pati bilong em na tu em i laik luksave long husat ol gutpela lida i stap long Kavieng na i laik sanap long Open sit long ples bai pati bilong em i ken givim sapat long sanap long neks yia ileksen.


Em i toktok wantaim ol studen, tisa, bod memba, papamama na ol bipo pren bilong em na em i amamas tru long go bek long dispela skul we em i bin statim wok bilong em

olsem wanpela tisa.


Sir Michael i tokim ol lain olsem bipo taim tru i nogat ka long Kavieng na baisikel tasol i pulap long dispela gutpela ples.

Em i tok em i save gat ol gutpela stori long Utu Hai Skul na em i no save lusim tingting long skul na em i laik wokbung yet long helpim skul long wanem kain we.

Long sait bilong politiks em i tok em i gat planti ol gutpela lida i stap long pati bilong em.



OFFICE OF THE SPEAKER



Tok Sori

Spika bilong Palamen Hon B. Narokobi husat i stap nau long 47 CPA Konfrens long Canberra i kirap nogut long harim olsem Profesa Otto Nekitel i dai na em i tok olsem.

"Kantri i lusim wanpela bikpela man. Bai i hat tru long painim wankain man olsem dispela man long planti kris-mas i kam.

Bikpela wari na sori bilong mi i go long Misis Getrude Nekitel na ol pikinini, Judith, Alan, Carol na Josuah. Bai mi tingim ol famili membas long prea bilong mi.

Otto, mipela i laikim yu stap yet wantaim mipela, mipela i laikim yu na i laik wok yet wantaim yu tasol God yet i singautim yu hariap. Bai mipela i tingim yu olgeta taim.

Yu ken kisim gutpela malolo

HON. BERNARD M. NAROKOBI, LLB, MP.
na FAMILI

CHW kisim mani bilong ol

OL Komyuniti Helt Wokas (CHW) long foapela hailans provins i pes lain long kisim ol bipo pemen ol i no bin kisim namel long yia 1989 i go 1999.

Jenerel Sekretari bilong CHW asosiesen Jack Suaoi tok pes hap bilong dispela mani em ol i bin givim pinis em mak long K2,762,260.00 em ol dispela provins i bin kisim pinis wantaim 8-pela narapela provins.

Ol provins husat i kisim mani pinis em lsten Hailans provinsal helt na Goroka bes i kisim K428,747.69 na Sauten Hailans Provinsal Helt na Mendi Haus sik i kisim K317,460.24 na Simbu Provinsal Helt i kisim K35,178.42 na Westen Hailans provinsal helt i kisim K158,361.37.

Mista Suao i tok CHW asosiesen na Helt Dipatmen i bin mekim wanpela wokbung long kamapim ol dispela pemen bilong ol memba na ol i stat long redim ol ripot bilong ol dispela pemen ol bai mekim.

Dispela ol pemen i bilong ol opis bilong helt husat i ritrens, i dai pinis na husat i risain long dispela taim.

Mista Suao i tok sampela Ed Pos Odali i bin kisim pemen bilong ol pinis taim ol i makim ol i kamap publik sevens.

Em i tok ol i wok long raun long olgeta provins na kisim kain kain ol infomesen long stretim ol rekot bilong ol long mekim ol pemen.


Long dispela pes pemen ol bai mekim i bilong sif alauens, uniform alauens na rent alauens.

Mista Suao i tok yet olsem planti planti ol toktok i kamap namel long ol narapela het bilong CHW long wanwan provins tasol dispela ol toktok bilong ol i no tru na ol i mas noken harim toktok bilong ol.

Em i tok dispela wok i hat tru na ol yet i no inap long mekim na gutpela wokbung kamap namel long dipatmen na ol yet i mekim dispela pemen i kamap long ol memba husat i wok long krai long kisim mani bilong ol.

Planti kain hevi long mani tasol i save stapim planti helt sevis long go long ol distrik gut na dispela samting em CHW i pait strong long noken kamapim na tu ol wok lain i ken amamas long mekim wok bilong ol taim ol i kisim gut mani bilong ol.

Nau long dispela taim ol lain husat i save olsem ol bai kisim mani bilong ol i ken redi tasol long pemen i kamap.



• Ol sampela skul pikinini long Boreboa Praimeri Skul i bilas na amamasim Independens de long las wik Fraide.

Prais bilong fiul i pundaun, em gutpela presen

WANTOK
NIUSPEPA BILONG OL PAPUA NIUGINI

PRAIM Minista Sir Mekere Morauta i bin tokim ol pipel bilong Papua Niugini olsem prais bilong fiul olsem bensin na disel bai i kam daun. Dispela em wanpela gutpela nius long dispela 26 independens de bilong Papua Niugini long las wik Septemba 16, 2001. Sir Mekere Morauta i tokaut olsem prais bilong fiul bai i kam daun bikos i gat inap risev mani i kamap long kantri na tu wok bilong putim kantri long gutpela rot bilong wok bisnis i gutpela nau.

Tasol em i no tokaut long hamas tru bai prais bilong fiul i kam daun long en na wanem taim tru bai gavman i statim dispela senis. Sapos prais i kam daun, dispela em gutpela nius long olgeta ka, sip, balus na ol bikpela masin i save wok long rot na long ol faktori na ol bisnis nabaut.

Prais bilong fiul i bin go antap tru long dispela yia bihainim 2001 nesanel baset gavman bilong Sir Mekere i bin kamapim long las yia. Dispela i givim bikpela hat taim tru long planti ol bisnis na kampani husat i save yusim fiul long wok bilong ol olgeta de.

Taim olgeta masin i save kisim gut fiul, ol i save wok gut tru na mekim ol wok i kamap gut na mani i save kamap na gavman i save kisim gen long takis na tu ol kampani na bisnis i save baim ol wokmanmeri husat i mekim wok long pot-nait.

Em i gutpela nius long prais i kam daun olsem na dispela i soim olsem prais bilong ol arapela samting olsem ol kaikai, kago na arapela sevis tu bai i kam daun long sampela taim bihain bikos prais bilong fiul i opim rot nau long ol gutpela senis bai i kam bihain.

Dispela em wanpela gutpela nius long 26 independens de bilong Papua Niugini na ol pipel i harim na tingim pinis dispela toktok na ol i putim was long lukim i kamap na wanem gutpela senis bai kamap bihainim.

Oposisen lida Bill Skate i bin tokaut long las wik olsem Papua Niugini i nogat wanpela gutpela samting long amamas long en long dispela taim bilong 26 independens de bikos planti samting i bagarap na laip wantaim sindaun bilong ol manmeri i hat nau.

Ol pipel i hat nau long baim kaikai long stua, ol i hat long baim skul fi, mani i sot long baim marasin, nogat gutpela helt na edukesen sevis long ol pipel bilong ples, nogat gutpela developmen i go long ol ples lain, gavman i wok long bagarapim wok bilong ol gutpela saveman na putim ol lain bilong ol yet i go insait long ol wok, strong bilong mani (Kina) i pundaun olgeta na mekim prais bilong ol kaikai na ol samting long stua i go antap olgeta na planti arapela moa.

Mista Skate i tok i nogat wanpela gutpela samting long Papua Niugini bai amamas long en bikos kantri i bungim planti hevi pinis.

Gavana Jenerel Sir Silas Atopare i tok Papua Niugini i bin kam long gutpela rot long 26 krismas olgeta we em i no bungim wanpela bikpela hevi long mama lo na nem bilong kantri aninit long demokresi.

Papua Niugini i sanap strong antap long strong bilong demokresi na pawa bilong mama lo bilong kantri olsem na olgeta senis we i save kamap long ol gavman long bipo i kam i no save bungim wanpela bikpela hevi o trabel.

Olgeta senis bihainim sistem stret na kamap gut na pipel i lukim nupela gavman i save kamap kisim opis na olpela i save go.

Sir Silas i tok dispela em as tru Papua Niugini i kam long gutpela rot 26 krismas olgeta i kam inap long dispela taim na dispela i sanapim gutpela piksa na luksave bilong Papua Niugini long ai bilong ol arapela demokretik kantri long Saut Pasifik na tu long wol.



Air Niugini

TOKSAVE I GO LONG OL PASINDIA

CIVIL AVIATION ACT 2000

Ol sotgan na ol birua samting i tambu tru

Toksave i go long ol pasindia olsem i tambu tru long karim ol sotgan o ol strongpela birua samting i go insait long balus.

Ol Trefik Opisa i mas sekim olgeta sotgan na ol birua samting na makim ol olsem kago, 30 minit pastaim long balus i kirap lusim graun.

Wanem kago yu kam soim aninit long 30 minit, klostu long taim bilong balus i kirap bai dispela kago i stap bek na go long han bilong polis (RPNGC) long lukautim.

Olgeta pasindia i mas save olsem wanem birua samting yu karim na i nogat tok orait o tok klia i kam long ples balus, dispela i brukim lo aninit long **Seksen 267 bilong Civil Aviation Act 2000**. Sas bilong dispela i olsem 7-pela krismas long kalabus.

Husat manmeri i no kisim tok orait o i nogat tok klia na i laik karim ol dispela birua samting i go antap long Air Niugini balus -

- (a) ol kainkain sotgan, o
- (b) ol strongpela birua samting, o
- (c) ol bom na smok bom o arapela we i wankain, o
- (d) ol strongpela birua samting bilong pait na kilim man,

Bai polis (Royal Papua New Guinea Constabulary) i holim yu na sasim aninit long **Seksen 267 bilong Lo**.

Sapos Lo i painim husat manmeri i brukim dispela **Seksen 267 bilong Civil Aviation Act 2000**, bai em i no inap ron moa long Air Niugini balus long bihain taim.



**INDEPENDENS DE TOKTOK I GO LONG KANTRI
I KAM LONG H.E. SIR SILAS ATOPARE, GCMG, KSt.J
GAVANA JENEREL BILONG PAPUA NIUGINI**

16th SEPTEMBER, 2001

Ol lain bilong mi long Papua Niugini,

Long dispela 26 yia bilong independens, mi laik toktok stret long yupela long ol samting yumi bin kamapim long 20 krismas i go pinis. Lukluk i go bek yumi ken luksave long ol gutpela samting dispela kantri i bin mekim na kamapim.

Long las 26 krismas Papua Niugini i bin holim yet luksave bilong em insait long ol ted wol kantri olsem em i bilip tru long demokrasi. Em i no isi tru long kain kantri olsem yumi long kisim independens isi tru taim yumi i gat moa long 800 tokples na ol pasin tumbuna.

Long dispela mi laikim olgeta Papua Niugini long tingim na amamas long kantri bilong yumi i bin painim independens long em yet. Planti krismas i go pinis yumi i bin stap insait long planti wok we i makim yumi olsem wanpela pipel, wanpela kantri na wanpela lain manmeri we yumi i mas holim na strongim long soim dispela piksa i go yet long ol pipel bilong yumi long bihain taim.

Kantri bilong yumi i bin sanap strong long 26 krismas olgeta i kam bikos yumi i gat bikpela bilip long mama lo bilong yumi olsem em i was bilong olgeta manmeri na ol pikinini bilong dispela kantri. Bikos long dispela mama lo yumi pait long soim nem bilong yumi na kamapim gutpela isi sindaun na bung wantaim na fridom bilong olgeta wanwan manmeri. Dispela em i bun tru bilong kantri i groa, wok lotu i ron gut na strong bilong wok we i makim yumi Papua Niugini na i soim yumi bilong wanpela kantri olsem na yumi ken amamas long dispela. Ol gutpela samting em bilong yumi tude na em bai asples tru bilong ol pikinini bilong yumi long bihain taim.

Foapela kona bilong wol i luksave long Papua Niugini bikos long flak bilong em we i soim olsem kantri bilong holim na sanap antap long demokrasi olsem mak bilong soim olgeta Papua Niugini manmeri olgeta taim long ol samting em i gat we i narakain long ol arapela kantri long wol.

Ol gutpela na stretpela rot we ol gavman i wok long senis bihainim long 26 krismas i kam i soim tru kaikai na piksa bilong demokrasi yumi sanap antap long en we i kamapim strong bilong palamen sistem bilong yumi. Dispela gutpela sistem i save kamapim gutpela rot bilong pulim ol ovasis bisnis i kam we yumi ol pipel bilong PNG i ken luksave long dispela.

Olsem lida bilong ol pipel, mi save toktok yet olsem ol pipel i as bilong yumi i kamap lida bilong ol. Olsem na mipela i mas mekim samting stret na sevim ol gut. Sori tru olsem sampela lida long nesenel na provinsal level i wok long sevim ol yet na amamasim ol yet na taim ol i mekim olsem ol i no sevim gut ol pipel. Olsem ol lida, yumi i mas wok bung wantaim long kamapim strongpela kantri we ol pipel i bung stap na bung wantaim. Yumi ol lida em ol lain bilong lukautim gut mama lo na yumi em maus bilong ol pipel. Sapos yumi i no redi long mekim olsem, orait yumi i mas sanap arere na mekim rum long narapela lida husat i ken sanap na putim interes bilong kantri i go pas na sevim gut sindaun bilong ol pipel pastaim long ol arapela samting.

Mi olsem wanpela bilong ol lida husat i bin holim ol sampela pablik opis na laki long raun long Papua Niugini, mi ken luksave long ol wari

bilong yu long i nogat inap developmen, nogat gutpela sevis na ol arapela hevi we yumi olgeta i bungim tude.

Mi ken tokim yu olsem ol dispela hevi i no inap pinis long wanpela nait tasol. Ol pipel bilong yumi em ol i save kolim ol kristen na ol lain bilong pret long God na sanap long sait bilong God. Olsem na long dispela bilip bilong yumi long God we i strongim bilip bilong yumi long raits bilong ol pipel na pasin bilong kamapim gutpela sindaun. Mi askim olgeta lotu olsem ol kristen sios long go het yet long gutpela wok bilong ol na strongim ol kongrigesen bilong ol long prea long kamapim gutpela sindaun na bung wantaim insait long dispela kantri na tu long wol.

Mi bilip long bel bilong mi olsem yumi gat dispela wok long mekim long ol pikinini na tumbuna bilong yumi long bihain taim long ol i mas sindaun gut na bung wantaim na sanap wantaim long lukluk i go het yet wantaim bilip na strong.

Mi toktok long yu na ol lain manmeri bilong yumi na tokaut olsem i gat gutpela lukluk i stap olsem na long dispela independens de, bai i gat nupela strong bilong lukluk igo fowet long kantri i sanap bung wantaim, amamas na lukluk i go het long ol samting we i ken holim mipela wantaim olsem wanpela pipel, wanpela kantri na wanpela lain.

Olgeta pablik sevis na praivet sekta wantaim ol sios, ol non gavman grup, ol wimens grup, ol yut grup, ol pipel bilong Papua Niugini na wanwan i mas wok bung wantaim olsem wanpela tim na sapot wantaim gavman long kamapim ol sevis na helpim bilong sevim komyniti long gutpela sindaun bilong ol. Mipela i tok amamas tu i go long ol ovasis pren bilong mipela husat i save givim helpim i kam. Olsem wanpela kantri mipela i save gat wari, mipela i ken sevim kantri bilong yumi sapos yumi sanapim stret rot bilong stretim ol hevi na wari bilong mipela na wok bung wantaim ol ovasis poroman bilong mipela antap long ol developmen helpim ol i givim mipela.

Long pinisim toktok, mi laik tok olsem mipela i mas larim God i kam insait long wok politiks na edministresen bilong kantri. God i mas gat namba wan ples insait long ol wok bilong yumi long mekim disisen, insait long olgeta de laip bilong yumi na insait long bel bilong yumi wanwan. I mas gat amamas long laip, luksave olsem God i stap wantaim yumi olgeta de long helpim yumi long wok bilong lukautim na ranim kantri.

Lidasip bilong Papua Niugini long olgeta level bilong mekim disisen, long provinsal o nesenel i mas pret long God husat em yumi olgeta bai tokaut stret long em long bihain taim.


Mi laik tok gutpela amamas i go long yu na famili bilong yu long dispela eniveseri.

God i blesim yupela olgeta.


SIR SILAS ATOPARE, GCMG. KStJ



Ansett balus kampani bruk daun • Oigeta wok manmeri bilong balus kamapim na yunien i bung na mekim mas raun long autim bel kros bilong ol. Ansett em namba tu balus kampani we i save karim ol maneri insait na ausait long Australia wantaim. Moa long 16,000 manmeri bai lusim wok bilong ol. Ogeta pipel mas wantaim long soim bel kros. *Poto: The Courier Mail.*



Mama i dai pinis • Papa (namel) wantaim tupela pikinini man bilong em i krai nogut tru taim ol i harim ol mama bilong ol i dai pinis. Ol Palestain i kilim mama bilong em taim ol sutim em long ka wantaim masin gan. Israel na Palestain i painim rot bilong stretim bel isi namel long tuepal,sait wantaim.



Turis i kisim taim • Ol turis husat kisim tiket wantaim Ansett balus na kam i stap holide long narapela hap i kisim taim. Balus kampani i pas pinis na dispela meri wantaim ol arapela i wet na ring yet long painim aut wanem samting i rong. *Poto: The Courier Mail.*



Em birua tru o yumi no klia • Dispela man i sanap ausait long haus lotu bilong bilong ol Moslem. Birua long Amerika i mekim planti pipel bel hat long ol Moslem. Haus lotu hia i kisim petrol bom tasol i no bagarap. Sampela grup i amamas long birua tasol sampela i no wanbel. Ol manmeri nating inap kisim taim natin. *Poto: The Courier Mail.*




Pusi ket o man! • Dispela em wanpela pusi ket ol husat ken pilai kung fu. Em i ektim piksa wantaim ol narapela pusi ket na dok. Ol dok na pusi ket i ken toktok na pait olsem ol man. Muvi piksa kam aut pinis na kam long hap bilong yu klostu. *Poto: The Courier Mail.*



Taim bilong plawa • Meri ya i kwɪn bilong kanivel las yia taim ol pipel bilong Toowoomba long Australia i save amamas long kainkain plawa. Kain pasin i save kamap wanwan yia.

Ol birua kamap long Amerika las wik



• Ol wok mameri traim stretm na painim bodi na manmeri husat stap laip aninit long rabis bilong bilding.

• Ol pipel ronawe taim wol Tred Senta bilding i pundaun bihain long birua.

Ol foto: The Courier Mail.

Amerika bai kirapim woa long terrorism


PRESIDEN bilong Amerika George W Bush i tok aut olsem em bai kirapim wa long husat gavman na man i stap beksait long kirapim wa.

Mista Bush i tok gavman bilong em bai i no malolo inap ol i kisim ol ma husat mekim pasin nogut na bagarapim pipel bilong Amerika nating.

I luk olsem Osama Bin Laden, wanpela man bilong Saudi Arabia tasol husat stap nau long Afganistahn, wanpela kantri long Midel Is i bin stap beksait na helpim ol teroris.

Tasol Bin Laden i tok em i no save long wanpela samting.

Bin Laden em wanpela man husat Amerika i putim bikos man ya i kukim opis bilong Amerika i stap long Nigeria na Tanzania tupela yia i go pinis. Long dispela birua, planti pipel tru i bin dai. Amerika i bin bomim bes bilong Bin Laden long kantri



• Osama Bin Laden.

Afganistan tasol em i lusim pinis na 20 manmeri nating i bin dai.

Nau Amerika i askim pinis gavman bilong Afganistan long givim Osama Bin Laden tasol Afganistan i tok sapos wok painim aut i soim olsem Bin Laden kamapim dispela birua ol bai givim na i no nating.

Foapela balus olgeta bagarap

OL stil man i kisim foapela bikpela balus tru wantaim pasindia insait.

Tupela bilong ol dispela balus i go bamim Wol Tred Senta, tupela 110 stori bilding long Amerika.

Dispela tupela bilding i gat 50,000 manmeri i save wok insait. Na wanwan de manmeri inap long 80,000 i save kam lukluk raun.

I gat kainkain opis na ol samting i stap bilong kainkain bisnis tasol teroris o man husat laik kamapim pret i kisim tupela balus na sut stret long Wol Tred Senta.

Dispela bilding i longpela tru na i stap antap long olgeta narapela bilding. Long PNG nogat wanpela longpela haus olsem.

Ol kainkain bisnis bilong olgeta

hap long graun i save gat opis bilong ol long dispela bilding.

Sampela bilong ol dispela kampani i gat opis bilong ol i stap antap tru long 110 stori samting. Dispela ol lain i sindaun antap long opis na i save lukluk i kam daun na lukim klaut i stap.

Namba 3 balus i go pundaun antap long namba wan opis bilong ami. Opis bilong ami i kisim bagarap na sampeia manmeri i dai.

Namba foa balus i go kapsar long wanpela bus nating. Olgeta pasindia bilong balus i dai wantaim.

Olgeta nius toktok long wanem samting i kamap i raun bikpela pinis long olgeta hap graun.

Pipel i dai long birua

NAMBA bilong ol pipel husat lus long birua i wok long kamap bikpela wanwan de. Ol kantri bilong graun i salim toksave yet i kam long wanem namba bilong manmeri ol i bilip i stap insait long opis.

Wantok bilong manmeri husat dai i karim piksa raun na soim ol narapela manmeri sapos ol i bin lukim wantok bilong ol o nogat.

Amerika i ripot olsem em i no save amamas

manmeri bilong Amerika yet i lusim laip tasol New York aun yet i tok 5,097 manmeri bilong siti yet i dai. Dispela em logn 300 paia man, 67 plisman na tupela spai bilong gavman. Dispela ol man i dai bihain long bilding i paia taim ol i go insait long helpim ol lain husat kisim taim.

Namba bilong manmeri i stap insait long opis i no kamap ples klai yet.

Bikpela rabis tru i pulap taim bilding i

bruk i kam daun na em bai kisim sampela mur long ol i rausim rabis na sekim sapos sampela manmeri i star laip ye!

Ol man i traim sekim aninit long ol rabis ba ol i ken sevim sampela laip tasol birua i kamap long laip bilong ol yet.

Sapos sampeia manmeri kisim bagarap na stap insait long rabis.

ating ol bai wet yet na dai bikos rabis bilong Wol Tred Senta i stap i go antap 75 mita.



NATIONAL WEEKLY HIT PARADE

SSeptember 22nd/09/2001

SPONSOR: TRADEWINDS

W/B	L/W	T/W	SONG	ARTIST
1	1	1(8)	Oulamagi	Demas Saul
2	2	2(5)	O Sine	Demas Saul
13	3	3	Talaigu	Quakes
0	13	4	Ngau Malabong	Quakes
4	5	5	Come Back	Anslom
5	6	6	Crocوماتو	K2 Biis Band
20	14	7	Jabon Ibala	Strugglers Band
7	7	8	Sori Vada Lasi	Demas Sau
8	8	9	Nonga Base	Anslom
9	9	10	Eda Loa	Lista Serum
3	4	11	Pondopondo	Felix Yausi
10	10	12	Uka Bai Teke	Anslom
11	11	13	50,000	Lista Serum
12	12	14	Elison	Kabu Rita
14	15	15	Wopa Kantri	K-Dumen
15	16	16	Wara Sepik	Felix Yausi
12	16	17	Shanna	Patti Doi
6	18	18	Hat Wok Nating	Lista Serum
19	19	19(5)	Tavine	K2 Biis Band
17	20	20	Sinagu Lau	Demas Saul

Out: Nil In: Nil

SOURCES: YUMI BELO SHOW LAIK BILONG ANKOL E.T COCA COLA GARAMUT FLAME CULTURE & PHONE ENQUIRES

LAIPSTAIL

Wara em bikpela samting long laip



KIWURAM KANAKO i raitim

WANPELA boi i singaut. "Plis, mi dai long dring wara ya. Inap yupela skelim long wanpela kap na givm mi?" orait ol sampela liklik pikinini i skelim na givim em. Boi ya dring tupela kap wara na bihain em yet i skelim namba tri kap. Tasol em i no dring na pinisim wara. Nogat. Hap wara em i kapsaitim i go long graun.

Liklik boi ya bagarapim wara bikos em i kapsaitim nating i go long graun. Em inap long pinisim na dringim olgeta dispela wara.

Hamas taim yumi olgeta i save mekim olsem?. Hamas taim yumi olgeta i save mekim olsem? Hamas taim ol manmeri na pikinini i save brukim ol paip wara i ron nating? Hamas taim yumi ol manmeri i save tromoi ol kainkan pipia i go insait long wara?

Ating yumi i gat tingting olsem ol wara bai i stap olgeta taim na i no inap long bagarap o pinis. Ating yumi i save tok olsem em orait wara bai i stap olgeta taim. Ating yumi i save bilip olsem i gat inap wara bilong olgeta manmeri na pikinini long dring, kukim kaikai na waswas long en.

Tasol wanpela bikpela askim i stap yet. Bai i gat inap long yumi olgeta manmeri bilong ples graun o nogat? O i tru olsem wara long ples graun i wok long pinis nau?

Yumi wanwan i mas opim ai na tingting gut pastaim long yumi mekim nabaut long ol wara yumi i gat long en. Yumi no ken tok olsem wara bai i stap olgeta taim. Nogat, wara bai pinis.

Olsem bikman bilong Yunaitet Nesen (UN) Miista Kofi Anan i tok, "klinpela na gutpela wara em wanpela bikpela samting tru long laip. Mipela i no inap stap laip sapos i nogat kain wara olsem. Yumi no inap senisim wara bikos nogat narapela samting i stap long kisim ples bilong wara. Na ol kainkain samting yumi ol manmeri na pikinini i save mekim i save putim bikpela hevi long hamas wara na gutpela wara i stap tete long ples graun."

Planti kantri long Afrika i painim hat tru bikos ol i nogat wara. Ol kantri long Arabia olsem Jordan, Siria, Ijip, Saudi Arabia, Irak na Iran na i kam olgeta olsem long India, ol tu i painim wara bikos ples bilong ol i stap olsem wesana (desert). Long Amerika tu kain ples olsem Texas, Kalifonia, Nu Meksiko, Nevada na i go antap olsem long Kanada, ol yu i painim hevi long wara.

Bikpela hap bilong wara long ples graun i stap we tru?. Bikpela hap tru bilong wara stap long ol biksolwara we i gat planti sol tumas na yumi i no inap long dring o yusim long wokim ol bikpela gaden (farming) na bilong mekim kainkain wok long ol fektori o haus masin. Liklik wara tru i stap we yumi ol manmeri i save yusim.

Traim tingim sapos yu gat 100 botol. Na yu pulapim 97 botol wantaim solwara na tripela botol tasol i gat gutpela wara bilong dring, kukim kaikai na waswas. Yu no inap long dringim solwara i stap long ol dispela 97 botol. Dispela em piksa bilong wara long ples graun. Nogat man i save kisim solwara na go wasim saksak. Nogat man i save pulapim tenk wara bilong ka wantaim solwara. Nogat man i save givim sol-

wara long ol pikinini bilong em taim ol i kra i long wara, nogat tru.

Olsem na yumi ol manmeri na pikinini i wok long taitim i go i kam long dispela liklik wara yumi i gat i stap bilong yusim. Olsem na yumi mas lukautim gut long noken mekim nabaut long ol wara yumi i gat.

Tingim taim ren i pundaun, bikpela hap ren i go insait long graun na i stap. Tasol ren na wara i stap insait long graun i wankain tasol. Noken ting olsem ren i pundaun na i gat planti wara tru insait long graun. Nogat.

Traim askim RD Tuna kmapani long hamas wara em i save yusim long mekim kmap 1000 480ml Diana Tuna tinpis. Tingim tu ais kakaruk i kam long Niugini tablebirds. Askim long hamas wara tru ol i save yusim long stretim kmap 10,000 ais kakaruk. Noken hangamapim yu yet taim yu harim olsem ol i save yusim samting olsem 260,000 lita bilong wara. Yes, em i tru olsem ol bikpela wok long fektori na ol bikpela gaden fama i save yusim bikpela wara tru na yumi ol manmeri na ol pikinini i save sotwin tru long kisim gutpela klinpela wara.

Planti manmeri long PNG i save painim hat tru long wara. Olsem long ples bilong papa, maski i gat bikpela wara i stap, mipela i save go long liklik baret wara o as bilong saksak long kisim wara bilong kuk na kaikai. Taim bilong waswas, mipela i save go kalap long bikpela wara Guam.

Tasol long hap bilong Yagaum eria (Saut Amenob) olsem long ol ples olsem Tamane, Banub, Sein na arapela, ol manmeri i tok olsem ol i laikim gutpela wara bilong dring, kukim kaikai, waswas na bilong pulim i go long ol banis kakaruk na gaden bilong ol.

Ol pipel long dispela ples i tok olsem ol liklik baret wara i drai na i go hait bikos olgeta bikbus em ol manmeri i katim bilong gaden. Dispela i mekim ples i hat bikos nogat diwai na bikbus bilong holim pas tuhat we i save bungim na kamapim wara.

Ol pipel bilong ples Dugumor long Bogia i bungm kain kain sik na sua bikos wara ol i save painim pis na waswas long en i bagarap taim marasin gramoxzone i ron i go insait long wara long taim bilong bikpela ren.

Ol wokman bilong Dugumor plentesen i save yusim gramoxzone long kilim indai ol gras. Gramoxzone em wanpela marasin bilong kilim ol gras nogut. Yumi tu inap long tok olsem kain marasin nogut olsem inap long kilim indai ol manmeri na pikinini bikos em i save kilim indai ol kainkain gras.


Traim tingim sapos yu dringim kopu taim yu ritim dispela stori, olsem hamas wara tru ol i save yusim long wokim kamap 5000 tan (5000 tonnes) bilong feveret PNG Graun Kopi we yu laikim tumas. Na tingim tu hamas tan bilong skin kopi em fektori i save kapsaitim i go insait long wara long wanpela de. Sapos yu laik rait long mi, plis rait long dispela adres:

Kiwuram Kanako, Northern Lights, PO Box 317, Madang 511, Madang province.

Tingim wara em bikpela samting na i gat liklik wara tasol i stap tete. Lukautim gut wara long wanem hap yu sindaun long en.



**HITS & MEMORIES
FM 100
RADIO NETWORK**



PORT MORESBY FM 100.3	MT. HAGEN FM 100.4	TABUBIL FM100.3	ALOTAU FM107
BOROKO FM 100.3	LAE FM 100.5	WEWAK FM100.8	BOREGORO FM 107.7
GOROKA FM 100.2	POPONDETTA FM 100.5	MADANG FM 100.8	HOREALOA FM 107.5
KAVIENG FM 100.2	RAMU FM 101	KOKOPO FM 100.8	WATERHOLES FM
107.3			
LORENGAU FM 100.3	KUNDIAWA FM 101	BUKA FM100.3	KAINGUMA FM 107.1

When you advertise on FM 100, you can rest assured that your message is being heard in and around these locations on these frequencies right around PNG. Just call 300 4300, fax300 4399 or email us at kalang@tiare.net.pg & we'll take care of all your advertising and promotion needs.

Ples lain kamapim ges haus long Isten Hailans



• Sinia opisa na mausman bilong Istan Hailans Provinsel Gavman, Togi Bau.



• Togi Bau i sanap wantaim ol ples lain bilong Yahetomo long Isten Hailans provins.

SAPE METTA i raitim

YAUKOVE long tokples Gahuku long Isten Hailans em, ol lain bilong bus. Tasol noken ting olsem ol lain long bus ya i save sindaun nating long ples bilong ol long Yahetomo. Planti ol lain long dispela eria i save i gat tingting bilong strongim kalsa na pasin tumbuna na tu painim sampela rot long pulim ol turis igo insait long ples na haus lain bilong ol.

Bihain long sindaun na bungim tingting ol dispela lain long Akameku i go het na kirapim Yaukove Tours bilong kirapim na strongim pasin tumbuna na kalsa bilong Isten Hailans provins.

Bikpela tingting em long putim ol turis i go long ples bilong ol. Ol i bin statim dispela tua kampani long 1993. Tupela yia bihain long taim PNG Turism Atoriti (TPA) i kirap na kamap bikpela, ol lain husat i go pas long atoriti ya i givim tok orait long Yaukove Tours bai i ken go het na mekim wok olsem tua kampani.

I kam inap nau Yaukove Tours i go het na mekim wok gut we ol i pulim planti turis long ol ovasis kantri olsem Japan, Israel, Amerika, Australia, Midel Is na ol arapela turis long ol arapela kantri insait long ol Yurop kantri.

Planti ol lokol turis long Goroka na PNG tu i save go raun long Akameku we ol i save amamas tru long lukim ol kainkain tumbuna pasin em ol lain long hap i save kamapim.

Wanpela long ol lokol turis



• Dispela em wanpela ges haus ol lain long ples i wokim.

husat i bin kamap long Akameku em Minista bilong Kalsa na Turism na memba bilong Maprik Sir Pita Lus.

Sir Pita i bin harim olsem ol lokol viles lain long Akameku i wok long mekim planti wok long sait bilong pulim ol turis na promotim kalsa na pasin tumbuna bilong ol. Na long Julai dispela yia sir Pita i bin kamap long Goroka na draiv i go antap long Akameku we ol lokol viles lain long hap i welkamim em wantaim ol

kain kain stail na pasin tumbuna.

Long dispela sem taim tu ol lokol lain ya i bin kirapim na stretim wanpela viles stail ges haus we ol i bin putim Sir Pita na ol opisa bilong em long slip. Dispela ges haus i gat 16 rum olgeta.

Mausman bilong Yaukove Tours, Pato Matani i tokim Wantok olsem dispela ges haus em i viles stail ges haus olsem na olgeta samt-ing we bai i ken kamap long givim sevis long ol ges na

flut musik, em i tok.

Em i tok ges haus ya i no bin pinis gut tasol taim Sir Pita Lus i bin kam antap em i luksave long dispela na i bin givim K2,000- i go long ol lain husat i go pas long dispela ges haus we ol i yusim long stretim ges haus ya na i luk olsem Sir Pita husat bai kam antap long lukim Goroka So bai kamap olsem wanpela namba wan spesel ges bilong dispela nupela ges haus long Akameku.

Na long sait bilong pilai o amamasim ol ges bilong mipela, mipela bai putim aut ol tumbuna singsing na kamapim tu ol tumbuna musik wantaim ol mambu, kundu na

I gat sampela moa gutpela samting olsem bus trekking, haiking o raun long bus, go antap ing ol maunten, lukluk long ol pisin- na ol abus bilong bus i ken kamap long hap we ol ges i ken mekim na i no inap long lusim tingting long ol dispela samting taim ol i go bek long ples bilong ol.

Bihain long stretim gut na pinisim wok long ges haus ya, ol lain long hap i bin askim wanpela sinia opisa bilong Isten Hailans Provinsal Gavman long kamap na lukluk raun na witesim pinis bilong ges haus.

Sinia opisa ya em Togi Bau na em i makim Isten Hailans gavman. Em i bin i gat bikpela amamas long ol lokol lain long hap na em i givim K50 long poket bilong em yet long soim amamas bilong em long gutpela wok ol ples lain ya i mekim.

Long sem taim Mista Bau i bin tokim o ples lain ya olsem sapos ol i stap na wetim tasol gavman long sapotim ol, em bai ol i ken i stap na wet yet. Olsem na kain pasin na tingting bilong sindaun na wet long gavman em yumi mas lusim.

Na kirapim ol wok long strong bilong yumi yet. Taim yumi mekim olsem, gavman bai luksave na i kam insait na givim sapot na helpim yumi, em i tok.

Mista Bau i tok amamas long ol manmeri olsem Willie Aeno, Maxie Owone, Jeff Wane na Pato Matani long i go pas long kamapim dispela Yaukove Tours kampani na Yahetomo ges haus long Akameku.

26 ya Independens kamapim klas sistem

PEKU PILIMBO i raitim

LAS wiken yumi selebretim 26 ya Independens Aniveseri. Dispela em namba wan wik bilong 27 ya yumi bai stap olsem wanpela Independen kantri.

Ating wanwan man i gat rait long selebretim Independens de. Planti pipel i no klia wanem samting yumi amamasim na selebretim.

Ating ol bikpela opisal bilong gavman i ken amamas olsem ol i kisim bikpela pe, slip long gutpela haus, draiv raun long bikpela ka, kaikai na slip gut. Dispela Independens yumi kisim long Septemba 16, 1975 i mekim ol luk-save long ol yet olsem man. Ol i karim bodi na putim naispela klos wantaim su na sanap i stap. Gutpela sapos ol dispela manmeri i amamasim Independens.

Mi yet bin sanap long grup we singsing na traim amamas olsem kantri kisim independens pinis tasol mi sem gen. Yumi bai amamasim wanem gutpela samting stret?

Nogat wanpeal sevis i go long ol rurel eria. Olgeta taim ol memba i tok mani sot long gavman na ol i nogat mani. Mani bilong yumi i save go we? Nogat wanpela memba i sanap na tokaut olsem dispela hap em mani bilong yupela i stap.

Taim bilong Independens de na ol man i gat sampela mani bilong giaman grisim ol manmeri i bilas na singsing nabaut. Taim nating dispela mani i stap we?

Taim wanpela mama i karim bebi long bus na nogat haus sik klostu na em i dai, dispela mani inap sevim wanpela laip. Taim skul pikinini nogat mani bilong skul fi na stap long ples, ating dispela mani inap salim sampela pikinini long kisim skul.

Wanwan gavman opisal na memba i sindaun bihain long ol bikpela ea kondisen opis bilong ol na i no luksave long hatwok ol liklik manmeri i mekim wanwan de long stap laip.

Yumi amamas pinis long Independens de tasol yumi amamas long wanem samting tru? Ating yumi amamas olsem yumi salim ol memba i go mauswara planti long palamen haus na i no karim wanpela sevis i kam bilong helpim yumi? Ating yumi amamas olsem memba wantaim ol wantok bilong em i holim bikpela opis, slip long hotel, kaikai gut.

Mi sanap long taim bilong Independens de selebren na mi sem nogut tru olsem mi wanpela man bilong Papua Niugini.

Mi stap yangpela, bipo long Independens, mi ken tok olsem olgeta gavman sevis i orait liklik. Ol lapun na papamama bai stori long dispela. Ol pablik sevan i mekim gutpela wok tru.

Taim bilong Independens yumi kirap kisim self-gavman na tok "mipela save long olgeta samting.

"Mipela yet i laik ronim gavman na yupela ausait man i mas go." Ating dispela em wanpeal gutpela samting yumi mekim.

Save bilong yumi i stap we? Save bilong yumi karim yumi i kam we? Save bilong yumi helpim yumi olsem wanem?

Las wiken tasol yumi selebretim Independens na wanem gutpela samting i kamap insait long 26 ya?

Amas gavman i go na i kam. Olgeta i save dinau na dinau bilong yumi nau i stat long kilim yumi. Dinau bilong 26 ya i stap wantaim yumi yet.

Yu manmeri bilong dispela kantri bai go we? Yu ken amamas long



Independens de bilong yu tasol yu save olsem yu bai bekim dispela dinau yet. Sapos yu no save mi sori tru long yu.

Taim yumi yet holim gavman, yumi gridi tumas. Planti mani bilong pablik i lus nating long paul pasin. Olgeta taim mani i sot na nogat wanpela gutpela sevis i go kamap long ol rurel eria.

Olgeta pipel bilong yumi long rurel eria i save painim hat taim na wanwan de ol i tuhat tru long stap laip.

Planti bilong ol i lusim laip bilong ol bikos nogat wanpela wok manmeri bilong helt i stap long hap bilong ol. Planti bilong ol i bagarap bikos nogat wanpela rot i stap bai ol i kisim sevis i go long eria bilong ol. Nogat wanpela rot ol bai inap karim kopi, kopra, gaden kaikai i kam salim long bikpela maket.

Olsem Minista bilong Edukesen Dokter John Waiko i tok, moa long 2 milien pikinini i nogat skul. Husat bai givim skul long ol? Husat bai karim sevis i go insait long wanwan komyniti bikos olgeta gavman opisal na save man i laik sindaun long opis bilong ol long Wagaini tasol. Nogat wanpela i lukluk raun long wanem hevi ol komyniti bilong yumi insait long kantri i gat.

Planti gavman sevis i bruk na nogat wanpela nupela wok developmen bilong stretim ol dispela hevi, yumi tok yumi kisim independens na yumi amamas kranki long bikpela san. Sem pasin. Ating ol lain bilong yumi bipo long Independens i kisim sampela gutpela sevis.

Tude wantok bilong ol politisen i kaikai hap mani bilong yumi. Ating meri pikinini na memba yet i holim mani. Ol liklik manmeri i kraik long gavman sevis na kisim taim stret long olgeta rurel eria. Ating yumi inap sutim toktok long ol gavman na praim minista husat lukautim kantri insait long dispela 26 ya. Ol Praim Minista oslem Sir Michael Somare, Sir Julius Chan, Paia

Wingli, Sir Rabbie Namaliu, Bill Skate na nau Sir Mekere Morauta. Ating ol dispela man i mas save wanem hap tru yumi go rong insait long dispela 26 ya yumi stap independens.

Ol dispela praim minista i makim ol man husat ronim gavman. Ol i skelim mani long wanwan dipatmen. Ol i putim ol minista long lukautim ol dipatmen. Wankain olsem ol bisnis, olgeta ripot i save kam long bikpela bos na bikpela bos i save givim aut ripot long ol sia holda. Ol sia holda em yumi pipel bilong Papua Niugini.

Wanem hap tru yumi go rong? Husat tru kamap olgeta hevi yumi gat long kantri tude? Wanem taim bai olgeta samting i senis?

Long palamen na olgeta hap, ol memba i wok long tok pait na sutim tok long narapela arapela i stap. Olgeta taim mani i lus na kantri i nogat mani.

Nogat wanpela man i kamaut na toksave long yumi wanem hap tru yumi go rong. Nogat wanpela lida i kamaut na tok dispela em wanem samting i go asua na yumi stap olsem? Wanem taim bai wanpela i kamap na tok yumi mas mekim olsem nau bikos bipo ol i mekim olsem.

Olgeta toktok bilong ol em long "yu asua. I no mi mekim." Ol yet i sutim tok tasol ating em i gutpela olgeta praim minista bilong Papua Niugini i sindaun wantaim na tok aut long pipel bilong Papua Niugini wanem hap tru yumi i bin go rong. Husat asua long we. Skelim na lukim wanem hap ol i asua na stretim sindaun bilong ol pipel long hap.

Olgeta taim ol pipel i lukluk tasol i stap. Planti i save planim ol kainkain kes krop na karim milien mani i kam insait long kantri tasol dispela mani i go we? Yumi no lukim wanpela gutpela gavman sevis? kantri olsem Amerika, India, Australia i save gat klas sistem. Dispela em wanpela sistem we i save putim wanwan manmeri long

kainkain grup. Wanpela grup i moa gutpela long narapela. Sampela grup i nogut tru na i no gutpela.

Wankain pasin i kamap long PNG. Ol man wantaim mani i liklik namba tasol ol i holim olgeta samting.

Ol manmeri wantaim nogat samting i bikpela namba tru. Taim ol lain nogat i painim hat, ol i tanim na bagarapim narapela brata bilong ol. Planti stil pasin i kamap. Man i dai nating. Sindaun bilong ol pipel i bagarap.

Yumi sutim tok long husat? Asua i stap long wanem hap tru?

Ating gavman sistem bilong yumi kamapim sistem. Ol gavman opisal kisim bikpela pe na olgeta takis mani i pinis nating. Nogat sevis long ples na planti manmeri save painim hat tru.

Ol gavman opisal i kisim ka, slip long gutpela haus, kaikai gut na kisim bikpela pe. Ol manmeri tingting long kisim gavman sevis tasol husat bai givim ol. Olgeta sevis i kamap long taun tasol na nogat wanpela i kamap long ol rurel eria. Ol pipel wet i go nogat. Taim ol pipel painim hat, ol save kam long taun bai ol i gat sans long yusim sevis. Tasol nogat save bilong ol. Taim ol kamap long taun, ol painim hat long stap. Taim nogat wok na mani, ol bai go we? Ol tanim tasol na paitim na stil long narapela turangu manmeri olsem ol yet.

Turangu planti bilong ol dispela pipel i dai pinis. Planti stap long kalabus.

Lo bilong kantri tu i luk wansait stret. Lo em bilong ol manmeri i gat mani. Ol manmeri husat gat mani inap peim loya na kamap long kot. Ol manmeri bilong ples save painim hat tru. Wanem liklik pasin ol i mekim long stap laip, ol i brukim lo.

Taim ol memba mekim lo long palamen, ol mekim lo bilong helpim ol yet na bikpela kampani. Ol i no mekim wanpela lo bilong ol liklik manmeri. Taim ol memba

na gavman opisal stilim bikpela mani long bilong gavman, ol save kirap na tok em "misapropriesen" tasol taim wanpela liklik man stilim K100, em stilman. Dispela em wanem kain pasin? Ol man kisim na paulim bikpela mani i no kisim mekimsave long plis o go long kalabus.

Ol wok manmeri bilong gavman olsem plis, wada na ami i stap olsem was dok bilong ol bikpela gavman opisal long stil. Ol i no inap mekim wanpela toktok. Ol i sindaun na lukluk tasol.

Wanwan kain man olsem i kamapim bikpela mani taim em stil. Em i sanapim gutpela haus na i no wari long wanpela samting. Taim em gat mani, em i save olsem olgeta pawa i stap wantaim em.

Ol liklik manmeri bai stap pipia yet. Nogat lo luksave long ol. Lo bilong gavman em bilong ol bikpela manmeri husat gat mani. Husat inap kisim loya. Husat inap i go i kam long kot. Husat inap putim planti apil i go i kam na hairim kainkain loya.

Ol pipel nating husat nogat mani i stap long sait tasol. Ating ol i no asua tasol nogat sans kisim wanpela gutpela loya. Ating ol i slip long kalabus nating.

Husat yu ting yu kisim na kamapim sampela gutpela senis long komyniti bilong yu insait long 26 ya orait, yu amamas.


Long planti, Independens i no minim wanpela samting. Ating yumi pait na lusim blut na kisim independens long Australia, ating yumi inap amamas.

Yumi no lusim wanpela blut. Yumi kisim fri independens na yu stil planti na liklik manmeri nogat gavman sevis.

Wanwan manmeri kaikai gut na kisim planti insait long 26 ya Independens. Planti rurel pipel kisim taim yet, ating ol bai wet gen narapela 26 ya moa long kisim gavman sevis.





• Ol pikinini bilong Kairuku long Sentrel provins i brukim kundu long Gordon DMK skul long makim Independens De las wik Fraide. Lephon: Meri Kerema i soim stail bilong ol Kerema stret long wasim saksak long Hiri Moale na Independens De .




• Ol eks sevisman i karim Papua Niugini flak i go long hangamapim. Lephon: Gavana Jenerel Sir Silas Atopare (lephan) i kisim PNG flak long han bilong wanpela eks sevisman long Independens De long Septemba 16.


Ol Independens na Hiri Moale poto long las wiken



• Ol manmeri i soim ol kainkain samting ol i save mekim. Ol i soim long Ela Beach las wiken. Lephon: Ol boi Kaikuru tu i no isi long mekim nais long kundu na tromoi lek long makim Independens De las wik.



Tupela maunten i kamap birua



BIPO bipo tru i bin gat tripela welman i stap long boda bilong Mendi na lalibu insait long Sauten Hailans provins. Nem bilong ol em Kiluwe, Yalipu na Koraipe. Long dispela taim i bin gat wanpela lapun man nem bilong em Yombi.

Lapun man ya i no save olsem i gat tripela welman i stap. Tasol ol i save long em. Ol tripela welman i save laikim em moa yet na ol i save was gut long em. Taim lapun man i mekim ol trep nabaut long bus ol i save hangapim ol rat na kapul. Ol tripela welman i pasin tok gut tru na ol tok ol bai i no inap bagarapim em.

Mekim olsem i go na long wanpela taim lapun Yombi kirap na mekim wanpela bikpela kumu gaden. Em wok long katim diwai na klinim ples i go olsem na klostu long gaden i laik pinis na lapun kirap na katim wanpela laspela diwai. Diwai ya i go pundaun antap long haus bilong ol tripela welman.

Long dispela taim ol i go painim kaikai bilong ol yet na taim ol i kam bek ol i lukim olsem haus i bagarap tru, tasol rum bilong Koraipe na Yalipu i no bagarap tumas.

Taim Kiluwe i lukim olsem em belhat nogut tru na tromoi olgeta samting. Isi tasol em i tanim beksait long haus na lukim lapun i wok long katim diwai i stap, na em go kilim em na kaikaim em. Long moning tripela i ting bai tupela lukim lapun Yombi tasol nogat nois bilong tamiok i kamap.

Yalipu sore nogut tru na em krai i go inap moning. Em i planim olgeta bung na wokabaut i go long haus na i kisim hap diwai na brukim het bilong Kiluwe na het bilong em bruk. Kiluwe pilim pen na em kisim wanpela hap diwai na brukim het bilong Yalipu. Na bikpela pait kamap namel long tupela. Trangu Koraipe i stap namel long tupela na stopim tupela tasol tupela wok long pusim em i go aut. Tupela i pait i go inap moning na tupela hap i dai i stap. Koraipe i mekim wanpela hap tok olsem, Kiluwe yu save kaikai man olsem na i luk olsem bihain tu bai yu kaikai man yet. Na yu stap long hap. Na Yalipu, yu save sore long ol man na yu bai lukautim

ol yet olsem na yu stap long hapsait. Na Koraipe em yet em man stopim pait na em stap namel long tupela na ol lainim kamap maunten. Na nau mipela save kolim ol Mt Kiluwe, Mt Yulipe na Mt Koraipe. na long ples Yalipu i planim lapun Yombi em wanpal ples Yombi i stap. Na karai bilong em i tanim kamap wanpela wara ol i kolim Bune.

Taim yu go long Mendi insait long Sauten Hailans long Hailans haiwe bai yu lukim Mt Yalipu, Mt Koraipe na Mt Kiluwe raun wara bune na ples Yombi.

Michael A. Kokem Bomana, NCD.



Nem: Isacc G. Anokwampang
Krismas: 18 (man)
Adres: Asutech, P.O. Box 162, Cape Coast, C/R.
Save laikim: Mekim pen pren wantaim man o meri.

Nem: Mary Estum
Krismas: 13 (meri)
Adres: Saint Mary's Street, P.O. Box 28, Shama, W/R.
Save laikim: Singim, watchim muvi, senisim presens.

Nem: Gaba P. Anokwampang
Krismas: 15 (man)
Adres: Asutech, P.O. Box 162, Cape Coast, L/R.
Save laikim: Swim long wara, danis na senisim presens.

Nem: William Gau
Krismas: 15 (man)
Adres: P.O. Box 676, Lae, Morobe Province.
Save laikim: Raun wantaim ol manki, tok pilai, pilai spot, bekim olgeta pas mi kisim, na go lotu.

Nem: Luke Francis
Krismas: 19 (man)
Adres: P.O. Box 676, Lae, Morobe Province.
Save laikim: Pilai spot, wokim gaden, raitim pas, tok pilai, go long lotu, waswas long wara.

Nem: Clayton Francis
Krismas: 17 (man)
Adres: P.O. Box 676, Lae, Morobe Province.
Save laikim: Tok pilai, pilai spot, paitim gita, waswas long wara na bekim olgeta pas.

Nem: Hennix H. Asau
Krismas: 27 (man)
Adres: Vanimo General Hospital, P.O. Box 331, Vanimo, Sandaun Province.
Save laikim: Kisim x-ray piska long ol man, tok pilai wantaim ol pren. Harim reggae musik na painim wanpela meri long prenim na marit.

Nem: Leenard Tamis
Krismas: 16 (man)
Adres: Aitape Vocational Training Institute, P.O. Box 34, Aitape, Sandaun Province.
Save laikim: Pilai spots, harim gospel musik, go piknik, raun long stua, pilai gita na bekim pas na mekim pen pren wantaim arapela.

Nem: Dawen Bidau
Krismas: 16 (man)
Adres: St Ignatius Secondary School, P.O. Box 41, Aitape, Sandaun Province.
Save laikim: Pilai spots, harim musik, harim tumbuna stori, bekim pas na mekim pen pren wantaim arapela.

Nem: Elia Manuai
Krismas: 16 (man)
Adres: Aitape Vocational Training Institute, P.O. Box 34, Aitape, Sandaun Province.
Save laikim: Laikim long raun, h

Nem: Peter Koimo
Krismas: 15 (man)
Adres: P.O. Box 2160, Lae, Morobe Province.
Save laikim: Pilai spots olsem karate, kikkboxing, go lotu, harim musik bilong Gidix, mekim pren wantaim manmeri long PNG. Promise long bekim pas long ol prepren.

Nem: Stanley Rifi
Krismas: 18 (man)
Adres: P.O. Box 2160, Lae, Morobe Province.
Save laikim: Pilai soka, stori na lap, serim ol samting na bekim olgeta pas bilong ol prepren.

Nem: Rex Pari
Krismas: 19 (man)
Adres: P.O. Box 2160, Lae, Morobe Province.
Save laikim: Pilai soka, stori na lap, serim ol samting na bekim olgeta pas bilong ol prepren.

Famili stapim laik bilong mi

DIA LAIPLAIN,
Mi gat bikpela nid tru long yupela i ken givim edvais long mi. Mi gat wanpela gelpren mi laikim tumas. Mi save wok na meri ya em i stap long koles olsem na mitupela i bin stap longwe tupela yia nau.

Taim em i bin gat sampela problem, mi bin pilim sori long em na mi bin tokim mi yet olsem bai mi kamap boi pren bilong em na bihain bai mi maritim em. Tasol bihain em i bin kisim wanpela sik nogut. Mi inap long lusim em long taim na prenim ol narapela skul meri husat i bin askim long mi prenim ol tasol mi bin tok nogat bilong wanem mi bin strong long prenim dispela gel.

Laip bilong mi bai bagarap nau bikos em i givim mi dispela sik pinis. Mi lukim sampela sain bilong dispela sik i kamap long bodi bilong mi na mi pret tru long laip bilong mi. Mi wok long beten na bilip olsem bai mi stap orait.

Mi gat bikpela laik tru long em na mi nogat tingting kros long em. Mi tupela i no bin save olsem em i bin gat dispela sik inap em i bin go long haus sik na ol i painimaut



olsem em i bin kisim sik tasol mi painim hat long lusim em na tulet long lusim em.

I no long taim i go pinis wanpela pren bilong mi i bin tokim mi olsem meri ya i bin raun wantaim wanpela boi. Wanpela samting mi belhat tru long em em taim em i bin tokim mi stret olsem em i bin raun wantaim dispela boi. Dispela i no pestaim em i bin giaman mi. Em i bin giaman mi bipo na mi bin lusim rong bilong em na stap isi tasol nau mi no save kisim gutpela tingting taim mi tingim ol gutpela pasin mi save mekim long em. Mi bin mekim sampela samting na laip bilong mi tu em klostu i kisim bagarap.

Mi no save wanem samting long mekim. Mi tok mi tupela

lusim o maski. Mi no laik staitim nupela prensip wantaim nupela gel. Mi tupela i gat bikpela laik tru long mi tupela yet na sapos mi tupela lusim bai laip bilong em nogut bagarap. Mi bin tok nogat long raitim pas o tok-tok wantaim em, na dispela i mekim mi pilim nogut tru.

"FOOLED"

Dia Pren,
Tingting bilong yu i no stret bikos yu bin painimaut olsem meri yu save laikim tru na yu bin mekim planti gutpela samting long em i bin paul wantaim narapela man. Em i bin givim wanpela sik nogut long yu tasol yu laikim em yet.

Yu no bin tokaut klia sapos em i bin kisim dispela sik taim yu tupela i bin stap longwe long dispela tupela yia. Mipela i tingting nogut yu bin kisim dispela sik na givim long gelpren bilong yu. Sapos yu save tru olsem yu bin yusim kondom long silip wantaim ol narapela meri ating yu mas tok tru olsem gelpren i bin givim yu dispela sik.

Sapos gelpren bilong yu i no gutpela meri, bilong wanem yu save mekim planti gutpela samting long em. Nogut yu

laikim gelpren bilong yu bikos yu save driman long em i mas kamap meri yu yet i laikim long em na i no meri ya em yet. Yu tok em i gat bikpela laik tru long yu tu tasol mipela i askim sapos em ol trupela toktok em i bin mekim.

Yu tok tu olsem yu les long statim nupel meri tasol dispela tingting i soim olsem yu gat pasin bilong les nating nating. Bihain laip bilong yu wantaim meri husat bai karim pikinini bilong yu em i gutpela long yu wok hat long stretim o nogat?

Yumi no tok yu mas lusim gelpren bilong yu o yu stap wantaim em. Disisen em i bilong yu yet tasol mipela givim tingting long yu i ken tingim na mekim disisen bilong yu yet.

Mipela i no save long yu na gelpren bilong yu. Em yu yet save gut long pren bilong yu na yu yet i save long wanem samting yu laikim long laip bilong yu. Mipela i gat bilip olsem yu na gelpren bilong yu i ken tok-tok long ol dispela samting bikos em bai kamap long laip bilong yu tupela. Sapos yu ting em i no rait meri bilong yu orait mipela i ting olsem yu ken gat strong long lusim em na painim wanpela nupela meri husat bai givim yu wanpela kain laip em yu i laikim long em.

LAIPLAIN

KANAGE



Kanage bilong Kavieng taun. Em i gat wan-peal pikinini tasol na em i putim em long skul. Bihain long skul em i save kam na papa Kanage tupela i save lainim hom wok. Na pikinini bilong Kanage askim papa bilong em, "Papa wan ples wan na papa Kanage i tok tu na pikinini ken askim papa gen tu plas tu na papa Kanage i bekim ansa na tok tri na pikinini i tok, "Papa yu rong na Kanage i tok nogat em tri ya." Pikinini i tok, "Nogat ya" dedi ansa em foa ya. Kanage i bekim na i tok, "I tru-ol senisim pinis. Bipo i bin tri ya." Na pikinini tok ol i senisim pinis na olgeta man husat i harim dispela stori ol i kil long lap.

Seve Kapem Ericho Kavieng

Wanpela taim Kanage wantaim wanpela liklik manki tupela i stap na Kanage i no save olsem dispela liklik boi i save smok. Kanage kirap nogut long lukim liklik boi wok long smok i stap.

Na Kanage kirap na i tok, "Olgeta liklik manki olsem yu long Papua Niugini ol i no save smok, yu tasol wok long smok na yu lusim nau. Nogut sampela kisim skul long yu.

Kanage tu i no gat maus gras bilong em. Na liklik boi i kirap na bekim na i tok olgeta man bilong Papua Niugini ol i gat maus gras tasol yu tasol i no gat maus gras so yu mas painim maus gras na putim.

Seve Kapem Ericho Kaveing

Kanage em bilong Hafaru long Henganofi distrik. Em i bin pinisim gret 5 na em i ting olsem em i kisim bikpela save na em i lusim skul. Na wanpela taim em i kisim. Wanpela meri i kam long haus bilong en. Insait long haus ol liklik brata bilong em i pulap i stap na em i hait long tok ples o Tok Pisin na em i laik toktok long tok Inglis bai ol liklik brata i no ken harim tudak wok long kam nau na Kanage tokim meri ya yumi slip nau na olgeta i slip. Kanage lus long ol liklik brata bai

harim na em i katim long spikim Inglis na i tokim meri. "You hold my my somthing and I hold your something. Yu put it and I press it," ol liklik manki i no save liklik ol i paul olgeta.

Seve Ericho Kavieng

Kanage Hafaru Henganofi provins. Wanpela taim bilong maket na olgeta man i bin kam bung na ol dokta tu i bin kam long givim marasin na ol sampela kondom tu. Ol dokta i wok long givim marasin long olgeta man pinis na Kanage i kam long lain ol dokta givim marasin wantaim kondom na em i go sindaun.

Na em i tingting i go hau em-bai yusim bihain em i kam isi na askim ol dokta, "Plis dokta bai mi kaikai nating ol dring wantaim wara." Dokta i no eksplen tru bikos planti man tu na dokta tok, "Yu yu karim i go long haus na meri bilong yu bai soim yu." Kanage karim i go long haus so yumi no save meri bilong em mas soim em.

Seve Kapem Ericho Kavieng

Kanage i no save long tok pisin na em i gat 75-pela krismas. Em bilong ples Suave long Simbu provins. Wanpela moning em i go long Kundiawa Haus Sik.

Long rot Kanage i bungim wanpela wait meri na meri ya i tok moning long Kanage.

Kanage i lukim wait skin na waitpela pes na ting wait meri ya i tok wanem long mi. Em ting meri ya i tokples na tok em kaikai tumbuna bilong Kanage.

Em nau Kanage bekim wankain long meri ya na tok bik peks tasol wait meri i no save na i go pinis.

Martha Onny Bialla

Kanage bilong Is Sepik long hap bilong Dreiks na em i kisim blok long Wes Niu Briten provins na em i stap. Wanpela taim Kanage i katim oil palm i go na em i tuhat nogut tru na em i kisim tupela liklik manki i go long wara Ganuka na ol i waswas i stap. Ol i no save olsem tripela man tu i kukim mambu arere long wara Ganuka. Taim tripela man ya i kukim mambu na mambu ya i pairap olsem sotgan, Kanage i kirap nogut. Na em i tokim tupela liklik manki olsem, em wanem pairap ya! Sotgan o ami pairapim bom na ol i ronawe na i no tingting long kisim trausis bilong em. Taim ol i ronawe i go na Kanage i lukim olsem em nogat trausis long bodi bilong em em i tokim tupela liklik manki na ol i go bek long wara Ganuka na ol i kisim trausis pinis. Kanage i lukluk i go dauri long wara na em i lukim sedo bilong paia i lait aninit long wara na em i tokim tupela manki olsem lukim sedo bilong wara i lait aninit long paia. Tripela man ya i harim na i lap indai long Kanage. Kanage i sem nogut tru na i krosim ol long Inglis.

Vincent K. Paulus Kimbe

Kanage i bilong ples Wamati long Makam, Lae. Kanage i save go maket long Kema olgeta taim. Wanpela Sarere moning Kanage i go maketim buai i stap na wanpela bikfut bilong Hailens i kam long baksait bilong Kema. Isi tasol bikfut i tok, sampela buai i kam. Tingim, Kanage em hapman tu ya. Taim bikfut ya i askim em long buai, tingting bilong Kanage i ronawe pinis. Insait long tingting bilong em em i tok. Kanage bai givim mit buai bilong Makam na yu lukim. Kanage i no tingting long salim buai bilong em. O nogat ya. Taim Kanage i tanim na i laik lukluk i go, bikfut resa i salim pas na i kam pas long het bilong em. Kema nogat ya i rausim buai stap na tanim long toktok wantaim resa ya. Isi tasol bikfut i lesa ya i soim yumi long em na Kanage lus nating.

Dau Nikcy Markam



Senisim pasin bilong vot

Dia Edita,

Papua Niugini mas gat gutpela saveman bilong em yet nau long dispela taim. Yumi i no inap long stap olsem ol liklik pikinini tasol aninit long save bilong ol arapela kantri.

Mi mekim dispela tok long wanem i gat planti kain bagarap nau i wok long kamap bikpela tru long olgeta hap bilong kantri na dispela em i no gutpela tumas.

Papua Niugini em i yangpela kantri tru insait long 26 yia Indipendens bilong em na em mas lainim gut ol samting bilong em yet long gutpela stat i go inap long taim em i kamap strong.

Nau yet sapos yu lukluk gut insait long kantri bilong yumi long sampela kain isi rot bilong kisim toksave olsem long redio o

nuspepa bai yu lukim na harim olsem dispela kantri em i nogat strong na pawa strongim gen wanem kain indipendens em i kisim pinis.

Dispela em i no inap kamap olsem taim yumi tok yumi kisim Indipendens pinis. Yumi mas tingting gut nau na makim trupela lida long sanapim gen mak bilong kantri na helpim sindaun bilong yumi i ken kamap.

Gutpela rot bilong kamapim lida tu em i no wanpela i go samting mi laik tokim yu husat manmeri bilong Papua Niugini insait long dispela 2002 ileksen yumi wanwan i mas tingting gut pastaim na makim wanem man tru em yu ting bai em inap tru long helpim sindaun bilong ol pikinini long bihaintaim.

Harim gut. Pawa bilong vot em i stap long han bilong yu na yu dispela man o meri yu gat rait long senisim pasin bilong-vot, na dispela pasin bilong senisim vot em i mas stap aninit long rifom sistem bilong gavman bikos gavman i gat dispela sistem pinis.

Ating yumi ken kolim olsem Rifoming Sistems ov vot o pasin bilong kamapim gen na stretpela vot.

Mi mekim dispela tok long wanem ol rot bilong vot we yumi save vot pastaim em i bihainim tasol tingting bilong ol saveman bilong arapela kantri na dispela kain vot tu i no bin kamapim wanpela gutpela senis long kantri bilong yumi.

Long aninit bilong olgeta manmeri na pikinini bilong Papua Niugini mi laik mekim strongpela toktok bilong mi i go nau long lektoret Komisen Mistā Ruben Kaiulo long lukluk gut long dispela we o sistem mi kolim pinis na senisim pasin o rot bilong vot.

Tingim gut. Dispela kantri bilong yumi em i gat ol kain pasin bilong em yet olsem, pasin tumbuna, pasin bilong bilip na pasin bilong lotu.

Skelim gut ol tripela pasin bilong ol manmeri long ples yet na traim stretim rot bilong votim man.

**G. Dizie
Kimbe, WNPB.**

Ol pipel wet long toksave

Dia Edita,

Mi wanpela rijisted memba bilong Japanese Viktim Grup i laik save moa long risit mipela i bin baim long en. Mipela sampela bilong bus ples na tu ol lapun bilong taun i no kisim klia toktok long dispela olsem na mipela olgeta i bungim maus na raitim dispela pas.

Mipela i bin pinisim sampela mani long baim ol dispela ricipt olsem

mipela risit Gabriel Laku man husat i go pas long kam aut long redio na nuspepa long mipela ol Papua Niugini mas harim na i stap. Wanem as na yu no kamap long redio o nuspepa na tok klia long mipela olsem samting i klostu o hevi i stap long gavman.

**Alex K.
Middle Ramu, Mad/P.**

Walis Ailan opim ai na vot

Dia Edita,

Mi tupela brata hia i laik putim tingting brata i laikim yupela bilong mitupela long olgeta manmeri long Ailan Walis i mas opim gut ai na makim X bilong yu wan wan. Makim X bilong yu long nupela trupela lida long bringim

Na 2002 ileksen em

ran i kam klostu pinis.

Olsem na mitupela brata i laikim yupela olgeta manmeri long opim gut ai na makim X bilong yu wan wan. Makim X bilong yu long nupela trupela lida long bringim

sevis i kam insait long ailan bilong yumi long dispela nupela milienium.

Walis Ailan manmeri opim gut ai na makim wanpela X tasol.

**Pius Yefi
Kinapot, ENBP.**

Ol pipel i tuhat long wok

Dia Edita,

Mi laik autim wari na belhavi bilong mi long memba bilong Kabwum Ginson Saonu. Ol manmeri bilong Kabwum makim yu nesenel memba na traim na baim buldosa, tipa na ol wok.

Plis yu baim spet savol, kruba na arapela samting bilong wok na yu givim manmeri bilong yu na tarangu ol wok wantaim tuhat long rot bilong ka.

Long sait bilong Timbe eria em Molon tu Ongakoi. Mi lukim ol i wok wantaim tuhat long namel long Molon na Ongakoi faivpela ples ol wok bung wantaim. Ol i wokim rot bilong ka na long sait bilong Selepet em Kamandau na i go olsem long Dolo viles na long sait bilong

Komba tu.

Plis dispela wok em papamama na sampela tumbuna bilong mipela i no lukim rot bilong ka na sip, balus na ol wok long dispela samting bilong wok savol, kruba na arapela samting.

Ol i no lukim ka na sip balus na ol yusim dispela samting na wok long ples balus stap insait long Kabwum eria.

Traim na yu luksave long manmeri bilong yu.

Dispela em belhevi bilong mi. Mi autim long Wantok sampela brata yu sapotim o agensim dispela em rait i kam long Wantok na mi lukim.

**Pateng Kamonkotep
Lae, MP.**

Helpim bilong Yus i stap we?

Dia Edita,

Mi wanpela pikinini Yus. Olgeta taim mi save lukim komplek long Wantok nuspepa olgeta taim na nau tu mi laik salim i go long ol wokman bilong yu. Olgeta taim mi save harim ol save tok long wokim rot bilong ka long Lae, Dinangat i go long Wasu na em mi no lukim promis bilong ol kamap olsem na mi laik tok olsem yupela wanem kain wokim i wokman long mekim

dispela toktok.

Mipela i no pik dok bilong yupela ya? Pipel i stap na yupela i stap, nogat bai yupela nogat, yupela ting mipela giamanim ol tasol yupela i giamanim God na yupela wok long kisim pe na paulim planti wok bilong helpim pipel long 5 yia plen bai kamap tasol 5 yia i kam i go pinis nau i nogat wanpela gutpela sevis i kam insait long Yus eria long wanem presiden Mista Epemu wantaim sam-

pela wokman i no ronim gut wok long Yus na wok long bagarapim pipel. Ol pipel wanem longlong bilong yu a? Yu mas yusim gut het bilong yu na sevim ol pipel.

Dispela tok em i no nau longtaim mi mangi yet mi harim dispela tok na i kam inap nau na mi putim komplek bilong mi go long ol wokman bilong gavman i lukim na klia.

**Bimas Masawak
Wasu, MP.**

Givim sans long Wingti

Dia Edita,

Mi wanpela manki Kumdi insait long Mul Distrik, Westen Haians provins. Mi laik tok olsem, Pais Wingti em i wanpela rait lida bilong kantri.

Ol pipel bilong Westen Haians, yumi i no luksave gut na votim ol rong lida, na yumi save tok kantri bagarap, man em tambaran i mekim o yumi mekim?

Tingim gut long yia 2002 Nesenel ileksen. No ken harim ol giaman tok-

tok na tromoi vot nating. Sapos yu wanpela grasrut man o meri tingim gut bihain long femili bilong yu, las de i no yet.

Sapos yu bikhet sori tumas mi ken tokim yu bai yumi kaikai das na paitim kaukau na nogat developmen bai kamap long provins bilong yumi.

**John Kori
Mt Hagen, WHP.**

Tewae Siassi i no senis

Dia Edita,

Mi wanpela manki Ziwe long Sialum Tewae Siassi distrik. Insait long Tewae eria i no gat senis antap long maun-teri na long nambis na no gat wanpela sevis mitupela i stap olsem 1960 na 1940.

Dispela komplek i go long memba bilong Tewae Siassi Mista Mao Zeming.

Yu stap we? Ating yu stap bai i gat senis long Tewae eria. Mipela les long yu paitim bros long palamen. Yu no developim Tewae eria

olsem na yu no ken paitim bros nating, em pasin bilong sem.

Mipela ol votas bilong yu long Ziwe o Tewae eria mipela lukim dispela pasin i no stret.

**Kima Matok
Sialum, MP.**

Givim bek pawa long Enga

Dia Edita,

Mi bin lukim o mi harim ol sampela manmeri bilong narapela provins i tok gavman bilong Enga. Peter Ipatas em i wanpela nambawan gavana long ol narapela gavana bilong dispela kantri.

Em i save wok wantaim ol Enga pipel wok wantaim provin-sal gavman wok wantaim lokal gavman kaunsil, wok wantaim viles komyuniti pipel, wok wantaim sios komyuniti pipel na lukluk long ol yangpela manmeri stap long skul.

Na em go raun long ol bus ples na lukluk long et pos, topap komyuniti skul haikul haus sik, rot, na bris insait long provins.

Manki Enga yet tasol Mi stap long Kiunga Westen provins.

Na mi askim nesenel gavman long mekim disisen bilong Enga gavman Peter Ipatas na givim pawa bek bikos nesenel ileksen i kam klostu na em i mas soim pipel bilong em long Enga.

**Leo Lyangao
Kiunga, WP.**

Sem pasin bilong painim mani

Dia Edita,

Mi wanpela manki bilong Westen Haians provins tasol nau mi strit manki long Kimbe taun.

Long ai bilong em stret mi stret lukim tripela ol meri bilong Seksen 21, 10 na Kumu gras setelmen arere tasol long Kimbe taun i bin i go insait long tupela bikpela stua na stilim ais mit na sosis plestik.

Taim ol i kisim insait long stua

isi tasol apim blaus bilong ol na takim i go insait tru long as bilong ol na tekov i go ausait long dua.

Em ol dispela meri mi save gut long ol na taim mi lusim taun na i go raun long setelmen mi lukim ol dispela meri sindaun rostim sosis na ais mit ol i bin stilim long en em ol i wok long salim i stap.

Kange mi lukim na mi kirap nogut bikos long ai bilong mi

stret em mi lukim ol i takim samting bilong kaikai na wai i salim bilong publik bilong baim na kaikai.

Dispela pasin ol i mekim bilong kilim planti manmeri na pikinini so nau mi rait i kam long Wantok nuspepa bai ol pipel long Kimbe i ken lukim.

**Peter Kolmo
Kimbe, WNPB.**

Yusim gut mani

Dia Edita,

Mi wanpela manki Lumi Aitape Open tasol nau mi stap raun raun long Vanimo distrik i laik salensim ol papa graun bilong Vanimo distrik.

Yupela ol papa graun bilong Vanimo yupela save kisim royalti mani na yupela save putim long we. Plis traim na yusim het bilong yupela.

Long Inglis ol kolim common sense maski long karim bikpela mani na raun long Mosbi siti na grisim ol meri long siti na bek yad bilong yu yet i no gutpela ples ken i bagarap.

Taim na baim gutpela kondisen ka na PMV bas. Nogat ol kam man tasol mekim bisni; na apim nem bilong Sindaun na yu yet asples sutim mani long bia, OP na patrol long Jayapura olsem ples mama i karim yu long en.

Plis traim na yusim het. No ken pilai pilai long mani olsem mabol traim na mekim yus long mani. Mi save lukim taim bilong fotnait papagraun manmeri save wetim ka long kona tu kona. Sapos yu yusim em mani bai yu baim planti PMV.

No ken kisim mani na kamap biksot long olgeta hap kona bilong PNG.

Mi salensim Bika na mi lukim na tingting bilong mi raun olsem masin.

Papagraun mani kilim ol stret tasol. Nogat developmen. Na ol raun long Mosbi. Developmen save kamap ong Royalti na bihain kamap long gavman.

**Waure Kalex
Vanimi, SP.**

No ken wansait long bus lain

Dia Edita,

Mi wanpela Inlen manki bilong Madang provins. Mi bai skul na stap long Madang taun. Mi raun long taun na mi wok long lukim hau ol taun kaunsil bilong Madang ol i wok long kontrolim dispela liklik foa kona Madang taun ya!- Plis bikpela wansait stret i stap.

Mi save krai long ol papamama bilong mi long bikbus we ol save kam raun long taun ya. Plis ol dispela kaunsil ol lukluk long ol bos lain tasol. Tarangu ol kaikai buai na spet pinis long rot na ol kam long taun tasol ol dispela kaunsil i save miting nating long kisim mani long ol.

Mi save lukim planti ol wok man long taun olsem bas draiva, ol opis manmeri, plis-man na ol strit manki nabaut ol i save kaikai buai, tromoi pipia nabaut tasol bilong wanem as na ol dispela taun kaunsil i no tokim eksen long ol dispela lain?

Na ol lukluk long ol tarangu bos lain tasol. Ating lo bilong Madang taun i tok long lusim mani long ol bos lain tasol ya! Plis lusim pasin bilong wansait na wokim samting stret na klinim taun ya.

**Reps M. Tarape
Rai, Mad/Provins.**

Wantok sistem yet

Dia Edita,

Mi wanpela manki Morobe tasol nau mi i stap insait long Kimbe Wes Nu Briten provins.

Na wari bilong mi i go olsem mi save lukim ol meri save wok long haus kaikai na ol supamakot long Kimbe ol save wokim wantok sistem.

Sampela save lukim olsem sapos wanpela wantok bilong ol i go givim

K1 bai ol kisim wanpela lans pek na wan sosis flaua na wan Coca Cola botol long dispela wanpela K1 tasol.

Ol sekuyuriti o bos yupela painimaut na pinisim ol dispela kain meri long wok na kisim ol nupela meri long wok long ol haus kaikai.

**Jacob Joe
Kimbe, WNPB.**

No ken helpim ol biksot tasol

Dia Edita,

Mi wanpela pikinini Nuku, na stap nau long Aitape. Mi laik autim belhvi na wari bilong mi long memba bilong Nuku Andrew Kumbakor. Mi sapatim pas bilong brata ya, Paul Kumbakor bilong May 10, 2001.

Taim em tu stap long ples mi harim olsem Kumbakor em wanpela top sot bilong Papua Niugini. Em long luksave biong mi em ken tokaut stat olsem, em tok sot nating wantaim no gat wok kamap long Nuku.

Minista, mipela olgeta manmeri, lapun na pikinini i wok long lusim wanpela pen stret na karim na singaut long yumi olgeta de na nait long wanem? Em long rot tasol.

Mipela ol tarangu lain long ples i no askim yu long baim ka, sip o balus, o wokim ol ain pos

banis bilong mipela, o givim mani long krai long em long olgeta de na haitim em long rot.

Plis memba inap na stapim pasin bilong feveretim ol biksot tasol na stretim laik na wari bilong yumi ol pipel long ples.

Mi harim long vidio, ritim long niuspepa, lukim long EMTV oslem Mai Tadij Arkosame rot bai stat tasol no gat wanpela sain bilong kampani i statim rot. Memba yu smat tru long kamap long miidia na ol man i ting yu mekim gutpela wok kamap long ilektoret long yu.

Maski long pariap nating long pablik midia.

Memba olsem wanem na Nuku stesin em i bus karamapim? Na tu olsem wanem tru bai na i no gat wanpela ka

nau i go insait long Nuku stat long las yia i kam inap nau?

Sapos yu laik salim ol pas bilong yu i kam long dispela niuspepa. Salim i kam long dispela adres:

THE EDITOR
WANTOK NEWSPAPER
PO BOX 1982,
BOROKO, NCD.

Em orait Minista Hon. Andrew Kumbakor, 2002 em wanpela yia tu ya. Yu stap na kisim Ben Yum,

Terence, Anton, Tony Waha, Bid Parunaka, Fidelia Nantuna, Robert Wasave, Harry Boro na ol sampela sot tu raun long kempen na tu long taim bilong vot.

Lucas Wulai
Nuku, SP.

PDM gavman bagarapim PNG

Dia Edita,

Plis gutpela manmeri Papua Niugini taim bilong ileksen kamap klostu tru nau na no ken longlong na paul nabaut.

Maski tambu tru bilong yu maski brata Ungle Kendure o wan lain o wan haus man sanap long kendidet long kamap memba tingim gut.

Yu mas tingim gut tru, nau yet yu mas luksave long Pati bilong en. Planti bilong yumi i no gat tingting yumi no gat het.

Wanem samting dispela PDM gavman mekim long stilim olgeta bisnis bilong Gavman, yupela save o no gat?

Husat tru bai papa long ol dispela samting taim ol salim aut. Yumi olgeta i no inap save PDM Gavman tasol save husat i papa bilong ol dispela gavman bisnis.

Giaman ol memba bilong yumi kirap na tok sampela ol bikipela kampani bilong ovasis baim ol dispela gavman bisnis olsem Air Niugini.

Telikom, PNGBC, Harbours Board na sampela moa. I no long taim ol bai salim haus sik bilong yumi na tu olgeta skul insait long kantri.

Sapos wanpela kampani baim ol haus sik mi tokim yu stret planti ol man long ples bai dai nabaut bikos pe bilong kisim marasin yumi givim wan kina na tu kina bai i go antap long 50 kina na 100 kina, bikos em bisnis ya ol i laik pulim moa mani na marasin fi bai go antap moa moa yet.

Na sait long skul mani bai go antap pikinini bilong mani man.

Yu save nau ol manmeri bilong PNG? Em PDM

Gavman tasol bagarapim yumi nau.

Olgeta 70 memba bilong yumi lusim oposisen na i go joinim Gavman ya pasin tok na kamapim lo na tanim bek na bagarapim yumi.

Gutpela manmeri bilong Papua Niugini nau yupela mas sori long dispela 30 memba bilong yumi nau stap long oposisen stori long ol na mekim pre long ol na i hat long ol ken win bek long 2002 gen na helpim yumi.

Ol nogat moa pawa long stopim Gavman bikos memba em liklik long 30 o 32 tasol. Wanem samting PDM Gavman laik mekim ol mekim tasol bikos no gat strongpela oposisen namba em daunbilo tumas.

Plis Papua Niugini yumi i no longlong yumi no save kaikai ol nupela kaikai i no tan long en.

Sapos 2002 ol win gen yumi bai kisim taim nogut na nogut tru. Mi save PDM bai pilaim bikipela mani tru long 2002 em sans mani bilong Gavman yu kisim dispela mani na kaikai, dispela i no stil em mani bilong yumi.

Gavman save paulim na holim na kisim mani na vot bilong yu givim narapela pati.

Sapos yu i no harim tok na longlong wantaim PDM em wari bilong yu pen na hevi yumi olgeta bai painim.

Peter Kerua
Mt Hagen, WHP.

No ken wanpela grup bosim Kimbe maket

Dia Edita,

Mi wanpela man long Wes Nu Briten provins. Mi laik autim tok i go long pablik long Wantok niuspepa na ol man long Kimbe bai luksave. Long Kimbe maket yu go lukim olsem em maket bilong Sepik lain tasol. Ol asples na sampela provins bai go hait. Ol bai kontrolim maket.

Ol meri Sepik i no save givim sans long sampela long baim buai na daka. Ol bai go pulim na kisim nating trangu ol wokman toktok ol meri Sepik bai sarapim ol. Ol meri Wosera bai yu lukim olsem ol lukautim maket.

Olsem na yupela ol meri Wosera givim rispek long narapela tu. Yupela wokim na bagarapim gutpela nem bilong Sepik.

Olgeta traime na karim liklik na inapim rispekim ol arapela i salim ol buai daka na ol kaikai o ol man ya bai sindaun gut na salim kaikai bilong ol.

Olsem na yupela ol meri Sepik na narapela hap mas respekim ol meri bilong mipela ol asples.

Bai Isaiiah
Kimbe WNBK.

Mama go bek skul

Dia Edita,

Mi laik bekim na sapatim toktok bilong brata Ibudi Yasag. Pas bilong em i bin kamap long Epril 26, 2001.

Mi wanpela manki Is Sepik. Tasol nau mi i stap long Biella, Wes Nu Briten provins. Mi lukim dispela pasin i kamap bikipela tru long ol haikul. Mi lukim sampela skul meri i gat wanpela tupela pikinini ol i go skul gen.

Dispela kain em i pasim ples bilong ol gutpela sumatin long i go long haikul.

K. James Sakal
Biella, WNBK.

Rausim ol blek maket long Lae mein maket

Dia Edita,

Mi wanpela manki bilong Mumeng na mi save raun long Lae maket na mi save lukim dispela pasin i no stret.

Dispela ol blek maket meri save baim kaikai na kumu insait long mein maket na serim gen insait long mein maket yet.

Dispela kain pasin em i no stret. Ol mama long ples i save kam long maket na taim ol i

lukim olsem ples bilong sindaun insait long maket na salim kaikai i pulap bai ol i go ausait long ples we ka i save kam stap long en na salim kaikai.

Dispela em i no gutpela tumas sapos yu husat het bilong dispela mein maket.

Yu mas rausim ol dispela blek maket meri i go bek long blok bilong ol na maket.

Maski long baim

kaikai na salim gen long mein maket na pasim spes bilong ol mama long ples.

Sapos yu pilim olsem yu no fit long taun, maski lusim na go long asples bilong yu. Bai yu kisim fri long graun bilong yu yet na salim long maket na kisim mani i nogat profit bilong en.

Sulpiap Yulava
Lae, MP.

Plis dipatmen long Kimbe wansait

Dia Edita,

Mi wanpela manki Nipa insait long Sauten Hailans provins tasol nau mi i stap long Kimbe. Mi lukim planti wantok sistem long plis pos long Kimbe.

I no gutpela long wansait long lo na oda i bin i gat wanpela de i bin kamap long Malilimi plentesen divisien; one insait long Wes Nu Briten provins. Meri em wanpela meri Nipa long

Sauten Hailans provins. Meri no dai nating long sik tasol ol manmeri long Simbu provins i bagarapim em long ples klia stret. Bihain plis long Kimbe i kotim lain bilong meri ya dai.

Nem bilong ol boi i stap wait kot long Laikimata Haus Kalabus.

Ol plis sasim ol dispela lain bilong meri dai nating tru na ol i no wokim wanpela samting long ol lain Simbu bagarapim meri dai long en.

Dispela soim wansait o sistem bilong plis long Kimbe het bilong dipatmen long Pot Mosbi mas lukluk long dispela kain sistem kamap long plis fos long Kimbe

Namapon Kembo
Roman
Kimbe, WNBK.

Papua Niugini i no ron gut

Dia Edita,

Sampela taim mi save baim niuspepa na mi ritim ol kain kain tingting bilong yupela, sampela i gutpela tingting.

Sampela bekim pas. Sampela salensim arapela na narapela. Mi sori tru long yupela ol yangpela bilong bihain.

Mi ting na mi bilip na mi sori. Wai mi tok olsem? Bikos mi save gavman i wok long senis na bagarap klostu klostu.

Mi wanpela leba man bilong Sandaun klostu

long boda bilong PNG na Indonesia. Mi sori long ol na pasin bilong mi bilong Wamena ples, nau ol i mekim wanem?

Mi save bai mi harim long sampela taim mi stap yet o mi dai pinis.

Gavman bilong PNG i wok long draivim sip MV PNG. Na em i wok long sot nau long spea pat bilong enjin na i wok long olpela nau. MV PNG bai i go long wanem hap nau?

Ol tumbuna papa, pikinini kantri na tumbuna bilong mi. Mi lukim olsem sip bilong yupela bai i no inap gutpela ziro. Bai yupela kamap ziro, ziro olsem sampela kantri olsem Wes Papua, Is Timor na sampela hap moa bai yupela kamap olsem.

Mi lukim olsem Buka ol i fit na ol i rait olgeta. Bikos ol laik lukautim ol yet. PNG em i kamap ziro o nogat na laspela olgeta long stiaim MV PNG. Mi man bilong i dai na mi toksave i stap long yupela. PNG sip i sua pinis long rip.

Mi lukluk i go bek long 1960 taim Australia gavman i lukautim mipela PNG. Olgeta wok na mani i go antap tu det long olgeta wok kamap o

nau yupela save kolim wok developmen. Tasol nau yumi stap gutpela lida bilong PNG. Kisim mani long Wol Benk i go insait long fotnait pe bilong ol memba long poket trausis bilong ol. Yupela tarangu yangpela i go lapun i dai nating olsem tasol. Nogat senis.

Olgeta provins i krai long rot, bisnis na arapeal samting. Husat bai i mekim o stretim wari bilong yupela ol yangpela nogut na bagarap stret.

Nau 2002 ileksen klostu bai kamap nau. Pipel bilong Sandaun opim tingting leva na maus bilong yupela nau no ken joinim PNG gavman moa. No ken votim ol kendidet moa yumi pipel i westim tam bilong yumi long kisim pen na makim X fom nating nogat pe bek bilong X.

Planti lapun i dai nating long putim X bilong ol. Taim ol i dai, ol i dai wantaim wanpela brukbruk snot na trausis i go long matmat. Nogat luksave bilong gavman stret. Mi save planti yupela ol yangpela bai sapatim tingting bilong mi.

Nakombo Matthew
Aitape, SP.

Ol yangpela i laikim nem bilong ol i stap insait long niuspepa long painim pen pren i mas prinim tupela nem wantaim adres, na wanem samting yupela i save laikim long mekim (hobbie).

Special Features

are an integral part of news reporting.

And at Word Publishing, we do our best to present reports that are fair, informative as well as educational.

If you are celebrating an anniversary, launching a new product or opening a new building, call our supplement Editor or Advertising Manager on:

PHONE: 325 2500 or

FAX: 325 2579

The Independent

P.O. Box 1982, Boroko, NCD, Ph: 325 2500 - Fax: 325 2579

Email: word@global.com.pg

Special Advertising Offer

Commencing 25th January, 2001.

***FREE Two line advert in
The Independent
any category.***

*** C O N D I T I O N S A P P L Y**

Conditions:

Maximum of 46 characters including space allowable

Maximum number of insertions 4

FREE Two line advert in
The Independent any cat.

The Independent reserves the right to reject proffered advertisements

Ol Spot Dro

Toksave
Salim ol dro, risalts na poin lada i kam long Wantok Niuspepa long Tunde olgeta wik. Salim i kam long Spots Edita:
Fax: 325 2579 o ringim em long telepon no: 325 2500

PORT MORESBY SOCCER ASSOCIATION

Saturday, September 20, 2001.

Bisini One

0800	Y2	Arnotts Ela Utd v Gordon Secondary
1000	W2	BFW PS Utd v Kula
1200	Y1	Rapatona v BFW PS Utd
1400	D4	Rapatona v LBC Defence
1545	D2	Haku v Buresong

Sunday, September 21, 2001.

Bisini Two

0800	D3	Manambu v Momase
1000	W1	Cosmos v ANZ University
1200	D1	Kurti-Andra v Murat
1430	Prem	Cosmos v BFW PS Utd



AWILUNGA BASKETBALL ASSOCIATION


Weekend Draw

Saturday, September 22, 2001.

0900am	Nari Bubia v Drymates	W
0955am	Langs v Drymates	M
1050am	Awilunga v Langs	W
1140am	Nari Bubia v 11 Mile	M
1230pm	E. Mauntens v 11 Mile	W
0120pm	Awilunga v E. Mauntens	M
0210pm	Awilunga v E. Mauntens	W
0300pm	Nari Bubia v Langs	W

Sunday, September 23, 2001.

1100am	Drymates v E. Mauntens	M
1155am	Awilunga v Nari Bubia	M
1250pm	Drymates v 11 Mile	W
0140pm	Langs v 11 Mile	M
0230pm	E. Mauntens v Langs	W
0320pm	Awilunga v Drymates	M



Rabaul Guria winim SP Cup



• Bubu holim gut bal. I noken ting ol yangpela tasol i save pilai netbal. Ol lapun tu i gat namba. Dispela em kain stail long Pot Mosbi ya.

AGMARK Rabaul Guria i winim SP Cup bihain long ol nekim Goroka Lahanis 16-8 long gren fainel las wiken.

Dispela win i kamap bihain long gutpela pilai bilong tupela Kumul pilaia Chris Purkikil na kepten bilong em, Michael Marum.

Guria i winim SP Cup bihain long namba tri taim. Ol i bin pilai long gren fainel bilong SP Cup tupela taim i go pinis. Na long namba tri, ol i winim dispela bikpela sempionsip tropi.

Long 1999 ol i lus Goroka Lahanis, na long 2000, Rabaul Guria i lus long Enga Mioks. Olsem na long namba tri taim,

kepten Michael Marum na ol boi i pasin olgeta toktok na winim dispela SP Cup.

Guria i kisim SP Cup wantaim K18,000 prais mani na Lahanis i kisim K9,000 long pinis namba tu.

Lahanis i opim skoa buk taim kepten na huka Fatty Buka i setim bikpela fowat Tarzan Malaguna long skoa.

Ol i kikim konvesen na skoa nau i sanap 6-0.

Ol i pilai strong tru we ol pilaia bilong Lahanis i paul na ol i takolim ol yet we i lukim winga Jeffrey Bai i bamim het wantaim bikpela fowat Makali Aizue.

Taim Jeffrey Bai i aut, ol Rabaul Guria i kisim win long wanem ol i save em bai trikim ol gut tru ya.

Guria i gat sampela sans long skoa insait long namba wan hap tasol Lahanis i banisim ol gut tru.

Insait long las tri minit, Jessie Alunga i putim trai na Normyle Eremas i kikim konvesen na skoa nau i sanap 6-6.

Insait long namba tu hap, Guria i laik winim tru dispela gem. Olsem na ol fowat bilong ol olsem Walter Vagaia, John Waka, Kelly Nopi, Oscar Tonga na Lucas Solbat i pilai strong tru.

Hatwok bilong ol i karim kaikai taim Oscar Tonga setim boi Kandrian Lucas Samak long surikim skoa i go long 10-6.

Lahanis i bekim wantaim wanpela pnealti long surikim skoa i kam kisotu 10-8.

Guria i kisim wanpela penalti na surkim skoa gen long 12-8.

Dispela taim nau pait i brukik namel long ol pilaia.

Ol i stapim gem inap 12 minit na taim ol i statim gen, kepten bilong Guria Michael Marum i setim Chris Purkikil long skoa long bringim skoa i go long 16-8 long winim SP Cup.

Mermaids daunim Telstars

LAE BISCUIT Mermaids i soim tru olsem ol i ken pilai gutpela netbal gem taim ol i autim biknem Telstars 50-48 long gren fainel bilong Pot Mosbi netbal kompetisen las wiken.

Dispela em i namba wan taim Mermaids i winim dispela taitel. Bipo, Telstars tasol i save papa long taitel long spot bilong ol meri.

Telstars i pilai long gren fainel 33 taim na ol i laik winim 27 taitel bilong ol tasol Mermaids i bagarapim tru plen bilong ol.

Insait long opening minit, gem i no ran gut long wanem ol suta bilong tupela tim wantaim i mas pret na i no sutim gut bal.

Tupela suta Mimi Ori na Lydia Veali i no painim rot long sutim gut bal long net ya.

Veali husat i save kamapim gutpela gem long suting eria i no pilai olsem em i save pilai long ol arapela gem.

Long sait bilong Mermaids, Lua Mavara na Kila Rawali pilai gut tru olsem long namba wan kwata i go pas 14-8.

Insait long namba tu kwata, Veali i pilai strong tru long winim bal egen-sim Kapu Kapi na Ralai Benedict long kisim bal tasol Mermaids i go pas yet long skoa 20-25.

Long namba tri kwata, Telstars i mekm sampela senis na kepten Mona Lisa Leka i go long gol atek, Emily Maha i kam long senta na Ati Rawali i kisim ples bilong Maha.

Kila Leka bilong Mermaids i mekim bikpela senis tru long tim long helpim ol i go pas long skoa 40-19.

Exodus i bekim dinau long Saints

EXODUS i bekim stret dinau bilong las yia taim ol i wilwilim stret Saints long gren fainel bilong ol meri long Capital Basketball Lig long las wik Sarere.

Saints i nogat ol biknem pilaia olsem Lua Mavara na Mona Lisa Leka husat i pilai long gren fainel long sem de.

Exodus wantaim ol lapun pilaia olsem Kay Banjoy, Kairu Laho na Emma Waiwai i go pas long dispela win bilong ol.

Kosa bilong Saints Florence Bundu i mas pilai bikos ol i sot tru long ol pilaia ya. Maski ol pilaia olsem Jenny Mroroa, Sunsa Piasoi, Susan Paisoi na Caroline Lahani i stap ol i gat liklik sans tru long winim Exodus.

Skoa bilong ol arapela gem i sansp olsem Saints i winim Exodus 72-63.

Harold Elavo, Leo Moide, Lawrence Lahari, Morris Asiba na brata bilong em Togare i kamapim gut gem long namba tu hap na winim Exodus ya.



EAST NEW BRITAIN PROVINCIAL GOVERNMENT



Congratulations

to the

2001 Intercity Cup Champions the Agmark Rabaul Gurias.

Bikpela tok hamamas bilong mipela olgeta long East New Britain Provincial Government i salim bikpela tok hamamas i go long Agmark Rabaul Gurias husat i winim 2001 Inter-city Cup Competition.

Tok hamamas i go long Coach Jeff Wade, Captain Michael Marum, Team Manager Bert Swzaluk, olgeta players na ol coaching staff.

Long makim Gavman, ol wokman/meri bilong gavman long provins na ol pipol bilong East New Britain mi salim bikpela hamamas tru long yupela olgeta.

Hon. Leo Dion
Governor

Kevin bihain lekmak bilong bikpela brata

WANPELA yangpela boksa bilong Mumeng long Morobe provins i bin bel kaskas stret taim referi i bin givim win i go long birua bilong em insait long pait bilong ol long mun Mas 200 long nesanel sempionsip long Goroka.

Long dispela taim dispela yangpela boksa Kevin Sam i no bilip tru olsem refri Manoa Petueli i givim stending kaun taim em i pait wantaim birua bilong em Joe Ameng.

Planti ol sapota bilong Kevin husat i lusim ples Bulolo i no amamas tasol ol i no war bikos narapela sempionsip i stap yet.

Dispela taim Kevin i tokim Wantok olsem em bai rausim tiket bilong Joe Ameng taim tupela i bung gen long narapela nesanel boksing taitol long Lae.

Yes, dispela pait toktok bilong Kevin i karim kaikai stret taim em i save makim kantri na winim planti gol medal. Nau yet John em wanpela profesenel boksa na i save trening long Bulolo.


Bihain long dispela pait, ol nesanel selekta i makim Kevin Sam long stap long trening skwat long makin PNG long mini SP Gems na Osenia Boksing taitel.s

Ripot long dispela taim i tok olsem dispela pait bilong Kevin na Ameng i bin pait bilong tonamen. Insait long dispela pait, Kevin i soim stret stail bilong em na bagarapim tru sindaun bilong Ameng.

Kevin em i liklik brata bilong John Sam, wanpela gutpela boksa husat i save makim kantri na winim planti gol medal. Nau yet John em wanpela profesenel boksa na i save trening long Bulolo.

Kevin bai stap insait long PNG tim long makim kantri long Norfolk Ailan. Bikpela tingting bilong em long win na karim dispela nem insait long boksing we bikpela brata Sam i putim pastaim.

Kevin i tok nau yet em i trein hat tru na em i laik dispela hatwok bilong em i karim gutpela kaikai bilong em.



• Kevin i laik bihain brata bilong em John Sam long boksing

PNGFA stapim Anda 18 wimens taitel

PAPUA Niugini Futbol Asosiesen bai i no inap holim Nesanel Wimens Anda 18 soka sempionsip long Pot Mosbi.

Eking jenerel sekretari Paul Pondo i tokaut olsem ol i stapim dispela sempionsip bikos planti senta i no givim nem. Dispela sempionsip i sapos long stat long Septemba 28.

Dispela sempionsip nau i surik i go long neks yia. PNGFA i no tokaut long wanem taim o de dispela junia soka sempionsip bilong ol meri bai kamap.

PNGFA tu i sensim gen tingting bilong em na bai holim

Nesanel Klab sempionsip long Kimbe. Dispela soka sempionsip bai kamap long Oktoba 18-21. Namba wan taim sempionsip ya i stap long Kimbe tasol PNGFA i surikim i go long Pot Mosbi bihain long ol sapota i paitim presiden bilong Kimbe.

Tasol PNGFA i ting dispela em i samting bilong asosisen na i laik surikim dispela sempionsip i go bek gen.

Mausman bilong NGI Soka Rijonal Asosiesen John Raka i paia stret long PNGFA long rausim tonamen long Kimbe. Dispela toktok i karim kaikai na PNGFA i sensim tingting na

givim i go bek long Kimbe.

Mista Pondo i askim olgeta senta long salim pas long tokaut sapos ol bai stap insait long dispela klab sempionsip o nogat. Ol maina primia na namba tu bilong ol tasol i ken stap long dispela sempionsip.

Wanwan asosiesen i mas baim K300 i go long PNGFA long tokaut olsem wanem klab bai makim ol. Pasbuk bilong PNGFA em 1000146403 - Bank South Pasifik long Lae.

Pondo i askim wanem ol asosiesen i baim i mas salim lista bilong tim na ol pilaia i go long em na tu risit bilong mani.



Nokondi pinisim tas wantaim stail

NOKONDI Tas Futbol Asosiesen i bin wokim histori taim Inn Gepax na Aipos i dro 2-2 insait long gren fainel bilong ol tupela wik i go pinis long Nesanel Spots Institut long Goroka.

Insait long Open Mens Divisen, tupela tim ya Gepax na Aipos i skorim tupela trai. Olsem na taim i sot, ol opisel bilong Nokondi Tas Asosiesen i tokaut olsem tupela wantaim i wina.

Nokondi i no brukim rekot. Aussie Ruls long Nesanel Kapital Distrik i brukim rekot taim ol opisel i brukim taitel na tokaut olsem tupela tim, Defence na Dodgers i winim dispela taitel.

Na long arapela gem, Aipos i dastim stretim Inn Gepax na Natives 6-5 long Open Mix tim. Barbarian i lus long Tarangau/Yogiyo Brothers Bullets 7-8.

Na long Anda 15 meri, Yogiyo Bullets i

rausim sket bilong ol NSI Jets 2-1 na long Anda 15 bilong ol man, Tarangau i flai antap na abrusim Natives 4-3. Na long pilai long opim gem, Nokondi autim Bena Kantri 4-3.

Ol meri lukautim Goroka ragbi yunion

HUSAT i tok wok presiden, sekretari na tresera em bilong ol man tasol long ol spot oge-naisesen.

Nogat ya, Goroka Ragbi Yunion las wik i makim tripela meri long lukautim kompetisen bilong ol. Ol meri ya em Joseph Vau olsem presiden, Velda Feka olsem sekretari na tresera em Lavi Andy.

Vau em Sels Supevaisa bilong Air Niugini long Goroka, Feka na Andy wok wantaim ol fainens kampani long Goroka yet.

Dispela tripela meri i no save pilai ragbi yunion. Nogat ol i sapota nating ya. Ol i save go lukim ragbi yunion bikos sampela wantaim na pren i wok long pilai ragbi yunion long Goroka.

Taim tripela meri i kisim wok olsem opisel

bilong Goroka Ragbi Yunion, olgeta man i amamas. Ol i no tok yesa hariap. Ol i pasim tingting planti taim tru na bihain ol i mekim tok-tok.

Presiden Vau i tok "Ol i bin askim mi long kamap presiden namba wan taim na mi tok nogat. Tasol ol i kam namba tu taim, na mi tok bai mi traim givim bes bilong mi long mekim wok.

Taim bilong ileksen nau, ol i makim tripela meri ya. Tasol wanpela samting em ol i nogat rekot long mekim wok.

Olpela keateka presiden John Susuve i tokaut olsem em i lukautim wok tasol bikos nogat opisel. Ol i no makim em tasol em i voluntia long mekim wok bilong presiden bikos nogat man i laik mekim wok.



• Ol boi long Pot Mosbi ragbi yunion i kilim skin stret.

Taim ol i askim Susuve long rekot em i tok em i nogat rekot long wanem em i no presiden. Em i helpman tasol long lukim ragbi yunion i mas kamap strong long dispela senta.

Nupela ol eksekutiv

nau i stat gen.

Vau i tok "Ol opisel bilong em i kisim opis tupela mun i go pinis. Na dispela em wanpela bikpela salens tru we dispela spot em bilong ol man ya."

"Mi amams tru olsem mipela i pinisim gut

sisen na tu nogat wanpela hevi i kamap tu long fainel," presiden i tok.

Vau i tok olsem em i lukluk het long kamapim gutpela sisen long neks yia sapos ol klab i makim ol gen long mekim wok.

Tim long NCD i winim taitel bilong Papua Darts

Oro, na Pop

HENRY MORABANG i raitim

NCD tim i wok long redim tru planti spes long top foa bilong Papua Rijen Dart sempionsip i kamap long Independens wiken long Alotau, Milen Be provins.

Ol arapela tim bilong NCD i soim pes strong long taitel em Pot Mosbi, Telikom na Daudau i paia stret long dispela sempionsip.

Presiden bilong Papua Dart Federesen Jerry Kansan i tokim Wantok Nius olsem ol arapela liklik senta olsem Kiunga, Misima, Tabubil i wok long kamapim gutpela gem tru long darts sempionsip.

Na long ol fainels i kamap pinis i stap olsem; Triples Mens: NCD, POM, POM na Telikom na long Triples bilong meri em; NCD, Pop,


Insait long Doubles bilong Man; NCD, POM, POM, Pop na long divisen bilong ol meri em NCD, POM, NCD Pop

Na long tim event (mens) Daudau, Pop, Pop, NCD na long bilong ol meri em POM, Pop, Misima na NCD.

Kansan i mekim bikpela amamas tru long ol liklik senta. Em i tok long ol yia bihain, ating ol dispela liklik senta bai kamapim strongpela salens tru long ol biknem senta olsem NCD, Pot Mosbi na ol klab insait long Pot Mosbi olsem Telikom na Daudau.

Dispela sempionsip em Gavana bilong Milen Be Titus Philemon i opim long Triden.

Dats sempionsip ya i pulim moa long 500 ol pilaia, opisel na tu voluntia long mekim dispela sempionsip i kamap gut.



• Ol biksa long Goroka i soim stail bilong ol long trening.

Drifters putim mak long Kokopo soka

DRIFTER soka tim i sindaun nau long namba wan ples long poin lata bilong Kokopo Soka Asosiesen kompetisen.

Ol boi ros ya i mekim save stret long ol Mungkas 3-0. Mungkas em ol lain Not Solomon i stap long Is Nu Briten i fomim tim ya.

stat bilong wisel, ol boi Drifters i lukautim gut tru gem wantaim gut-pela ateking na difensim gem plen.

Ol Mungkas i nogat sans tru ya. Ol i wok long raunim bal olsem ol liklik skul mangi pilai soka.

Ol pilai bilong Drifters i lukim olsem ol i opim gem na salim

straika bilong ol i brukim umben bilong ol. Mungkas i kamapim gutpela pilai tasol taim ol i pasim bal long narapela i no save gut-pela tumas.

Drifters i skorim wan-pela gol long namba wan hap.

Na long namba tu hap bilong pilai, Drifters i pasin toktok pinis na

bagarapim tru Mungkas. Ol i skorim narapela tupela gol gen long bringim skoa bilong Drifters i go long tri na Mungkas em kiau yet.

Ol opisel bilong Kokopo Soka Asosiesen bai stretim dro long dispela wik na ol bai statim fainel long wiken.

Enuki na Malaibi winim medal bilong Goroka

JAMES KILA i raitim

LAS wiken taim planti manmri long Isten Hailens na Goroka i bisi tru long raun lukim Goroka So, tupela pikinif man bilong ol i pilai strong na winim medal insait long spot bilong weiltifting.

Paul Enuki i winim gol medal na Pinye Malaibi i winim bronze medal taim nupela i pilai insait long 25 Nesenel Weiltifting sempionsip long Pot Mosbi.

Maski dispela tupela lifta i olpela liklik insait long spot bikos ol i save winim medal planti taim bipo pawa na stail bilong ol i stay yet. Ol i mekim planti ol opisal long sempionsip i guria liklik bikos stail bilong ol i strong yet.

Win bilong dispela tupela lapun na wip yet lifta i bringim bikpela amamas tru long Isten Hailens provins bikos tupela i winim rait long bringim 2002 nesenel taitel i go antap long ples bilong tupela long Goroka.

Goroka i bin salim tupela lifta tasol i go long dispela sempionsip. Na tupela lifta i soim stret olsem pawa bilong tupela i no pinis yet. Maskin ol i lapun tasol stail bilong pilai na teknik i stap yet long blut bilong tupela.

Planti ragbi lig sapota insait long Isten Hailens i no bin amams tumas bikos tim bilong ol Goroka Lahanis i lus long fainel egensim Guria. Tasol noken wari bikos gol na bronze i

wokabout pinis i to antap long kol ples.

Enuki i winim gol medal insait long 94kg divisen na Malaibi i winim bronz insait long 69kg divisen.

Malaibi i pinis namba tri bihain long Charlie Ronnie husat i winim gol medal na Teny Resena husat i winim silva. Tupela lifta i makim Pot Mosbi long dispela sempionsip.

Malaibi i tok olsem em i amamas tasol long dispela win bilong em. Tasol ating sapos sempionsip i go long Goroka neks yia, pawa bilong bai kirap sret na em bai mekim gut tru.

Turangau dispela tupela lifta i bin tren insait long 7-pela mun tasol long redim ol yet long go pilai insait long dispela sempionsip. Tupela yet i save trein long Nesenel Spot Institut bikos nogat narapela liftas i joinim ol yet.

Enuki na Malaibi i bin stap tu insait long wanpela Osenia Kosa kos we wanpela sinia instrakata Mathew Curtain i bin ranim long Mosbi las wiken. Tupela wantaim i bin kisim setifiket long stap insait long dispela Olimpik Solidariti kos.

Ating bihain long dispela win bilong ol, moa lifta na husat yang-pela man o meri i gat intres i ken go joinim klab bilong ol.

Malaibi na Enuki nau yet i makim bikpela wok tring long traum oge-nasim ol fan raising na tu pinim ol gutpela sponsat long holim dispela 2002 nesenol weiltifting sempionsips ya.

PAINIM BAL RESIS NAMBA 8



RUL BILONG PILAI:

1. Makim X long boks long poto yu ting bal i stap
2. Makim X long pen tasol
3. Katim poto long sisos na salim long: PAINIM BAL RESIS NAMBA 7, Wantok Niuspepa, P.O. Box 1982, Boroko, NCD.
4. Nambawan entri i makim stretpela hap bal i stap, em bai win.
5. Las de bilong kisim ol entri em Fraide 31 Ogas, 2001.
6. Long Wantok bilong Fonde Septemba 27, bai gat nupela K100 prais mani resis. Bai gat resis bilong olgeta mun i go inap mun Desemba, 2001.
7. Disisen bilong komiti i makim wanpela wina em i fainel.
8. Wina bai kisim sek mani, na i no long kes.
9. Sapos nogat wina bai skruim win moni i go long narapela resis.
10. Yu ken salim moa long wanpela entri, tasol noken yusim poto kopi.
11. Ol wokman meri na pikinini bilong Wantok i no stap insait long dispela resis.



Raitim nem na adres bilong yu: **Nem**.....**Address**.....
.....**Krismas**.....

Yu ken salim moa long wanpela entri, tasol no ken yusim poto kopi.

Unitek wilwilim Guria

OL soka sapota insait long Lahi Soka Asosiesen (Lahi) i lukim wanpela gutpela primia kik resis i stap namel long YumiFM Unitech na Guria long Sir Ignatius Kilage stadium las wiken.

Insait long dispela gem, tupela i mas winim long surik i go antap long painim ples long fainel.

Unitech i pasim tingting long traum difendim kap olsem sempion klab long Lahi. Guria tu

i gat wankain tingting. Olsem na taim tupela i sanap namel long soka fil, ples i paia stret ya.

Ol boi Guria i no yusim gut midfil bilong ol. Tupela straika bilong Guria olsem Suni Duen na Felix Manau i no pilai gut tumas. Ol boi Unitech i lukim olsem na wantu tru ol i blokim difens na skorim tripela gol olgeta.

Unitech i gat bikpela tingting tru long fainel na ol i no givim wan-

pela sans long ol lain Guria.

Maski Guria i gat ful sajt we ol biknem pilai i stap, Unitech i rausim trausis bilong ol isi tru. Kepten Elwin Nema, Hans Fred, Sebastian Fred, Ismael Hakaba na Donal Saii i stap tasol dispela i no helpim tru tim.

Unitech nau bai bungim Sobou, na Guria bai kisim narapela sans gen long dispela wiken long sekim sapos ol i win o nogat.

Gazelle sofbal redi long pri-sisen fainel

GAZELLE Amata Sofbal Asosiesen (GASA) i statim pinis pri-sisen bilong em we i pulim 44 tim olgeta.

Dispela namba i winim tru namba bilong ol tim i resis long pri-sisen las yia.

Ripoti tokaut olsem GASA i statim pri-sisen bilong em 5-pela wik i go pinis na ol i holim fainel long las wiken long amamasim Independens wiken.

Tasol knok-aut fainel i bin surik i go bek long wan wik long wanem taim bilong pilai i sot tru.

Nupela presiden bilong GASA Aaron Marumum i tokaut olsem dispela ol fainel bai kamap long Tomaringa Bareks long dispela wiken.

Marumum i kisim wok presiden long stat bilong dispela yia i bilip olsem em wantaim eksekutiv bilong

em bai wok long bringim sofbal i kamap bikpela.

Nupela presiden bilong GASA i gat nem long wok edministresen bilong sofbal.

Em i tok taim em i stap presiden em i laik lukim olsem sofbal insait long GASA i mas go antap na wankain olsem ol arapela biknem senta olsem Kokopo, Rabaul, Pot Mosbi, Lae na Goroka.

Ol nupela opisel bilong GASA em Andrew Ponda olsem vais presiden, Bai Igua olsem sekretari na Mari ToVue tresera.

Marumum i tokaut olsem em i amams tru long stendad bilong sofbal long pri-sisen. Na dispela i soim tru olsem kompetisen bilong GASA bai strong tru long dispela yia.

I gat 44 tim na olgeta bai resis winim spes long GASA kompetisen.



• Ol lain Alpos i redi long go pilai insait long gren fainel long NSI.

Barbarian Sevens tonamen i askim long sapot

SIAMAN bilong World Barbarian Sevens tonamen Soiat Williams i singaut olsem sapos tonamen i laik kamap gut em i nidim tru sapot bilong olgeta bisnis na kampani long Papua Niugini.

Ol ogenaisa i wok hat tru long stretim ol samting bilong mekim dispela tonamen i kamap namba wan tru.

Wol Barbarian Sevens bai kamap long Oktoba 27-28 long Pot Mosbi. Dispela tonamen i pulim moa long 16 tim husat bai tokaut long wanem kain ol pilaia bai kam soim pes long tim bilong ol.

Mista Williams i tokaut olsem komiti bilong em i wok strong tru long putim wanpela strongpela tim long makim PNG Barbarians long dispela tonamen. Nau yet bikpela askim i go pinis long ol ovasis kantri olsem Fiji, Australia na Nu Silan long

kisim sampela ol gutpela pilaia i ken makim PNG.

"Mipela i traim long putim wanpela strongpela tim i gat ol pilai long PNG tasol mipela i ting ting tu long traim kisim ovasis pilaia long strongim stret tim bilong PNG long dispela tonamen.

"Mipela i askim pinis long ol ovasis kantri long husat bai pilai long mipela," Mista Williams i tok.

Siaman i tok em i bilip tru olsem PNG Barbarians bai kisim planti ol gutpela pilaia long strongim nem bilong tim. Dispela em i Sevens gem na i wankain olsem 15 ragbi we i planti ol pilaia.

Hong Kong Sevens em wanpela bikpela Sevens tonamen insait long kantri. Olsem PNG Barbarians i laik traim bringim dispela kain stail bilong pilai i kafn aninit long nem bilong World Barbarians Sevens.

Bismarck i traim tasol

..... samting tru bilong yupela ol skul mangi

BISMARCK soka klab em wanpela nupela tim insait long Lahi Soka Asosiesen tasol em i gat namba pinis.

Dispela yia ol i pilai na ol i laki long winim wanpela spes long fainel. Ol i bin stap wantaim ol yangpela skulmangi bilong Bugandi Hai long namba foa ples. Tasol ol i strong na rausim Bugandi na holim dispela spes ya.

Moa long 300 man na meri bin kamap long lukim dispela gem namel long Bismarck na Bugandi. Ol sapota i laik painim aut husat tru em i sempion tim namel long tupela ya.

Nupela kosa bilong Bismarck Buka Pasar i lukautim dispela tim na nau ol i kam insait long fainel. Buka em wanpela olpela straika bilong PNG long 1987 Saut Pasifik Gems

long Noumea.

Em i holim rekot yet long brukim han bilong golkipa bilong Tahiti insait long wanpela penalti kik. Taim ol i laik kisim penalti, arapela straika Ruben Tama i tepim bai tasol na Pasar i bulletim na brukim han bilong gol kipa.

Tasol nau Pasar i slek liklik na i soim gutpela pasin long kosim wanpela lokal klab long Lahi Soka Asosiesen.

Kosa bilong Bismarck Pasar i tokaut olsem em i no laik daunim Guria. Em i tok planti em ol yangpela studen na na ausait lain we ol i gat strong long pilai. Tasol Bismarck bai traim tasol long skelim strong bilong ol.

Em i no laik tokaut husat bai tasol olgeta toktok bai kamap long soka fil.

Tim bilong dispela wiken em Francis N'Drumen, Vincent Michael, Jerry Rauna, KC Tiran, Steven Wai, Joe Panikian, Kureu Waoh, Naiah Sipat, Chris Colon, Michael Pahun, Sam Popot, Muti Apo, Popolon, Rapahel Ewih, David na Frank Kehot. Kosa em Pasar na menesa em John Nomeh.

Na long sait bilong Guria em Abraham Moipe, Fine Binding, Ismael Habaka, Sifang Bafinu, Rovu Laison, Hans Fred, Elwin Nema, Donald Sait, David Panap, Suni Duen, Bobby Guabin, Sebastian Fred, Felix Manau, Alfred Konsie, Nicholas Pokanau na Luke Mondo

Ol ki pilaia i no pilai las wik egensim YumiFM Unitech olsem na ol bai sapim bainat wantaim Bismarck.

Bisi Bees i winim Somare Sil

BISI Bees i winim Somare Sil namba tu taim bihain long ol i winim Wewak Ice 1-0 long gren fainel long Martde. Dispela kik resis em long amamasim Independens wiken long Is Sepik.


Win bilong Bees i helpim ol long winim K4,000 wantaim tropi. Na ol lain Wewak Ice i kisim sampela prais mani na liklik tropi.

Dispela fainel i soim wankain las yia taim Wewak Ice na Bisi Bees i bin pilai. Bees i winim tropi tu las yia.

Straika bilong Bees Henrick Bees i pairapim umben na dispela i kirapim tru skin bilong ol wan pilai na ol i blokim olgeta rot bilong Wewak Ice long bekim dispela gol ya.

Gol bilong Hendrick i kamap taim ol arapela pilaia olsem Paul Bee na Gats Bee i paulim ol stret ya.

Golkipa bilong Wewak Ice Albert Pomat i guria stret taim gol i go insait long umben.



•Sir Michael Somare.

Wewak Ice i gat tupela gutpela sans tasol ol straika i no yusim gut long skorim gol long mekim gem i kamap strong.

Ceepec Karo, Walter Tobby, Eddied Shepeng na Francis Anott i gat ol sans tasol ol i no yusim gut ol dispela sans long kamapim gol.

Chauka Pomat, Jacob Kuasi, Eddie Bate na Charlie Alung i

pilai strong tasol ol i no inap tru long brukim difens bilong Bisi Bees. Ol pilaia olsem Mells Bees, George Bee, Jeffrey Jombera, Mike Bee na Wasu Bane i banisim olgeta rot ya.

Ice i kisim K2000 na Wewak Caltex i kisim K1000 bihain long ol i winim Eels husat i amamas wantaim K700.

Samting olsem 17 tim i soim pes olsem Ambunti, Yangoru-Saussia (2 tim), Kubex Niengu, Mepphimit, Angoram Developmen skwat, Marogma, Angora United, Bocok, Wewak Eels, Wewak Caltex, Wewak Ice, Minjua bilong Mushu Ailan na Defence i resis long dispela tonamen.

Olgeta klab i baim K600 long resis na olgeta i kisim K300 olsem prais mani. Awot bilong Man of the Match i go long Hendrik Bees na yangpela pilaia long tonamen.

Wirui Saints ol lain i gat nem long bagarapim ol kain tonamen olsem i kisim wanpela prais long ol i senisim pasin bilong ol.

Ol tropi i no kamap long taim bilong tonamen. Tasol Sir Michael i sapotim toktok bilong tonamen dairekta bilong em olsem prais long neks yia bai go antap long K6,000.

... Prais mani bai go antap
long K6,000 long neks yia
Somare Sil soka sempions



OPIS BILONG MEMBA BILONG KOKOPO OPEN

Se Rabbie Namaliu i tok amamas long Agmark Guria

Memba bilong Kokopo Se Rabbie Namaliu i tok amamas long Agmark Rabaul Guria long winim dispela SP Kap insait long Nesenel Ragbi Lig sempionsip.

Se Rabbie i tok olsem olgeta komuniti insait long Is Nu Briten i amamas wantaim tim husat i bin soim stret gutpela spotmensip na komitmen bilong ol.

"Em i bin gutpela tru tu we tim ya i bin kam bek yen long Rabaul long independens de stret na olgeta komuniti i bin bungim ol na selebretim dispela win bilong ol long Kokopo Haiskul," em i tok.

Se Rabbie husat i petron bilong Agmark Rabaul Guria i tok ol komuniti i amamas na tu dispela i apim tingting na spirit bilong olgeta ol.

"Dispela win bilong Agmark Rabaul Guria i bin litimapim spirit bilong ol manmeri long taim bilong Independens bikos olgeta pipel i sore yet long dispela birua i kamap long Amerika we planti pipel i dai," em i tok.

Se Rabbie Namaliu tu i soim amamas bilong em long Michael Marum (kepten bilong Guira), Chris Purkikil, Walter Vagala na John Waka, dispela fopela pilaia bilong Guria i stap insait long Kumuls tim husat bai pilaim Australian Kangaroo long neks mun.

Em i ting olsem dispela foapela pilaia bilong Guria bai pilai strong tru wantaim Kumul tim na bai kamapim gutpela nem bilong Guria tim.

Se Rabbie i tok olsem ol pipel bilong Is Nu Briten provins i amamas long tim spon-sa Ag Mark Pacific na ol narapela bisnis husat i soim sapot bilong ol long Guira tim.

Em i tok em i amamas tru wantaim Agmark Rabaul Guria long dispela win bilong ol bikos em i givim gut nem long ol pipel bilong Is Nu Briten na tu bilong Niugini ailan rijon.

WANTOK SPOTS

DISPELA WIK INSAIT LONG WANTOK NIUSPEPA

**Bismarck redi long nekim
Unitech long Lahi Soka**

pes 30



SP Cup stori

pes 28

**Pot Mosbi
salim bikpela skwat
long skul
soka sempionsip**

POT Mosbi Skul Soka Asosiesen bai salim wanpela bikpela skwat tru i go pilai long Goroka long Orogen School Soka salens na tu long Australia.

Eksekutiv bilong POM Skul Soka John Mogi wantaim lain bilong em olsem Steve Mobbs i wok hat tru long redim tim.

Mosbi bai salim 5-pela tim olgeta long stap resis long Goroka. Ol tim em Anda 12 husat bai resis long Anda 13, Anda 15 (man na meri) na Anda 17 (man na meri)

Anda 11 na Anda 13 tim bai go pilai long Australia long narapela wik.

Mista Mobbs i tokaut klia olsem ol i salim tim bikos ol papamama i wok hat tru long mekim fan-raising na tu kisim helpim i kam long sponsa.

Sapos nogat kain helpim, ol tim bai i no inap stap insait long sempionsip.

Dispela sempionsip long Goroka i pulim tim i kam long Lae, Wewak, Goroka, Finschafen, Tabubil na tu Manus.

His em skwat bilong Anda 15 na 17. Wantok Nius i no inap kisim skwat bilong Anda 13 long pilai long Goroka.

Under 15 Boys: Ronald Adam, Gregory Barampataz, Lastina Dickson, Karia Mauri, Leslie Nongor, Francis Ben, Danny Ling, Tony Timani, Tuman Gapenong, Thomas Kutun, Kritch Babona

Harold Demo, Andrew Potuam, Peter Kadedaya, Kura Namasu, Wayne Alau, Aiden Mako Roa, Michael Pomat, Patrick Topilaveka, Benjamin Maragau, Jerome Saleu and Claytus Timus

Under 15 Girls: Anita Tauka, Anne Francis Puipui, Beleni Wambena, Bianca Elias, Felicity Bridger, Janine Matawan, Jenny Munak, Joyceline Talonu, Linda Jambi, Loise Posing, Maxine Hayfa, Monica Mwayubu, Nancy Nori, Patronella Modagai, Pia Marie Sitapai Samantha Peninsa, Susan lewago, Suzanne Tuam, Taita Kivori and Yvonne Supo

Under 17 Boys: Allan Sikinapi, Paul Gure, Jeffery Poltang, Willie Vaira, David Kapa

Russel Muarey, Reuben Sanai, Elizabeth Kumbinyeri, Julius Tamah Obert Modagai, Erickson Komeng, Brown Mou, Elliot Alukes, Simon Singut


Celcius Metio, Tommy Wabiyawi, David Konnei, Kila Geti, Seddi Kakehe, Chris Maru, Charlie Piranda and Allan Lavi

Coaches: Mr Gitiri and Mr Modagai

Under 17 Girl: Regina Kausu, Fidelma Sambon, Amy Dobunaba, Anita John, Jennifer Mogi, Peggy Kegana Rebecca Kwaiyala, Senimili Melavi, Diana Sinamoi, Epala Michael

Lorina Wai, Malele Silikara, Francisca Mandoni, Nevely Beven, Josephine Koge, Sophie Sogen, Afike Sikia, Theresa Lulupo, Selina Garisa, Anna Mera and Kerry Livicha
Coaches: Mrs Kelep and Ms Martins

Kumul painim nupela kepten



□ **Tupela pilaia bilong Rabaul Guria i laik takolim Steven Sike bilong Goroka Lahanis long SP Cup gren fainel las wik long Pot Mosbi. Ol Guria nekim ol 16-8**

PAPUA Niugini Kumuls tim nau bai painim nupela kepten long go pas long tim taim ol i salensim Australia Kangaroos long mun Oktoba.

Dispela bikpela ragbi lig Tes bai stap namel long tupela tim long Oktoba 7 long Pot Mosbi.

Ol nesanel ragbi lig selekta i makim pinis tim, tasol ol i no tokaut long kepten long wanem Adrian Lam bai i no inap pilai long dispela gem.

Ripoti i kam long Ingran i tokaut olsem Adrian Lam bai i no inap pilai long Kumul long

wanem em i mas pilai long Wigan. Tim bilong em Wigan i stap insait long fainel bilong Euro Super League kompetisen.

Siaman bilong PNGRFL Bot John Numapo i mekim dispela toktok taim em i tokaut long nem bilong ol PNG Kumul husat bai salensim Australia Kangaroo.

Numapo i tokaut olsem em i save olsem ol selekta i mekim gutpela wok long makim ol pilaia ya. Skwat bilong PNG Kumul i gat ol pilaia long Australia na tu

Stanley Gene bai joinim dispela tim long salensim Australia.

Mista Numapo i tok ol selekta i kisim ol pilaia long SP Cup kompetisen na tu sampela pilaia long Brisbane - Bundy Cup kompetisen. Ol selekta i gat bilip olsem ol i makim wanpela strongpela skwat inap long putim salensim Wol sempion. Siaman i tok PNG i gat planti ol gutpela pilaia tasol ol i makim tasol 20 pilaia. Tripela bilong ol pilaia em stenbai pilaia olsem Nigel Hukula, Alfred Songoro na Komb Rumints.

Ful skwat em Eddie Aila, Marcus Bai, Makali Aizue, Stanley Gene, Raymond Karl, Alex Krewanty, Bruce Mamando, Michael Marum, Mark Mom, Duncan Naawi, Tom O'Reilly, Chris Purkikil, Stanley Tepend, Walter Vagaia, John Waka, David Westley na John Wilshere.

Ol tim opisel em Bob Bennett (kosa), Tony Spencer (het trenu) Ulea Rolu (trenu), Mathew Natush (physio/strapper), Dr Ken Boone (dokta) na Peter Barnanga (tim menesa).

Ol Hula bai resis long Anda 20 soka na netbal taitel

SAMTING olsem 18 viles insait long Hula eria insait long Sentral Provins bai resis long Anda 20 soka na netball sempionsip long dispela wiken.

Dispela sempionsip ya bai kamap long Kamali viles husat i winim tupela taitel bilong soka na netbal las yia.

Ol viles bai soim pes long dispela sempionsip long wiken em Kamali, Makerupu, Hula, Alewai, Irupara, Babaka, Kaparoko, Kalo, Karawa, Keapara, Alukuni, Kore, Mamalo, Ganimarupu, Alepa, Kwaipo, Gemo na Edukesen. Dispela tim Edukesen em ol lain Hula i stap long Pot Mosbi siti.

Babaka, Karawa na Kamali man tim i bin winim dispela soka taitel pinis taim resis ya i

stat long 1998. Kompetisen bilong Anda 20 i bihainim wanpela polisi bilong PNG Futbol Asosiesen long kamapim soka tonamen long rurel eria.

Dispela soka na netbal tonamen i bin pulim na kamapim planti ol yangpela long pilai soka na netbal.

Presiden bilong Hula Spots Asosiesen Scott Vavine i tokaut olsem PNGFA i no luksave long kain ol liklik tonamen olsem. Olgeta taim ol i pasim ai na lukluk long bikpela senta olsem Lae na Pot Mosbi tasol.

Mista Vavine i no wanbel tumas long PNGFA long wanem ol i no save givim sampela kain helpim long strongim soka insait long rurel eria, naa ol i

save toktok tasol long taun kompetisen.

Pot Mosbi na Lae i no save kamapim wanpela gutpela samting. PNGFA i westim mani na taim bilong long wanem soka em i spot bilong ol grasrut na PNGFA i no save givim helpim.

Wanpela samting tu, afiliese fi bilong PNGFA i antap tumas. Ol liklik senta long rurel eria i nogat mani long baim afiliese long kisim ol helpim long ol.

Vavine i tok namba bilong ol rejista pilaia wantaim PNGFA i go daun tru long wanem i nogat gutpela luksave bilong ol opisel. Ol arapela spot olsem netbal, basketbal na volibol i wok long kam antap na bai liklik taim

winim namba bilong ol soka pilaia long kantri.

Namba bilong Soka pilaia long bipo olsem long yia 1960 na 1970, namba ya i winim tru olgeta arapela spot. Planti man na meri i save pilai soka bikos ol i save long soka i save helpim ol.

Insait long dispela tonamen long wiken, Makerupu, Kalo, Babaka, Kaparoko, Karawa na Alukuni bai putim strongpela oposisen long pilai soka.

Ol arapela tim em Hula, Alewai, Irupara, Keapara na Ganimarupu bai pilai long amamasim ol sapota ya.

Kamali i autim Babaka 1-0 long winim dispela soka taitel las yia.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.